

2010-mi aningaasanut inatsisissatut siunnersuut

pillugu

Inatsisartut Aningaasaqarnermut Ataatsimiititaliaata

ISUMALIUTISSIISSUTAA

Inatsisissatut siunnersuutip aappassaaneerpeqarnerani saqqummiunneqartoq

Aningaasaqarnermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Naaja Nathanielsen (Inuit Ataqtigiit), siulittaasoq
Inatsisartunut ilaasortaq Niels Thomsen (Demokraatit), siulittaasup tullia
Inatsisartunut ilaasortaq Hans Aronsen, (Inuit Ataqtigiit)
Inatsisartunut ilaasortaq Per Berthelsen (Siumut)
Inatsisartunut ilaasortaq Aqqaluq Egede (Inuit Ataqtigiit)
Inatsisartunut ilaasortaq Finn Karlsen (Atassut)
Inatsisartunut ilaasortaq Akitsinnguaq Olsen (Inuit Ataqtigiit, tamatuma kingorna Siumut)
Inatsisartunut ilaasortaq Harald Bianco, Naaja Nathanielsenimut sinniisoq (Inuit Ataqtigiit)
Inatsisartunut ilaasortaq Aleqa Hammond, Per Berthelsenimut sinniisoq (Siumut)
Inatsisartunut ilaasortaq Karl Lyberth, Per Berthelsenimut sinniisoq (Siumut)

Imarisai:

1. Aallaqqaasiut.....	4
1.1 Aningaasanut inatsisissatut siunnersuutip ilusiligaanera aningaasaliisarnermilu maleruagassat	5
1.2 Iliuutsit aningaasanut inatsimmik suliarinnittarnermut nukittorsaataasinnaasut pillugit isumaliutit.....	5
1.2.1 Aningaasanut inatsisip akuersissutigineqarnissaanut piffissaliussaq.....	5
1.2.2 Aningaasaqarnermut Ataatsimiititaliami ilaasortassanik qinersisarneq	6
1.2.3 Ingerlatsinermit aningaasartuutitik ataatsimoortumik pingaarnersiulluni tullerriiaarisarnissamik tunngavik	7
1.2.4 Ilaasortat siunnersuutaat aningaasartuuteqarnissamik kinguneqartussat	7
1.2.5 2010-mi aningaasanut inatsisissap inaarutaasup naammassineqarnissaa aammalu 2011-mi aningaasanut inatsisissatut siunnersuummik piareersaanissaq.	7
1.3. 2010-mi aningaasanut inatsisissatut siunnersuut	8
1.3.1 Aningaasaqarnikkut pingaarnerusutigut inissisimanerup naatsumik allaaserinera.....	8
1.3.2 Aningaasaqarnermut Ataatsimiititaliap ataatsimut isigalugu isummernera.....	10
1.3.3 Allanguutissatut siunnersuutit.....	10
1.4 Suliassaqaqarfinnut pingaarnernut nalinginnaasumik oqaaseqaatit	11
2. Aningaasaqarnermut Ataatsimiititaliap apeqqutai/oqaaseqaatai aalajangersimasut – suliassaqaqarfinnut agguataarlugit.....	15
2.1. Suliassaqaqarfik 10-12 – Naalakkersuisut siulittaasuat	15
2.2. Suliassaqaqarfik 20-24 – Aningaasaqarnermut Naalakkersuisoq.....	17
2.3. Suliassaqaqarfik 30 – Isumaginninnermut Naalakkersuisoq	24
2.4. Suliassaqaqarfik 34 Peqqissutsimut Naalakkersuisoq	26
2.5. Suliassaqaqarfik 40 Kultureqarnermut, Ilinniartitaanermit, Ilisimatusarnermut Ilageeqarnermullu Naalakkersuisoq.....	32
2.6. Suliassaqaqarfik 50-51 Aalisarnermut, Piniarnermut Nunalerinermullu Naalakkersuisoq.....	41
2.7. Suliassaqaqarfik 62-66 Inuusuttissarsiornermut Aatsitassanullu Naalakkersuisoq	46
2.8. Suliassaqaqarfik 70-73 Ineqarnermut, Attaveqarnermut Angallanermullu Naalakkersuisoq ..	48
2.9. Suliassaqaqarfik 77 Nunami Namminermi pissutsinut Naalakkersuisoq	50
2.10. Suliassaqaqarfik 80-89 Ineqarnermut, Attaveqarnermut Angallanermullu Naalakkersuisoq	52
3. Aningaasaliissutinut allanguutissatut siunnersuutit	57
3.1 Sammisqaq 1 - Teknikikkut allangortitsinerit.....	58
3.2 Sammisqaq 2 - Missingersuutinut sunnuteqanngitsumik allangortitsinerit.....	58
3.3 Sammisqaq 3 – Isertitassatut naatsorsuutigisat nutaat aamma inatsisitigut pisussaaffigalugit aningaasartuutissanut nutaamik naatsorsuutigilikkat.....	59
3.4 Sammisqaq 4 – Meeqqanut inuusuttunullu sillimmatinik atugassanngortitsineq.....	59
3.5 Sammisqaq 6 – Sanaartornermi nussuineq	60
3.6 Sammisqaq 7 – Ilinniartitaanermi nussuineq	60
3.7 Sammisqaq 8 – Allaffissornikkut sipaaruteqarneq	61
3.8 Sammisqaq 9 – Utaqqiisaasumik inissiaqarnerup qitiusumik aqunneqarnera	62
3.9 Sammisqaq 20 - Suleriaaseq pillugu Ataatsimiititaliap allanguutissatut siunnersuutai.....	63
4. Oqaasertaliussanut allanguutissatut siunnersuutit.....	64
5. Aningaasaqarnermut Ataatsimiititaliap kaammattuutai.....	66
6. Aningaasaqarnermut Ataatsimiititaliap inassuteqaatai	67

Ilanngussanut takussutissiaq:

- A. Aningaasaqarnermut Ataatsimiititaliap 24. september 2009-mi Naalakkersuisunut apeqqtai.
- B. Aningaasaqarnermut Ataatsimiititaliap apeqqtanaanut Naalakkersuisut 9. aamma 16. oktober 2009-mi akissutaat, tak. ilanngussaq A. (Akissummut ilanngussat qaraasiakkut Inatsisartut nittartagaat aqqutigalugu pissarsiarineqarsinnaapput)
- C. Isumasioqatigiilluni ataatsimiinnissamut Aningaasaqarnermut Naalakkersuisumut aggeqqusissut 20. oktober 2009-meersoq kiisalu tassunga atatillugu isumasioqatigiilluni ataatsimiinnissamut allakkiaq.
- D. Aningaasaliissutinut oqaasertaliussanullu Naalakkersuisut allannguutissatut siunnersuutaat 22. oktober 2009-meersut. (Allannguutissatut siunnersuutit nr. 1-206) (Aamma takuuk ilanngussaq J)
- E. Ineqarnermut, Attaveqarnermut Angallannermullu Naalakkersuisup isumasioqatigalugu ataatsimeeqatiginissaanut aggeqqusissut 23. oktober 2009-meersoq tassungalu atatillugu isumasioqatigiilluni ataatsimiinnissamut allakkiaq.
- F. Aalisarnermut, Piniarnermut Nunalerinermullu Naalakkersuisup isumasioqatigalugu ataatsimeeqatiginissaanut aggeqqusissut 25. oktober 2009-meersoq kiisalu tassunga atatillugu isumasioqatigiilluni ataatsimiinnissamut Naalakkersuisunut ilaasortap allakkiaa.
- G. 2010-mi aningaasanut inatsisissatut siunnersuummut Aalisarnermut Ataatsimiititaliap i-summersuutai 9. oktober 2009-meersut.
- H. Eqqagassalerinermik pilersaarut pillugu Avatangiisinut Eqqissisimatitsinermullu Ataatsimiititaliap saaffiginnissutaa 22. oktober 2009-meersoq.
- I. 2010-mi aningaasanut inatsisissatutut siunnersuut pillugu Kultureqarnermut Ilinniartitaanermullu Ataatsimiititaliap 12. oktober 2009-mi apeqqtai Naalakkersuisullu 26. oktober 2009-mi akissutaat.
- J. Aningaasaliissutinut oqaasertaliussanullu Naalakkersuisut allannguutissatut siunnersuutaanut naqqiutit, tak. ilanngussaq D.
- K. Suleriaaseq pillugu Ataatsimiititaliap allannguutissatut siunnersuutaanut nr. 207-imut aamma 208-mut missingersuutinut ilanngussat.

1. Aallaqqaasiut

2010-mi ukiunilu missingersuusiorfiusuni 2011-miit 2013-imut aningaasanut inatsisissatut siunnersuut Naalakkersuisunit ulloq 30. september 2009-mi saqqummiunneqarpoq.

Aningaasanut inatsisissatut siunnersuut Ilulissani august-septemberimi 2009-mi missingersuutit pillugit isumasioqatigiinnermi Aningaasaqarnermut Ataatsimiititaliamit misissorneqarpoq.

2010-mi aningaasanut inatsisissatut siunnersuummik misissuinini suliarinninninilu tunngavigalugit, Naalakkersuisunut 24. september 2009-mi allagaqarnermigut, inatsisissatut siunnersuummut apeq-qutini oqaaseqaatinilu Aningaasaqarnermut Ataatsimiititaliap nassiuppai. Kingusinnerpaamik tallimannornermi ulloq 9. oktober 2009-mi akineqarnissaq ataatsimiititaliap qinnutigaa. Naalakkersuisulli akissutaata danskisuaa pingasunngornermi ulloq 14. oktober 2009-mi kalaallisuuvalu tallimannornermi ulloq 16. oktober unnukkut kingusissukkut aatsaat tiguneqarput. Ataatsimiititaliap apeq-qutaanik taama kingusitsigisukkut akissuteqarneq Aningaasaqarnermut Ataatsimiititaliap sulineranut isumaliutissiissutillu matuma naammassineqarnissaanut kinguarsaataavoq. Tamanna naapertuutinnigilluinnartutut ataatsimiititaliamit isigineqarpoq.

Aningaasanut inatsisissatut siunnersuutit ukiumoortut naliliiviginerini Inatsisartut ataatsimiititaliaa sa tapersiuteqarnissaat Aningaasaqarnermut Ataatsimiititaliamit assut pingartinneqarpoq. Tamanna tunngavigalugu ataatsimiititaliap Naalakkersuisunut aallarniutaasumik apeqqutaasa taamatullu Naalakkersuisut akissutaasa nuutinneri Inatsisartut ataatsimiititaliaannut ataatsimiititaliamit nassiunneqarput. Aningaasanut inatsisissatut siunnersuutit saqqummiunneqartup naliliiffiginissaanut taama periarfissinneqarneq ataatsimiititalianit ataasiakkaanit ilassilluarneqarpoq. Tamanna tunngavigalugu paasisutissat amerlasuut Aningaasaqarnermut Ataatsimiititaliamit Naalakkersuisunillu atorluarneqarsinnaasut Inatsisartut ataatsimiititaliaannit saqqummiunneqarput.

Periarfissaq iluatsillugu aningaasaliisarnermut tunngasuni inatsisitigut tunngavik Namminersorerullutik Oqartussat missingersuutaanni (missingersuusiornermut inatsit), Inatsisartut Naalakkersuisullu pillugit inatsimmi kiisalu missingersuusiornermut malittarisassami 2008-meersumi taamanilu Aningaasaqarnermut Naalakkersuisunit nassiunneqartumi takuneqarsinnaasoq Aningaasaqarnermut Ataatsimiititaliap ataatsimiititalianut erseqqissaatigaa. Ataatsimut isigalugu aningaasanut inatsimik akuersissutigineqartumik Inatsisartut paasisimasaqarnerannut, ilisimasaqarnerannut sunniuteqarnerannullu tamanna patajaallisaataasutut Aningaasaqarnermut Ataatsimiititaliamit isigineqarpoq. Aningaasanut inatsisissatut siunnersuummik suliarinninnermi Inatsisartut ataatsimiititaliaat Naalakkersuisut siunnersuutit saqqummiussaanni allannguutigittinneqartut iluarsissutillu ilaanni peqataasinnaappata pitsaasuvoq, taamaalillunimi taanna annertunerusumik tassaalissammat *Inatsisartut* aningaasanut inatsisaat.

Suliassamik agguataarineq naapertorlugu Naalakkersuisut inatsisissatut siunnersuummik saqqummiussisussaapput, Inatsisartulli taassuminnga sukumiisumik suliarinnittussaallutik, taamaaliornerminnilu Inatsisartunit allannguutigittitassatut kissaatigineqartut ingerlanneqarnissaat ilanngullugu qulakkiissallugu.

Aningaasanut inatsisissatut siunnersuutit Inatsisartunit aappassaaneernejarnissaanut Aningaasaqarnermut Ataatsimiititaliap matumuuna isumaliutissiissuteqarpoq.

1.1 Aningaasanut inatsisissatut siunnersuutip ilusiligaanera aningaasaliisarnermilu maleruagassat

Aningaasanut inatsisissatut siunnersuutip ilusiligaanissaa missingersuutit pillugit inatsimmi kapitali 2-mi 3-milu pingaarnertut aalajangersaavigineqarpoq. Aalajangersakkami tassani allassimasuni allassimavoq aningaasanut inatsisissatut siunnersuutip inatsisissatut siunnersuutit allat assigalugit imarigai inatsisit oqaasertaat nassuiaatitallit.

Inatsisip oqaasertaanut ilaapput aningaasaliissutininut takussutissaq Ilanngussaq 1-imiittoq aammalu oqaasertaliussat Ilanngussaq 2-miittut.

Nassuiaatinut ilaapput oqaasertaliussanut nassuiaatit, angusanut kontonullu pingaarnernut takussutissiat kiisalu missingersuutininut ilanngussat.

Nassuiaatit ilusiligaanissaannut piumasaqaatinut erseqqinnerusumik nassuiaatit eqqarsaatigalugit missingersuutit pillugit inatsimmi kapitalit taaneqartut innersuussutigineqarput. Missingersuutinullu ilanngussanut tunngatillugu oqaatigineqassaaq taakku imarimmatigit kontoni pingaarnerni ataasiakkaani aningaasaliissutininut tunngavissat erseqqinnerusut.

Taamaalillunilu aningaasanut inatsisissatut siunnersuutip inatsisissatut siunnersuutininut allanut sanilliulluni ilaatigut allaanerussutigaa missingersuutininut ilanngussat ilusiligaanerannut allannguutissatut siunnersuutininik saqqummiussisoqarsinnaanera, naak taakku oqaatigineqareersutut inatsisip oqaasertaanut nassuiaatit ilusiligaagaluartut.

2008-mi ilassutitut aningaasaliissutininut inatsisissatut siunnersuummut, Inatsisartut 2009-mi ukiakut ataatsimiinneranni aamma oqaluuserineqartumut isumaliutissiissutini ataatsimiititaliap aamma innersuussutigaa. Suliassaqarfik taanna pingaaruteqaqisoq pillugu minnerunngitsumik Inatsisartunut ilaasortannorlaat ilisimasaqalernissamut periarfissinneqarnissaat siunertaralugu ilassutitut aningaasaliissutininut inatsisissatut siunnersuummut isumaliutissiissummi aningaasaliissuteqartarnermi male-ruagassat nassuiaatigineqarput.

1.2 Iliuutsit aningaasanut inatsimmik suliarinnittarnermut nukittorsaataasinnaasut pillugit isumaliutit

1.2.1 Aningaasanut inatsisip akuersissutigineqarnissaanut piffissaliussaq

Aningaasanut inatsit kingusinnerpaamik ulloq 15. november akuersissutigineqassasoq missingersuusiornermut inatsimmi § 10-mi allaqqavoq.¹ Aalajangersakkamut nassuiaatit malillugit taama piffissaliussineq pivoq kommunit missingersuusiornissaat eqqarsaatigalugu, tassa aningaasat ukiuannut tullermut kommunit missingersuutaat kingusinnerpaamik 1. december akuersissutigineqareertussaammata. Taamatut pituttuineq sulii pisariaqarnerisooq ullutsinnullu naleqqunnersooq isumaliutigineqartariaqarpoq. Ukiumi aggersumi kommunit isertitariumaagassaat majip qaammataata misaani ilisimaneqalereertarput.² Tamatuma saniatigut kommuninik iluarsaaqqinnermi allaffissorner-

¹ Aammalu Inatsisartut Naalakkersuisullu pillugit Inatsisartut inatsisaanni § 23, imm. 2-mi.

² Tamanna Aningaasaqarnermut Ataatsimiititaliap apeqqutaanut 3.19a-mut Naalakkersuisut akissutaanni allaqqavoq, tassani ilaatigut ima allaqqalluni: "... Majip naalernerata missaani ukiumut tulluuttumut naalagaaffiup ataatsimoortumik tapiissutaata annertussusissavia ilisimaneqalissaaq, tassungalu attuumassutilik kommuninut ataatsimoortumik tapiissut ataatsimoorullugulu kommunit akileraarutitigut isertitassaat kiisalu selskabit iluanaarutillu akileraatutaat. Aammattaq ukiumut tulluuttumut misingersuutininut ilaatereerlugu Namminersortut toqqaannangitsumik akileraarutitigut isertittagai

mik ataatsimoortitsinerup nukittorsaanerullu nassatarisaanik aningaasatigut atugassarisat, missingersuusionerup nalaani ilisimaneqartut, aallaavigalugit kommunit ullumikkut missingersuusioninnaasariaqarput, tamatumani apeqqutaatinnagu aningaasanut inatsit akuerineqarsimanersoq akuerineqarsimannginnersorluunniit. Taamaalillunilu aningaasanut inatsisip kingusinnerpaamik 15. novemberimi akuersissutigineqarsimanissaa siusinnerusutulli pisariaqartinneqarsorinangilaq.

Inatsimmi piumasaqaataasumik tamatuminnga saneqqutsinermikkut Inatsisartut Naalackersuisullu inatsisissatut siunnersuummik sukumiinerusumik piareersaallutillu suliarinninnissaminnut piffissaqarnerulissapput, taamaaliornikkut suliat pitsaanerulersinneqarsinnaapput aammalu kukkusinnaaneq nunattalu karsiata aningaasaataanik naapertuutinngitsumik pingaarnersuilluni tullerriaarisinnaaneq killilersimaarneqarsinnaapput. Tamanna Inatsisartut sivisunerusumik ataatsimiittarnissaannik naalackersuineramik suliaqartut kissaateqarnerannut aamma naapertuuppoq.

Tamanna tunngavigalugu suliaq naliliiffigeqqullugu aammalu ajornanngippat ataatsimiititaliap siuliani allassimasutut isummiussaanut naapertuuttumik UPA 10-mi inatsisissatut siunnersuummik saqqummiusseqqullugit Naalackersuisut Aningaasaqarnermut Ataatsimiititaliamit **kaammattorneqarput**.

1.2.2 Aningaasaqarnermut Ataatsimiititaliami ilaasortassanik qinersisarneq

Inatsisartut suleriaasianni § 7 naapertorlugu Aningaasaqarnermut Ataatsimiititaliaq ataatsimiititaliat allat inatsit malillugu pilersinneqartussaataitasut assigalugit Inatsisartut inissitsiterlutik ataatsimiinneranni aammalu Inatsisartut ukiuata aallartinnerani pilersinneqassaaq. Taamali ilusiliisimaneq suli naleqqunnersoq isumaliutigineqartariaqarpoq.

Inatsisartut Naalackersuisullu pillugit Inatsisartut inatsisaanni § 16, imm. 1 naapertorlugu Aningaasaqarnermut Ataatsimiititaliaq aningaasanut inatsisissatut siunnersuut pillugu isumaliutissiisuteqarnissamut pisussaaffeqarpoq. Sulineq taanna aningaasanut inatsisissatut siunnersuut saqqummiunneqarniariartoq (ilaatigullu taanna sioqqullugu) aallartinneqartarpoq, tamannalu nalinginnaasumik pisarpoq augustip qaammataata aallartinnerani/qiteqqunnerani. Taamaalillunilu Inatsisartut siullermeerineranni siunnersuummik ataatsimiititaliamut innersuussinissaat ataatsimiititaliamit u-taqqineqarneq ajorpoq.

Ukiakkut ataatsimiinnerup aallartinnerani ataatsimiititaliap nutaamik inissitsiternissaanik suleriaat-simi piumasaqaat siuliani taaneqartoq taamatut suleriaaseqarnermut naapertuutinngilaq. Taamatut ataatsimiititaliap nutaamik inissitsiternerata ataatsimiititaliami ilaasortat amerlanerit taarserneqarnerannik ilaqartup kingunerisarpaa sulinerup aallartereersup pisariaqannngitsumik ajoqusersorneqarnera. Tamanna naalackersuinermut tunngasunik pissuteqartumik soorunami ilaatigut saneqqunneqarsinnaaneq ajorpoq.

Ajornartorsiut taassuma assinga Kukkunersuinermut Ataatsimiititaliamut qularnanngitsumik aamma atuuppoq.

Ataatsimiititaliat inatsit malillugu pilersinneqartussaataitasut ukiakkut ataatsimiinnerup aallartinnerani nutaamik inissitsitertarnissaannik piumasaqaatip allanngortinneratigut ajornartorsiut taaneqar-

pigineqarput kiisalu nunamut tamarmut toqqaannartumik akileraarutitigut isertittakkat, taakkulu naleqqiunnerisigut kommunit akileraarutitigut toqqaannartumik isertitassaat missingersuutinullu ilanngunneqartussat naatsorsorneqarsinnaanerannut atornerqarsinnaasoq.”

toq pisariitsumik aaqqinneqarsinnaavoq. Assersuutigalugu Inatsisartut *upernaakkut ataatsimiinneranni*, tassungaluunniit taarsiullugu ukiakkut ataatsimiinnerup *ulluani kingullermi* taamatut inissitsiterneq ingerlanneqarsinnaappat pitsaassaaq.

Apeqqut taanna isumalutigeqqullugu pisariaqarpallu Inatsisartut suleriaasiannut allannguutissatut siunnersuummik saqqummiusseqqullugu Inatsisartut Siulittaasoqarfiat Aningaasaqarnermut Ataatsimiititaliamit **kaammattorneqarpoq**.

1.2.3 Ingerlatsinermit aningaasartuutininik ataatsimoortumik pingaarnersiulluni tullerriaarisarnissamik tunngavik

Ataatsimoortumik pingaarnersiulluni tullerriaarisarnermik periuseqarneq aningaasaqarnitta pilersaarusiorneqarnerani pingaarnertut tunngaviuvoq. Aningaasaqarnitta pilersaarusiornera paasilertoruminartumik ingerlallugulu inuiaqatigiit aningaasatigut pisinnaasaannut naleqqussakkamik aningaasartuutigit aqutsivigisinnaassagutsigit periuseq taanna aalajangiusimasariaqarparput.

Ingerlatsinermit aningaasartuutaasartut qaffaavigigutsigit kingusinnerusukkut apparteqqinniarnarat ajornakusoortorujussuussaaq - taamaaliornissaaq tullerriaarisimanermik allanngortiterinissamik kinguneqartussaavoq, tamannalu inuit ulluinnarni inuunerannut malunnaatilimmik sunniuteqassalluni. Aammattaaq soqutigisaqatigeeqartuussaaq ingerlatamik iluanni ingerlatsinermit aningaasartuutit appartinneqarnissaannut akerliusunik.

Misilittakkat tunngavigalugit nalunngilarput tapiissuteqartarnermik aqqissuussinerit ikilileriffiginissaat allaffissornikkullu aningaasartuutit appartinneqarnissaat qanoq ajornartigisut. Allaallumi ingerlatsinermit aningaasartuutit qaffatsaaliorneqarnissaannaalluunniit unammillernartuuvoq.

Taamaattumik aningaasanut inatsimmi naatsorsuutigineqartumit amerlanerusunik ingerlatsinermit aningaasartuuteqarnissamik aalajangernissaaq sioqqullugu Inatsisartut Naalakkersuisullu sukumiisumik isumaliutiginneqqaartarnissaat aalajangiisuusumik pingaaruteqarpoq.

1.2.4 Ilaasortat siunnersuutaat aningaasartuuteqarnissamik kinguneqartussat

Aalajangiiffigisassatut siunnersuutit aningaasatigut kinguneqaatillit tunngavilersuutitaanni kinguneqaatissanut taakkununga nassuiaammik ilanngussisarnissaaq Inatsisartunut ilaasortanut Inatsisartut Siulittaasoqarfiata arlaleriarluni kaammattuutigaa, tamatumani aningaasalersuinissamut siunnersuutit pinngitsoorani ilanngunneqartariaqanngillat. Oqaatigineqartariaqarporli ilaasortat siunnersuutaat amerlanngutsuinnaat paasissutissanik taama ittunik ilaqartinneqartarmata. Taamaalilluni Inatsisartut aalajangiinissamut tunngavissaat annikillisinneqartarpoq aammalu nunatta karsiata aningaasaataanik taamungaannaq tullerriarisoeqarnissaa aarleqqutigineqarsinnaalluni. Tamanna naapertuutinnilaq. Taamaattumillu Siulittaasoqarfiup kaammattuutaanik malinninniarneroqqullugit Inatsisartunut ilaasortat Aningaasaqarnermut Ataatsimiititalimit kaammattorneqarput.

1.2.5 2010-mi aningaasanut inatsisissap inaarutaasup naammassineqarnissaa aammalu 2011-mi aningaasanut inatsisissatut siunnersuummik piareersaanissaaq.

Paasissutissat aalajangersimasut 2010-mi aningaasanut inatsisissami inaarutaasumi imaluunniit 2011-mi aningaasanut inatsisissatut siunnersuummi ilanngunneqarnissaat allanngortinneqarnissaluunniit Aningaasaqarnermut Ataatsimiititaliamit taparserneqartoq isumaliutissiisummi piffinni arlalinni allassimavoq. Assersuutigalugu aningaasanut inatsisissatut siunnersuutip ilusiliinikkut iluarsisuteqarfigineqarnissaata allannguutissatut siunnersuuteqarnikkut pinissaa pisariaqanngitsoq

nalilerneqartillugu imaluunniit iluarsiinissaq kissaatigineqartoq paasissutissatigut tunngaviit amigaataanerat pissutigalugu pisinnaatinnagu Aningaasaqarnermut Ataatsimiititaliaq taama qinnuignittarpoq.

Oqariartuutit taamaattut Naalakkersuisunit apeqqusiinertaqanngitsumik tusaatissatut tiguneqartarnissaat aningaasanullu inatsimmi iluarsiiissutissat kissaatigineqartutut pisarnissaat Aningaasaqarnermut Ataatsimiititaliamit soorunami naatsorsuutigineqarpoq. Allannguutissatut kissaatigineqartoq naatsorsuutigineqaraluartutut pisinnaanngitsutut naapertuutinngitsutulluunniit Naalakkersuisut isigippassuk Naalakkersuisut akissuteqaataanni tamanna ersarissumik oqaatigineqassasoq ataatsimiititaliamit naatsorsuutigineqarpoq. Naalakkersuisut nalunaaruteqanngippata tamanna ataatsimiititaliap oqariartuutaanik Naalakkersuisut pituttuisumik akuersinerattut Inatsisartunit, tassunga ilanngullugu Aningaasaqarnermut Ataatsimiititaliamit isigineqassaaq.

Aammattaaq 2011-mi aningaasanut inatsisissatut siunnersuummut atatillugu naalakkersuisoqarfiit missingersuutinik piareersaaneranni Aningaasaqarnermut Ataatsimiititaliap isumaliutissiissutaata tamatigut ilanngunneqartarnissaa ataatsimiititaliamit **kaattuutigineqassaaq**, taamaalilluni aningaasanut inatsisissatut siunnersuummi ilusiliinikkut amigaatit ersarissut ukiumit ukiumut ataatsimiititaliamit uparuarneqartariaarullugit. Tassunga atatillugu aningaasanut inatsisip suliarineqarnerani ataqatigiissaarisooqartarnissaa, taamaalillunilu taaguutit oqariartaatsillu assigiissaakkat siunnersuummi sapinngisamik atorneqartarnissaa kissaatigineqarmat ataatsimiititaliamit oqaatigineqassaaq.

1.3. 2010-mi aningaasanut inatsisissatut siunnersuut

1.3.1 Aningaasaqarnikkut pingaarnerusutigut inissisimanerup naatsumik allaaserinera

Nunat tamalaat akornanni aningaasaqarnikkut suleqatigiiffiup OECD-p marts 2009-mi naliliinera malillugu nunarsuarmi aningaasaqarneq 1945-p kingorna 2009-mi aatsaat taama ajortigissaaq. Aningaasarliornermik tamatumingga nunarput aamma eqqugaavoq.

Nunattali aningaasaqarnerata tamakkiisup ilaa annertoq Naalagaaffiup nunatsinnut ataatsimoortumik tapiissutaanit pissarsiarineqartarpoq, tamannalu aningaasarliornerup sunniutaanut tamakkiisuunngikkaluamik illersuutaavoq.

Aningaasarliornerup nassatarisaanik nunat tamalaat aningaasalersuisarfii aqutigalugit aningaasalersuinissamut periarfissat killeqalernerat pissutigalugu Royal Greenland A/S-imut 2009-mi immikkut aningaasaliissuteqartariaqarnikkut ilaatigut takutinneqarpoq illersugaaneq taanna tamakkiisuunngitsoq. Suliffeqarfiit anginerit kiisalu suliniutit annertuut, tassunga ilanngullugit aatsitassarsiornermik suliniutit avataanit annertuumik aningaasalersuinermik tunngaveqartut eqqarsaatigalugit ajornartorsiut taanna 2010-mi aamma atuuteratarsinnaavoq.

Aalisakkanit tunisassanik nunatsinnit avammut nioqquteqarneq aningaasarliornermit manna tikillugu annertunerusumik sunnerneqarsimasorinangilaq. Raajat avammut nioqqutissat akitsuummik akiliuteqaataasussaataasut tuneqarnerminni kilomut akiat aalaakkaalluni 16 kr.-it missaanniissimavoq³. Aningaasarliornerup minnerunngitsumik inuulluarniutit sivisuumik atasartut piumaneqar-

³ Raajat tunineqarnerminni akiat raajat avammut tunisat akiannut, Naatsorsueqqissaartarfimmit naatsorsorneqartartumut paarlaanneqassanngilaq. Raajat avammut tunisat agguaqatigiissillugu akiat aningaasanut inatsisissatut siunnersuummut nalinginnaasumik nassuiaatini tabel 1.4-mi takuneqarsinnaavoq. Ilisimasat malillugit Naatsorsueqqissaartarfiup

nerisa aningaasaleerusussutisillu annikilleriarnerannik kinguneqarnissaanik naatsorsuutiginninnermut tamanna naapertuuppoq. Aalisagartassiissutilli aningaaqarnermut pingaaruteqarnerpaat, tassunga minnerunngitsumik ilaallutik raajat qalerallillu biologit siunnersuinerat tunngavigalugu ikilineqarnissaannik naatsorsuutiginninnermit 2010-mi aalisakkanit tunisassianik avammut tunisat eqqornerlunneqarsinnaapput.

Takornariaqarnermit 2010-mi isertitat aningaasarliornerup nassatarisaanik aamma ikileriarneqarsaat aamma ilimanarluinnarpoq.

Pitsaaqutaasutilli taaneqartariaqarpoq nunatsinni inissiaqarnerup aningaasarliornermit annertunerusumik sunnigaanissaa suli ilimananngimmat. Tamatumunnga pissutaavoq nunatsinni inissianut taarsigassarsiat amerlanerpaat tamarmilluunniit aalajangersimasumik ernilialittut taarsigassarsiaritinnerqartarmata, soorluttaaq nunatsinni aningaaseriviit tunngaviusumik isigalugu patajaatsuusut. Tamatumama saniatigut Europap kitaani, tassungalu ilanngullugu Danmarkimi⁴ sanaartortut unikaallannerat sanaartornermut atortussat nunatsinnut eqqussukat akikinnerulernerannik nunatsinnilu sanaartugassat nunat tamalaanit soqutigineqarnerulernerannik nassataqarsinnaasutut isikkoqarpoq. Tamanna pisortat akikinnerusumik sanaartorsinnaalernerannut peqataaqataasinnaavoq.

Aningaasanut inatsisissatut siunnersuutip tamakkiisumik sunniutissai annertusiartuaartussatut Naalakkersuisunit nalilerneqarpoq (apeqqut 2.1d-imi). Minnerunngitsumik aningaasanut inatsisissatut siunnersuutip sanaartornermut aningaasaliissutitai taama annertusiartuaarnissaanut pissutaasussatut oqaatigineqarput. Aningaasaqarnikkut inassisimanerup taamaannerani suliffissat aalajangiusimaneqarnissaat aammalu aningaasaqarnerup annertunerusumik kinguarfiunissaanik aarleqquteqarsinnaanerup killilersimaarneqarnissaa siunertaralugit aningaasaqarnikkut politikkip ingasaassinngitsup ingerlanneqarnissaa naapertuuttoq Aningaasaqarnermut Ataatsimiititaliaq isumaqarpoq.

Namminersorlutilli Oqartussat akiitsutigut pisussaaffiisa aamma eqqumaffiginissaat tunngavissaqarpoq. Ukiuni makkunani IST-mi amigartoorutit nunatta karsiata aningaasaataanut tigoriaannarnut arlaannut pituttugaanngitsunut malunnaatilimik ikilisaataapput. Taamaallutillu Naalakkersuisut nalunaarutigaaat piffissap 2010-2013-ip ingerlanerani 600-800 mio. kr.-it tikillugit nunanit allanit taarsigassarsiniarnissaaq naatsorsuutigineqartariaqartoq. Ukiut amerlanngitsut immaqa ukiut 5-8-t ingerlaneranni taarsigassarsiat akilersornissaat, tamatumalu kingorna aningaasalersuutaqqittussanik taarsigassarsinissaaq naatsorsuutigineqarpoq. Taamatut taarsigassarsiniarneq nangaassuteqalaartumik Aningaasaqarnermut Ataatsimiititaliamit taperserneqarsinnaavoq, tassa suliaqarfinni arlalinni pisortat sullississutaat qitiusut annikilliliiffigeqqinnagit minnerunngitsumik erngup nukinganik nukissiorfeqarnermi aningaasaliissutissat annertussusissaatut kissaatigineqartup attatiinnarneqarnissaannut periarfissamik allamik naalakkersuinermik suliaqartunit annertuumik isumaqatigiiffiusumik peqanngimmat. Assersuutigalugu ingerlatsiviit Naalagaaffimmit nunatsinnut nuunneqarnissaannut

naatsorsuineranut tunngaviusarput avammut annissinissamut akuersissutit umiarsuaatileqatigiit nunanut allanut tunisinerminnut atatillugu tunniussaat. Avammut annissinissamut pappilissani ilaatigut nioqqutissat suuneri, annertussusiat nalingallu allaqqassapput. Nalingatali imaanngilaq assigigaa nioqqutissap tunineqarnermini akia, nioqqutissammi tunineqartigat amerlasuutigut Danmarkimut ingerlateqqinneqartarmata, taamaattumillu naligitinneqartutut allassimasooq tassaasarluni "naligitinneqarallartoq" tassaananilu naliviusooq. Tamatumama saniatigut raajat Flemish Capimi pisarineqartut Naatsorsueqqissaartarfiup kisitsisaani ilaatinneqartarput. Raajat taakku akitsuusigaanngillat, raajanillu nunatsinneersunit minnerujussuusarmata akikinninngorlugit tunineqartarput, tamannalu agguaqatigiissillugu akiusumut appariaataasarpoq.

⁴ Unikaallanneq AE-p oktober 2009-mi misissueqqissaarnera naapertorlugi takutinneqarpoq 2004-p aallartinnerani akit kingullermik appasinnerpamiinneranni sulisut amerlassusiannit 2009-mi kvartalip pingajuanni sanaartornermik suliaqartut ikinnerunerisigut.

imaluunniit innuttaasunik sullissinermik pitsannorsaaniissamut aningaasatigut tunngavissaqarnissap pilersinneqarnissaa siunertaralugu ukiut arlaqanngitsut ingerlaneranni Namminersorlutik Oqartussat imminnut aningaasalersorsinnangoqqinnissaat pingaartitatut Naalakkersuisut ersarissumik anguniagarisariaqaraat erseqqissassallugu tunngavissaqartoq ataatsimiititaliaq isumaqarpoq.

Taatuttaaq innuttaasut pisortanut akiitsuusa annertussusiat eqqumaffigineqartariaqarpoq. Innuttaasut pisortanut tamakkiisumik akiitsui 900 mio. kr.-iusut, tamatumalu naligigaa nunatsinni inuit tamarluinnarmik agguaqatigiissillugu 16.000 kr.-it sinnerlugit akiitsoqarnerat Naalakkersuisut paasissutissiissutigaat.⁵ Akiitsut taakku ilaat annertuallaarujussartoq akileerusussuseqannginnermik pissuteqarpoq. Ataatsimiititaliatut akisussaassuseqartut ilaatigut innuttaasut pisortat karsiinut tamatta pigisatsinnut akisussaassuseqarnerusumik pissusilersornissaat, ilaatigullu akiitsullit akileerusussuseqannginnermik pissutigerpiarlugu kinguaattooruteqartut annertunerusumik piffissaatillugulu akiliisinniarneqartarnissaat Naalakkersuisunit qulakkeerneqartassasoq Aningaasaqarnermut Ataatsimiititaliamit kaammattuutigineqarpoq. Tamanna kommunit taamatullu Nunatta Karsiata pisariaqartumik patajaallisarneqarnissaannut peqataaqataasinnaavoq.

Kalaallit Nunaata Aningaasaqarnera pillugu Siunnersuisartutut Ataatsimiititaliap akit nikerarnerannut pissutsit pillugit nassuiaataat aamma innersuussutigineqarpoq.

1.3.2 Aningaasaqarnermut Ataatsimiititaliap ataatsimut isigalugu isummenera

Naalakkersuisut 2010-mi aningaasanut inatsisissatut siunnersuutaat tapersernerlugu tapersinnginnerlugulu Aningaasaqarnermut Ataatsimiititaliap maanna oqaatigisinnaanngilaa. Aningaasanut inatsisissatut siunnersuut pillugu inassuteqaatini inaarutaasoq pingajussaaneerinissamut ilassutitut isumaliutissiissummini ataatsimiititaliap saqqummiutissavaa.

Taamaattorli allannguutissatut siunnersuutit Naalakkersuisunit Aningaasaqarnermut Ataatsimiititaliamut nassiunneqartut amerlanersaat Aningaasaqarnermut Ataatsimiititaliamit taperserneqarsinnaapput. Siunnersuutit Aningaasaqarnermut Ataatsimiititaliamit isumaqatigineqanngitsut siunnersuutilluunniit Naalakkersuisut siusinnerusukkut paasissutissiissutigisaat naapertorlugit amigaatiginarsorinartut isumaliutissiissummi kingusinnerusukkut taasaqarfigineqassapput.

1.3.3 Allannguutissatut siunnersuutit

Aningaasanut inatsisissatut siunnersuummik Inatsisartut siullermeerinerat tunngavigalugu Naalakkersuisut sisamanngornermi ulloq 22. oktober 2009, nal. 15.00 allannguutissatut siunnersuutit 206-it kalaallisut danskisullu nassiuppaat.

Aningaasaliissutinut taamatullu *oqaasertaliussanut* allannguutissatut siunnersuuteqartoqarpoq. Allannguutissatut siunnersuutit isumaliutissiissummut ilanngussaq D-tut ilanngunneqarput. Allannguutissatut siunnersuutit taakku ilannut naqqiutit kingusinnerusukkut nassiunneqarput. Naqqiutit taakku allannguutissatut siunnersuutaqqaartut taarserpaat. Naqqiutit isumaliutissiissummut ilanngussaq J-itut ilanngunneqarput. Isumaliutissiissummi immikkoortoq 3 aamma 4 ilanngullugit innersuussutigineqarput.

Naalakkersuisut allannguutissatut siunnersuutaannut Aningaasaqarnermut Ataatsimiititaliap inassuteqaatai isumaliutissiissummi matumani immikkoortuni 4-mi 5-imilu takuneqarsinnaapput.

⁵ Aningaasaqarnermut Naalakkersuisup paasissutissiissutai naapertorlugit. Ilangussaq C innersuussutigineqarpoq, apeqqut 6a.

2010-mi aningaasanut inatsisissatut siunnersuutip Inatsisartunit aappassaaneerseqarnissaani Naalakkersuisut allannguutissatut siunnersuutaasa tamakkiisut sunniutissaat 2010-mi ingerlatsinermut, sanaartukkanut, taarsigassarsiarititanullu inernerusussatut missingersuutininut, IST-mi uninngasut inerneranut 28.905.000 kr.-inik ajorseriaataassaaq. Allannguutissatut siunnersuutit IST-mi sunniutaat tamarmiusut takussutissiami matuma kingulianiittumi takuneqarsinnaapput.

	 AIS 2010	 M 2011	 M 2012	 M 2013
	(1000 kr.)	(Mio. kr.)	(Mio. kr.)	(Mio. kr.)
IST – Aningaasanut inatsisissatut siunnersuutaqqaartoq	225.600.000	122,5	138,1	27,2
IST – allannguutissatut siunnersuutitigut allannguut	28.905.000	35,2	35,2	35,2
IST nutaaq	254.505.000	157,7	173,3	62,4

Taamaalillunilu aningaasanut inatsisip 2010-mi inernerata tassaassaaq **254,5 mio. kr.-inik amigartoorneq**.

Naalakkersuisut allannguutissatut siunnersuutaannut Aningaasaqarnermut Ataatsimiititaliap inassuteqaatai *missingersuutininut sunniuteqaanngillat*.

1.4 Suliassaqarfinnut pingaarnernut nalinginnaasumik oqaaseqaatit

Nunanut allanut, aningaasaqarnermut, akileraartarnermut aammalu nunami namminermi pissutsinut tunngasut pillugit isumaliutissiisummi immikkoortoq 2 innersuussutigineqarpoq.

Ilaqutariinnermut tunngasut

Ilaqutariinnermut tunngasuni paaqqinniffinnik angerlarsimaffinnillu il.il. naatsorsuutigeqqaakkatut 1. januar 2010-mi kommunerujussuanngortunut annertunerusumik nuussisoqassanngilaq. Taamaatorli suliassaqarfiit minnerit ataasiakkaat, soorlu PPR, 2010-p qiteqqunnerani nuunneqartussatut isumaliutissiisutit atsiorneqarnerata nalaani naatsorsuutiginerput. Tamatumani kommunit Naalakkersuisullu atugassarititaasut pillugit isumaqatigiissuteqarnissaat pisariaqarpoq. Tamatuma saniatigut suliniutinik meeqqanut inuusuttunullu immikkut sammititanik aallartitsinissaq siunertaralugu suliassaqarfimmut 25 mio. kr.-inik aningaasaliisoqarnissaa ukioq kingullermut sanilliullugu Naalakkersuisut siunnersuutigaat. Tamanna naammaginartutut ataatsimiititaliamit isigineqarpoq, tamatumani oqaatiginerqassaaq aningaasat taakku pilersaarut sukumiisumik piareersagaq naapertorlugu atornerqarnissaat ataatsimiititaliamit naatsorsuutiginerqarmat, taamaaliornikkut allaffissornikkut missingersuutini “putut” matunissaannut aningaasat atornerqarqunagit.

Peqqissutsimut tunngasut

Peqqinnissamut tunngasuni utaqqisunut allatsissimasut suli sukkasumik amerliartorsorinarput. Utaqqisulli ikilisarnerqarnissaannut immikkut ittumik iliuuseqarnissamut aningaasaliisoqarpoq. Aningaasaqarnermut Ataatsimiititaliaq aqutugalugu ilassutitut aningaasaliissuteqarnikkut taama suliniarneq 2009-p ukiaanili aallartinneqarpoq. Utaqqisulli ikilisarnerqarnissaannut immikkut ittumik suliniuteqarnikkut tassuuna Peqqinnissaqarfimmi naammassisaqarsinnaassutsikkut tunngaviummik ajornartorsuutit aaqqinneqarnavianngillat, taamaattumillu immikkut suliniuteqarneq ingerlanneqareerpat utaqqisut amerliartoqqilernissaat naatsorsuutiginerqartariaqarpoq.

Peqqinnissaqarfik aningaasaqarnikkut annertuumik suli ajornartorsiorsorinarpoq, tamatumunngalu taartaasartoqarfiit aqputigalugit piffissami sivikitsumi sulisuusartunut annertooujussarmik aningaasartuuteqartuarnermik, nakorsaatinut aningaasartuutit qaffakkiartornerannik, pinasuartumik angallassisariaqartarnerit, napparsimasut amerliartornerat il.il. pissutaanerarneqarput. Nunatsinni peqqissaaveqarfinnik aqutsinikkut nutaamik aqqqissuussineq kiisalu telemedicinimik atuinerup siaruarnissaa aningaasartuutit amerliartornerannut unikaallatsitsissasut Naalakkersuisut neriuutigaa. Tamanna qanoq piviusorsioriginersooq maanna suli qularnaatsumik oqaatigiuminaappoq.

Tassunga atatillugu Peqqinnissaqarfiup iluani siunissami aningaasartuuteqarnissamik pisariaqartit-sinerit killilersimaarneqarnissaannut pinaveersaartitsinikkut suliniuteqarnerup ingerlatiinnarneqarnissaa pingaaruteqarmat Aningaasaqarnermut Ataatsimiititaliamit immikkut maluginiaqquneqasaaq.

Avatangiisinut tunngasut

2010-mi aningaasanut inatsisissatut siunnersuut naapertorlugu avatangiisinut tunngasuni suliniutini nutaanik annertunerusumik ingerlatsisoqalersaannigilaq. Avatangiisinik eriaqinninnissaq eqqarsaatigalugu suliaasaqarfimmi kinguaattoorutit annertunerat ajuusaarnartutut oqaatigineqartariaqarpoq. Eqqagassalerinermut pilersaarut ukiut arlallit matuma siornatigulli piviusunngortinneqartussaagaluartoq maanna ima iluseqarpoq Inatsisartunit oqaluserineqarnissaminut naleqqulluni. Suliasamulli tamatumunnga ukioq manna aningaasanik aamma immikkoortitsisoqarsinnaangitsooq Naalakkersuisut isumaqarsimapput.

Ilinniartitaanermut tunngasut

Ilinniartitaanermut annertuumik iliuuseqarfigineqarnera 2006-imi aningaasanut inatsisikkut Inatsisartunit aningaasatigut tunngavissinneqartoq 2010-mi aningaasanut inatsisissatut siunnersuutikkut aalajangiusimaneqarpoq. Piginnaaniliisumik ullumikkut ilinniagaqarsimanatilluunniit piginnaangorsarsimangitsut 26.000-it missaanniittut ilinniagaqalernissaat kiisalu inuusuttut piginnaaniliisumik ilinniagaqalersartut amerlanerulersinnissaat ilinniartitaanikkut immikkut suliniuteqarnermi naluneqanngitsut siunertarineqarpoq. Inuusuttut 2020-mi 2/3-iisa piginnaaniliisumik ilinniagaqarsimalutik ilinniartitaanermik qimatsisarnissaat anguniarneqarpoq.

Ilinniartitaanermut salliutillugu suliniutigineqarnissaa pisariaqarlunnarpoq, tamatumali peqatigisaanik aningaasat immikkoortinneqartut Namminersorlutik Oqartussani allaffissormik annertunerusumik pilersitsinermut atorneqaratik ilinniartitaanermut atorneqarnissaat eqqumaffigissallugu pisariaqarpoq. Tamatumani saniatigut suliaasaqarfiup iluani aningaasaliissutinik aqutsinermik angusanillu eqqumaffiginnineq ingerlaannartariaqarpoq. Taamaalillunilu inuusuttut 1991-imi 1992-imilu inuusut ilaat 58 %-init ikinnerunngitsut meeqqat atuarfiannik 2008-mi naammassinninnermik kingorna ilinniarnermik aallartitsisimangitsut Aningaasaqarnermut Ataatsimiititaliap paasivaa. Tamanna ajorpallaaqaq.

Aalisarnermut piniarnermullu tunngasut

2009-mi aningaasanut inatsimmut sanilliullugu aalisarnermut piniarnermullu tunngasuni aningaasaliissutit annertussusiat allanngungaarsimangilaq. Allannguulli malunnaateqarnerpaaq tassaavoq aalisarnermik nakkutilliinermi 2010 aallarnerfigalugu atuisunik tamakkiisuunngikkaluamik akiliuteqartitsisalerinikkut isertitaqarnissaq missingersuutigineqarmat. Tamatumani aalisarnermut inatsisip allanngortinneratigut inatsisitigut tunngavissinnissaq pisariaqarpoq.

Suliffeqarnermut inuussutissarsiornermullu tunngasut

Suliffeqarnermut inuussutissarsiornermullu tunngasuni aluminiumik suliniummut aningaasaliissutit siornamut sanilliullugu annertuumik ikileriartinneqarput. Suliniummi akuunissaq pillugu 2010-p aallartinnerani Inatsisartut inaarutaasumik aalajangernissaat naatsorsuutigineqarpoq. Tassani piginnittuunissaq qanoq ilusilerneqassanersoq inaarutaasumik aalajangiiffigineqassaaq. Suliniutilli taamaatiinnarneqartariaqarnissaa aamma aarleqqutigineqarsinnaavoq. Tamatuma kingunerissavaa aningaasat akiliutigineqarsimasut annaasatut isumakkeerneqarallartariaqarnerat. Suliniut piviusunngortinneqassappat Maniitsumi illoqarfiup immikkoortuanik nutaamik pilersitsinissamut aningaasanik amerlasoorujussuarnik aningaasanut inatsisissani aggersuni immikkut atugassanngortitsinissaq pisariaqassaaq.

Nunap immikkoortuini periusissatut pilersaarummik, nunap immikkoortuisa ataasiakkaat immikkut piukkunnaataannik qulaajaasussamik aalajangersimasunillu kaammattuuteqarfiussamik suliaqarnissaq kissaatigineqartoq Naalakkersuisut nalunaarutigaa. Takorluukkat taakku sulii saqqummiunneqanngillat.

Namminersorlutik Oqartussat ingerlatseqatigiiffiutaat

Namminersorlutik Oqartussat ingerlatseqatigiiffiutaasa ukiumoortumik angusaat ukiup siulianut sanilliullugu annertuumik ajorseriarput. Aningaasaqarnikkut nalinginnaasumik inissisimaneq pillugu isumaliutissiissuttip immikkoortortaani allassimasutut aningaasaqarneq, taamaalillunilu ingerlatseqatigiiffiit tamakkiisumik ilaannakuusumilluunniit Namminersorlutik Oqartussanit pigineqartut iluanaarutinik tunniussisinnaanerannut periarfissat aningaasarliornermit pitsaanngitsumik 2010-mi sunnerneqassaaq. Ingerlatseqatigiiffiit ilaat inuiaqatigiinnit suliakkiutigineqartuinnarnik tunngaveqanngitsut, soorlu KNI, Tele aamma Royal Greenland, ingerlatsinermik ilaat iluanaarniarnissamik tunngaveqartoq ima aaqqissuuttariaqarpaat piginnittunut iluanaarutinik tunniussisoqarsinnaanngorlugu. Ingerlatseqatigiiffiit ilaat arlallit kisermaassisutut pissusilersorput, taamaattumillu pitsaanerpaajunngitsumik ingerlatsinissamut sunngiussisimasinnaallutik. Taamaattumillu avataanit unammillerneqartutulli ingerlaavartumik ingerlatsinerannik naleqqussaanaissaq siunertaralugu assersuutigalugu 2 procentimik naleqartumik ukiumoortumik pisariillisaanissamik peqquneqarsinnaapput. Taamatut pisariillisaanikkut iluanaarutit innuttaasut akinik appaaffiginerisigut piviusunngortinneqartariaqarput. Taamak malittarisassaqaarnissamik ingerlatseqatigiiffiit tullianik ataatsimeersuarnermi ersarissunik peqquneqartariaqarput. Taamaaliornikkut ingerlatseqatigiiffiit namminersortunngorsarneqarnissamut naleqqussarneqassapput, taamaalillunilu inuiaqatigiit aningaasaqarnerannut pisortat tunniuttagaat ikilisinneqarsinnaapput.

Ingerlatseqatigiiffiit namminersortunngorsassallugit naleqquttut pillugit qulaajaanermik Naalakkersuisut aallartitsisimanerat ataatsimiititaliamit soqutigalugu maluginiarneqarpoq. Suliap tamatuma piaartumik naamassineqarnissaa ataatsimiititaliamit qilanaarineqarpoq.

Tamatuma saniatigut Great Greenlandip aningaasaqarnikkut inissisimaneq Aningaasaqarnermut Ataatsimiititaliamit isumakulunnartinneqarpoq. Suliffeqarfik matussanngippat aningaasaliiffigeqqit-tariaqalersinnaanera pisariaqalersinnaavoq. Suliffeqarfik matuneqartariaqaleqqunagu Naalakkersuisunit qanimut malinnaavigineqassasoq Aningaasaqarnermut Ataatsimiititaliap naatsorsuutigaa. Tamatuma saniatigut puisip amiinik tunisassiorneq tunngavigalugu suliffeqarfinnik sapinngisamik aningaasaqarnikkut imminnut napatittunik nutaanik ineriartortitsinermut tunngavissanik pilersitsinialuni suliaq Naalakkersuisunit siuarsarneqassasoq ataatsimiititaliamit neriutiginneqarpoq.

Ineqarnermut tunngasut

Ineqarnermut tunngasuni sanaartornermut ineqarnermullu maannamut anguniakkat ilaasa 2010-mi aningaasanut inatsisissatut siunnersuummi ingerlateqqinneqarnissaat siunniunneqarpoq. Innuttaasut periarfissallit inissianik pilersuineq ineqarnermilu aningaasartuutit eqqarsaatigalugit maannamit annertunerusumik akisussaaffeqalernissaat Naalakkersuisut taama anguniagaqarneranni pingaaruteqartut suli ilagaat. Taartissanilli minnerunngitsumik Nuummi inissialiornissap aallunneqarnerunis-saa Naalakkersuisut ukioq manna toqqarpaat. Taartissanik inissialiortiternikkut inissiat nutarterniarneqarput amerliniarneqarlutillu. Taamatut suliaqarnissap ilaata realkredit aqqutigalugu taarsigassarsinikkut aningaasalersorneqarnissaa nutaatut anguniarneqarpoq, taarsigassarsiallu ingerlatseqatigiiffimmit Illuut A/S-imit siunertamut pilersinneqartumit taarsigassarsiarineqarnissaat naatsorsuutigineqarpoq. Inissianik attartortittakkanik sanaartornissamut realkredit aqqutigalugu taarsigassarsinis-samut ingerlatseqatigiiffik taanna aamma atorneqalersaartoq oqaatigineqarpoq. Taamatut ilusilii-nikkut nunatta karsiata aarlerinartorsiortinneqarsinnaanera eqqarsaatersornerinnaasoq Naalakkersui-sut paasissutissiissutigaat.

Angallannermut tunngasut

Ataasiinnarmik aallaaveqartumik angallasseriaatsimut atuuttumut, 1. januar 2006-imi aallarnerneqartumut sanilliullugu angallannermut tunngasuni allannguinnissaq anguniarneqanngilaq. Angallan-nermullu Ataatsimiititaliarsuarmik ataatsimut isiginninneq aallaavigalugu angallannermut aningaa-saliissutissat pillugit siunnersuutininik saqqummiussisussatut naatsorsuutigineqartumik Naalakkersui-sut pilersitsisimapput. Ataatsimiititaliarsuup suliarnik naammassinninnissaa sioqqullugu angal-lannermut atortulersuutinut annertunerusunut aningaasaliisoqarnissaa naatsorsuutigineqarsinnaagu-nanngilaq. Umiarsualiveqarnermut tunngasuni aserfallatsaaliinikkut kinguaattoorutit 80 mio. kr.-it isumakuluutigigini isumaliutissiissummi ataatsimiititaliap oqaatigaa. Ajornartorsiutip tamatuma qanoq aqqinneqarnissaanut immikkut pilersaarummik Naalakkersuisut saqqummiussisariaqartut ataatsimiititaliap isumaqarpoq.

Sanaartornermut tunngasut

Nunatta ilaani sanaartornermik ingerlataqartut suliassarpassuaqarsorinarlut Aningaasaqarnermut Ataatsimiititaliamit oqaatigineqassaaq. Akerlianilli nunatta ilaani allani unammillerteqannginneq pissutigalugu sanaartornermi akit qaffasippallaarujussuarsorinarput. Ajornartorsiutit taakku killiler-simaarniarlugit iliussissanik assigiinngitsunik Aningaasaqarnermut Ataatsimiititaliaasimasut ukiut arlallit ingerlaneranni siunnersuuteqartarsimagaluarput. Sanaartornermut akit killilersimaarneqar-nissaannut suliniutissat arlallit isumaliutigineqartut Naalakkersuisut ukioq manna paasissutissiipput. Ilaatigut aalajangersimasumik aningaasartalimmik suliassanut neqeroortitsinerit aamma sanaartor-nermut pilersaarutit ukiunut amerlanerusunut atuuttut atorneqartalernissaat isumaliutigineqartoq kiisalu sanaartornissamut siunertanut ataatsimut atugassiissutitut aningaasaliissutinik immikkoortit-sisarnerup annertunerusumik atorneqalernissaa oqaatigineqarpoq.

Naggasiut

Sanaartugassanut Iluarsagassanullu Aningaasaateqarfimmi atorneqaratik uninngaannartussanngor-lugit sillimmatitut aningaasaliussat sanaartugassatut pilersaarutinut aalajangersimasunut atugassiis-sutigineqarnissaat 2009-p naanerani qinnuteqaatigineqartariaqanngimmat Aningaasaqarnermut A-taatsimiititaliap Naalakkersuisunut naggasiutigalugu eqqaasitsissutigissavaa. Tassunga atatillugu Aningaasaqarnermut Ataatsimiititaliap 2009-imi ataatsimiinnera kingulleq ulloq 16. december 2009-mi ingerlanneqassammat oqaatigineqassaaq. Taamaattumillu 2009-mi ullup tamatuma kingor-na aningaasaliissuteqarnissamik qinnuteqaatinik allanik ataatsimiititaliap suliarinninnissaanut pe-riarfissaqassanngilaq.

2. Aningaasaqarnermut Ataatsimiititaliap apeqqtai/oqaaseqaatai aalajangersimasut – suliassaqarfinnut agguataarlugit

Isumaliutissiissummi ilanngussat A aamma B, Aningaasaqarnermut Ataatsimiititaliap Naalakkersuisunut allagaanik Naalakkersuisullu akissutaanik imaqartut, aallarniutigalugit innersuussutigineqassapput. Immikkoortuni tullerni atortussat taakku (ungaluusikkani) arlaleriarluni innersuussutigineqarput.

2.1. Suliassaqarfik 10-12 – Naalakkersuisut siulittaasuat

Konto pingarneq 10.10.10 Naalakkersuisut

Issittumi Siunnersuisoqatigiinni peqataanermut aningaasartuutit Kalaallit Nunaata akileeqataassutissai 1 mio. kr.-iusussatut naatsorsuutigineqartut Naalakkersuisut paasisutissiissutigaat. Aningaasat taakku nunatsinnut annertunerpaamik pissarsiaqaataanissaasa qulakkeerneqarnissaa siunertaralugu Naalakkersuisunik oqaloqatiginnequllugu Nunanut Allanut Sillimaniarnermullu Ataatsimiititaliap Aningaasaqarnermut Ataatsimiititaliamit **kaammattorneqarpoq**.

Naalakkersuisunut ilaasortanut atorfilittanullu atorfirmut atatillugu biiliinik pisisarneq pillugu kaajallaasitaq nutaaq sukatigaq oktober 2009-mi atuutsilerneqassasoq Naalakkersuisut aamma paasisutissiissutigaat. Sulineq taanna ukiunik arlalinnik kinguaattoorfiusimavoq, taamaattumillu piaarnerpaamik naammassineqarnissaa Aningaasaqarnermut Ataatsimiititaliamit naatsorsuutigineqarpoq. Kaajallaasitaq naatsorsuutigineqartut piffissami qaninnerpaami atuutilersinneqanngippat immikkut ilisimatinneqarnissaa Aningaasaqarnermut Ataatsimiititaliamit naatsorsuutigineqarpoq.

Konto pingarneq 10.12.10 Suliassanngortitsinernut aningaasartuutit

Puisi pillugu suliart eqqartuussivikkut sularineqarnissaat suli piffissaliiffigineqarsimanngitsoq Aningaasaqarnermut Ataatsimiititaliap paasivaa. Suliart ingerlanneqarnissaannut siusinnerpaamik 2011-imi aningaasartuuteqarnissaaq naatsorsuutigineqartoq Naalakkersuisut paasisutissiissutigaat. Tassa suliart eqqartuussivikkut suliassanngortinneqarnissaannut aningaasaliissuteqarnissap Aningaasaqarnermut Ataatsimiititaliamit akuersissutigineqaaqqaarneranit ukiut qulingiluat sinnerlugit qaangiuttut aatsaat suliart aallartinneqarnissaat naatsorsuutigineqarpoq (Suliaq nr. 02/01.36.02.06-04-mi Aningaasaqarnermut Ataatsimiititaliap 13. marts 2002-mi aalajangiinera naapertorlugu). Suliassanngortinneqartut taamatullu innuttaasut eqqarsaatigalugit tamanna naammaginangilluinnartut oqaatigineqartariaqarpoq, tassa suliart piaarnerpaamik naammassineqarnissaata piumasaqaatiginissaanut illua tungeriit tunngavissaqarmata.

Suliamik eqqartuussivikkut ingerlatsinissami aallaqqaammulli siunertaavoq akisussaassutsimik inissiinissaaq anusinngorsaanissarlu. Taamaalillunilu aamma aktiaateqarluni ingerlatseqatigiiffinni pisortanit pigineqartuni qullersatut siulersuisutullu sulinermik sumiginnaanerup aningaasaqarnikkut akisussaannermik nassataqarnera suliassanngortitsisut tungaanit immikkut erseqqissarusunneqarsimavoq. Suliaq kinguaattorfiugaluttuinnartillugu siunertaq taanna ersernerlussigaluttuinnarsinnaavoq.

Taamaattumillu eqqartuussivimmi suliamik sularinninnissaaq 2010-mi aallartinneqarsinnaaqqullugu Naalakkersuisut pisariaqartunik iliuseqartariaqartut Aningaasaqarnermut Ataatsimiititaliap isumaqarpoq. Tamatumani ilanngullugu pisariaqarpoq suliart tamatuma suliart allat, inuiaqatigiinni eqqartuussiveqarnermik ingerlatsiffiusuni naammaginartut isigineqarsinnaasoq qaangerlugu eqqar-

tuussinissamut ukiuni arlalinni piffissaliiffigineqarsimanngitsut, ingerlanneqarnissaannut sulisutigut pisariaqartut atugassiissutigineqarnissaannik inatsisunik atortitsinermut ministereqarfimmut piartumik Naalakkersuisut saaffiginninnissaat.

Konto pingaarneq 10.13.10 Aktiaateqarluni ingerlatseqatigiiffinnit iluanaarutit, iluanaarutinit tunniussinerit tunisinerillu

Ingerlatseqatigiiffinni pisortanit pigineqartuni aningaasaliissutigisanut sanilliullugu Nunatta Karsia-ta iluanaarutai pillugit Naalakkersuisut erseqqinnerusumik paasissutissiinissaat ataatsimiititaliamit qinnutigineqarpoq. Ingerlatseqatigiiffinnut Namminersorlutik Oqartussat ukiuni 2007-imi aamma 2008-mi aningaasaliissutaannut sanilliullugu pissarsiat naatsorsorneranni ingerlatseqatigiiffinnit anginerpaanit (KNI, Tele, Royal Greenland aamma RAL) iluanaarutit 2,5 – 3,5 procentinik anner-tussuseqarsimasut Naalakkersuisut akissuteqaamminni allapput (apeqqut 6.3b). Pisortat aningaasa-liissutaasa taama killeqartigisumik erniatigut iluanaarutaasarnerat pilerinangippallaartu-tut/annikippallaartutut ataatsimiititaliamit isigineqarpoq. Taamatut naliliinermini ataatsimiititaliap ilaatigut eqqarsaatigaa ingerlatseqatigiiffinnut pisortat aningaasaliissutaat assersuutigalugu ilnniar-titaanermut isumaginninnikkulluunniit suliniutinut aningaasaliissutigineqarsimagaluarpata tamatu-ma annertoqataanik immaqaluunniit suli annertunerusumik iluanaarutaasimassagaluarnerat. Tassu-nga atatillugu Namminersorlutik Oqartussat ingerlatseqatigiiffiutaat pillugit isumaliutissiisummi immikkoortoq 1.4-p ataani allassimasut innersuusutigineqarput. Iluanaarutinit akiliutit pisortanut tunniuttakkat amerlineqarnissaannut aningaasasaqarnissap qulakkeerneqarnissaa siunertaralugu ingerlatseqatigiiffinni aningaasaqarnermik pitsanngorsaanaissaq pisariillisaanissarlu sulissutigeqqul-lugu Naalakkersuisut immikkoortumi allassimasumi ataatsimiititaliamit **kaammattorneqarput**.

Royal Greenland A/SA-imi piginnuttuunerup nutaamik ilusilersorneqarsinnaaneranik qulaajaaneq aallartinneqarsimasoq ataatsimiititaliamit aamma maluginiarneqarpoq. Tamanna pillugu nas-suiaammik Aningaasaqarnermut Ataatsimiititaliamut Inuussutissarsiornermullu Ataatsimiititaliamut 2010-mi martsip ingerlanerani nassiussisoqarsinnaanngorlugu suliap tamatuma ingerlanneqarnissaa Naalakkersuisunit qulakkeerneqassasoq ataatsimiititaliap naatsorsuutigaa.

Ingerlatseqatigiiffiit pisortanit pigineqartut siulersuisuinik nalinginnaasunik naliliisarnermi najoqqu-tassiornissaq piffissami qaninnermi isumaliutigineqarumaartoq ataatsimiititaliap apeqqutaanut 6.4a-mut akissuteqaamminni Naalakkersuisut paasissutissiissutigaa. Isumaliutit tamakku pillugit piar-tumik paasitinneqarnissani Aningaasaqarnermut Ataatsimiititaliap qilanaaraa. Tassunga atatillugu september 2007-imi naliliinerit isumaliutillu siulersuisunut allatseqarfimmi suliarineqarsimassasu-tut naatsorsuutigineqartut Naalakkersuisunit ilanngunneqassasut ataatsimiititaliamit naatsorsuuti-gineqarpoq, taamanilimi Naalakkersuisuusunit paasissutissiissutigineqarpoq suliaq inaarutaasumik suli isummerfigineqanngitsaq.

Aktiaateqarluni ingerlatseqatigiiffiit Namminersorlutik Oqartussanit tamakkiisumik ilaannakuusu-milluunniit pigineqartut pillugit nassuiaat tusarniaassutigalugu nassiunneqarsimasoq ataatsimiitita-liap apeqqutaanut 3.6f-imut akissuteqaamminni Naalakkersuisut paasissutissiissutigaa. Nassuiaa-taagallartumik taassuminnga nassinneqarnissaaq (isertuusassaasinnaavoq) Aningaasaqarnermut A-taatsimiititaliamit qinnutigineqassaaq, soorluttaaq nassuiaat inaarutaasoq naammassippat nassiun-neqassasoq ataatsimiititaliamit kissaatigineqartoq.

Konto pingaarneq 10.19.07 Inuit Circumpolar Council

2009-mi aningaasanut inatsimmut sanilliullugu kontomi pingaarnermi matumani aningaasaliissutit 2010-mi allanngoratik ingerlaqqissasut aningaasanut inatsisissatut siunnersuummi siunniunneqar-

poq. Tamatuma saniatigut aningaasaliissutit 2011-imi 1 mio. kr.-inik ikilineqarnissaat aammalu 2012-13-imi 1 mio. kr.-inik ikilineqaqqinnissaat ilanngunneqarsimavoq.

Kontomi pingaarnermi matumani aningaasaliissutit ikilineqarnissaat tunngaviusumik isigalugu ug-gornartutut Aningaasaqarnermut Ataatsimiititaliamit nalilerneqarpoq. Illuatigulli siunertamut matumani pineqartumut aningaasaliissuteqarneq aningaasanut inatsimmi pingaarnertut aningaasaliif-fiusartunut aningaasaliinertut taaneqarsinnaagunangilaq, taamaattumillu aningaasaqarnerput maannatut itsillugu konto pingaarneq taanna imminiiginnarneqarsinnaanngilaq. Tamatuma saniati-gut NGO-t (*Non Governmental Organization, tassalu kattuffiit naalakkersuinermit attuumassute-qanngitsut*) ICC-tut ittut nunatta karsiata toqqaannartumik tapiissuteqarneratigut annertuumik ani-ngaasalersorneqarnerat tunngaviusumik isigalugu eqqarsarnartoq ataatsimiititaliaq isumaqarpoq.

Ataatsimiititaliap naliliinera malillugu suliassat ullumi ICC-mit suliarineqartartut ilaat Nunanut Allanut Pisortaqaarfimmit suliarineqarsinnaannginnersut (-tariaqannginnersut) Naalakkersuisunit isumaliutigineqartariaqarpoq, taamaaliornikkut 2011-imi aningaasaliissutinik ikililerinerup nassata-risaanik kattuffimmut artukkiutaasut ilaat oqilisaassiffigineqarsinnallutik. Tamanna Nunanut Alla-nut Pisortaqaarfiup suliassaanut naapertuullunilu suliassat isumagineqarneranni naalakkersuinermit suliqaartut inuiaqatigiillu annertunerusumik paasitinneqartarnissaannik qulakkeerinnittussatut ataatsimiititaliamit isigineqarpoq.

Kiisalu ukiumoortumik ingerlatsinermut tapiissuteqartarnermut taarsiullugu siunissami inerisaaner-nut aalajangersimasunut uuttorneqarsinnaasunullu tapiisalnissaq iluaqutissarsiffiusinnaanersoq isumaliutigineqartariaqartoq ataatsimiititaliaq isumaqarpoq.

Illumit Namminersorlutik Oqartussat pigisaannit ICC-mit najorneqartumit attartornermut isertitat pillugit ataatsimiititaliamit ilassutitut apequt ulloq 22. oktober 2009-mi Aningaasaqarnermut A-taatsimiititaliamik isumasioqatiginnilluni ataatsimeeqateqarnermi Aningaasaqarnermut Naalakker-suisumit akissuteqarfigineqarpoq. Illup attartorneqarneranut akiliuteqaqqusisannginnermi aningaa-saliissuteqartarnermi maleruagassat suut tunngavigineqarsimanersut ataatsimiititaliamit apeqqutigi-neqarpoq. Ulloq manna tikillugu peruserineqartumut uppernarsaatissat nassaarineqarsinnaasiman-ngitsut pineqartorlu pillugu tunngavissat iluarsineqarnissaat siunertaralugu aningaasanut inatsisissa-tut siunnersuutit pingajussaaneerneqarnissaanut allannguutissatut siunnersuummik Naalakkersuisut saqqummiussilersaartut Naalakkersuisunut ilaasortap isumasioqatigiilluni ataatsimeeqatiginerani paasissutissiissutigaa. Pisariaqartitsineq malillugu suliaq Aningaasaqarnermut Ataatsimiititaliamit uterfigeqqinneqassaaq.

Konto pingaarneq 10.19.08 ITCIP

Konto pingaarnerp 10.19.07-ip, Inuit Circumpolar Councilimut tunngasup, ataani allassimasut innersuussutigineqarput, tassa konto pingaarneq una pillugu ataatsimiititaliap tunngaviusumik i-summernera assigimmagu.

2.2. Suliassaqaarfik 20-24 – Aningaasaqarnermut Naalakkersuisoq

Suliassaqaarfimmi tassani Naalakkersuisut akissuteqaataannik misissuinerminut atatillugu ataatsimii-titaliaq Aningaasaqarnermut Naalakkersuisumik isumasioqatiginnilluni ataatsimeeqateqarpoq. Isu-masioqatigiilluni ataatsimiinnermut allakkiaq isumaliutissiissummut ilanngussaq C-tut ilanngunne-qarpoq.

Konto pingaarneq 20.01.01 Aningaasaqarnermut Naalakkersuisoqarfik, AN, allaffissorneq

Aningaasaqarnermut Siunnersuisoqatigiit konto pingaarneq una aqquutigalugu aningaasaliiffigineqarput. Aningaasaqarnermut Siunnersuisoqatigiit Kalaallit Nunaata Aningaasaqarnera pillugu Siunnersuisutut Ataatsimiititaliaasimasoq, namminersornermut ikaarsaarnermut atatillugu atorunnaarsinneqartoq taarserpaat.

Tunngaviusumik isigalugu isumaliutigineqartariaqarpoq Aningaasaqarnermut Siunnersuisoqatigiit tassaanninersut namminersorerup eqqunneqarnerata kingorna Naalagaaffimmit nunatsinnut nuunneqartut siullersaat, tassa Aningaasaqarnermut Siunnersuisoqatigiit nunatta karsiata kisimi aningaasalersugarimmagit, Kalaallit Nunaatali Aningaasaqarnera pillugu Siunnersuisutut Ataatsimiititaliaq Naalagaaffiup kisiinnangajammi aningasalersugaralugu.

Ingerlaavartumik aningaasaqarnikkut misissueqqissaarnernik periusissanillu suliaqarnerit, tassunga ilanngullugu aningaasat ingerlaarnerat pillugu misissueqqissaarnerit suli assut pisariaqartinneqartut Aningaasaqarnermut Ataatsimiititaliaq isumaqarpoq. Tamannalu tunngavigalugu Aningaasaqarnermut Siunnersuisoqatigiinnut ukiumoortumik 1 mio. kr.-inik immikkoortitsisarneq naammanersoq ataatsimiititaliamit misissorneqarsimavoq. (Apequt 7.1).

Tamatumani Naalakkersuisut paasissutissiissutigaat ineriartortitsinissamik ingerlatsinissat annertunerusut, soorlu inuiaqatigiit aningaasaqarnerata ilusiligaanerani ineriartortitsinissat imaluunniit immikkut misissuinissat aallartisarneqarnissaannut aningaasat taakku periarfissiinngitsut. Taamaatumillu siunertamut aningaasaleeqqinnissaq pisariaqalersinnaasoq.

Konto pingaarneq 20.01.97 Akileraartarneq Atugarissaarnerlu pillugit Isumalioqatigiissitaq

Aningaasaqarnermut Naalakkersuisup isumasioqatigalugu ataatsimeeqatiginerani Akileraartarneq Atugarissaarnerlu pillugit Isumalioqatigiissitaq pillugu erseqqinnerusumik paasissutissinneqarnissaq Aningaasaqarnermut Ataatsimiititaliap qinnutigaa, tak. ilanngussaq C.

Isumalioqatigiissitamut suliakkiummut takussutissiaq isumasioqatigiilluni ataatsimiinnermut atatilugu ataatsimiititaliamut tunniunneqarpoq, taanna ilanngussaq C-mut ilanngussatut ilanngunneqarpoq.

Isumalioqatigiissitap missingersuutai tamakkiisut 6,0 mio. kr.-iupput, taakkulu 2009-mi 1,0 mio. kr.-inik, 2010-mi 4,0 mio.-inik aammalu 2011-imi 1,0 mio. kr.-inut agguataagaapput. Kontomili pingaarnermi matumani siunertamut 4 mio. kr.-innaat immikkoortinneqarsimapput. Taamaattumillu isumalioqatigiissitanut aningaasartuutissat sinneri suliassaqarfiup matumani pineqartup iluani aningaasartuutigineqarnissaat Aningaasaqarnermut Ataatsimiititaliamit naatsorsuutigineqarpoq. Tamanna aappassaaneerinnermut akissuteqaamminni **uppernarsaqqullugu** Naalakkersuisut qinnuigineqarput.

Kiisalu isumalioqatigiissitat kaammattuutaasa piviusunnngortinneqarnissaat 2011-imut kinguartinneqartoq isumasioqatigiilluni ataatsimiinnermi Naalakkersuisunut ilaasortap paasissutissiissutigaa.

Konto pingaarneq 20.05.20 Kommuninut ataatsimoortumik tapiissutit

Aningaasaqarnermut Naalakkersuisup isumasioqatigalugu ataatsimeeqatiginerani ataatsimoortumik tapiissutit pillugit kommuninut isumaqatigiinniarnaq pillugu erseqqinnerusumik paasissutissinneqarnissaq Aningaasaqarnermut Ataatsimiititaliap qinnutigaa, tak. ilanngussaq C, apequt 7a-c.

Ataatsimoortumik tapiissutit pillugit isumaqatigiinniarneq suli ingerlasoq Naalakkersuisunut ilaasortap akissutaani takuneqarsinnaavoq. Sipaartussatulli siunnersuutigineqartut 36 mio. kr.-it kommuninit nammanneqarsinnaanerit illua tungeriinnit isumaqatigiinnigissutaavoq.

2009-mi aningaasanut inatsisissatut siunnersuutip aappassaaneernejarnissaanut taamani ataatsimiititaliaasoq kommunit aningaasaqarnerat pillugu ima allammat Aningaasaqarnermut Ataatsimiititaliamit maluginiarneqarpoq:

” 2.5 Kommuninik iluarsaaqqinneq kommunillu aningaasaqarnerat

Pisortat kommunini ingerlatsinerannik annikillitsinikkut pisortat sipaaruteqarnissaannik qulakkeerinissaq kommuninik iluarsaaqqinnermi pingaarnertut anguniagaavoq. Piffissamili kingullermi Namminersornerullutik Oqartussat amerlanerusunik tapiissuteqarnissaannik kommunit arlallit piumasaqaateqarput. Pisortat annertooujussuarmik amigartooruteqarnissaat maanna missingersuutigineqartillugu piumasaqaatinut taama itunut Naalakkersuisut nakkaannannginnissaat pingaaruteqarluinnartoq erseqqissassallugu Aningaasaqarnermut Ataatsimiititaliaq tunngavissaqarsoraq. Akerlianik kommunerujussuit nutaat allaffissornermik sapinngisamik annikinnerpaamik aallaqqaataaniilli ingerlatsinissaat pingaaruteqarpoq. Kommuninut ataatsimoortumik tapiissutinik qaffaasoqannginnerani aningaasatigullu taarsiissuteqartoqannginnerani kommuninut ataatsimoortumik tapiissuteqariaasissamik nutaamik, tassunga ilanngullugu nalimmassaanermit aqqissuussinermik nutaamik suliaqartussatut suleqatigiissitaliap suliaa utaqeqqaarneqartariaqarpoq.

Taamaattumik suliassanik nutaanik kommuninut nuussisoqarsimatinnagu aningaasat kommuninut nuunneqartartut maannatut annertussuseqarnissaat aalajangiusimaqqullugu Naalakkersuisut Aningaasaqarnermut Ataatsimiititaliamit kaammattorneqarput.”

Aaqqissuussaanermik iluarsaaqqinnerup aningaasaqarnikkut iluaqutissarsiffiunissaa siunertaralugu kommunit aningaasartuutaasa qaffakkiartornerat tunngaviusumik isigalugu killilersimaarneqartariaqartoq Aningaasaqarnermut Ataatsimiititaliaasimasoq assigalugu maanna Aningaasaqarnermut Ataatsimiititaliaasoq isumaqarpoq. Ingammik *kommunit* allaffissornerat annertuallaarnerarlugu akisuallaarnerarlugulu iluarsaaqqinnermut isumalioqatigiissitap siulliup 2003-mi aprilimi oqarneranut tamanna aamma naapertuuppoq.⁶

Ataatsimoortumilli tapiissutit siunnersuutigineqartutut ikilineqarnissaannut peqataanissamut kommunit piareersimanerat pillugu ataatsimiititaliami isummiunneqartut assigiinnigillat.

Aaqqissuussaanermik iluarsaaqqinneq tunngavigalugu naleqqussaanerit sullissinikkullu pitsanngorsaanerit kiisalu minnerunngitsumik nunataa karsiata aningaasaqarnikkut inissisimanera eqqarsaatigalugu kommunit, kommuninut ataatsimoortumik tapiissutit killilimmik ikilinerisigut Namminersorlutik Oqartussat aningaasaqarnerannut tapeeqataasariaqartut Aningaasaqarnermut Ataatsimiititaliami amerlanerussuteqartut, Inuiat Ataqtatigiit aamma Demokraatit ilaasortaataat isumaqarput.

Akerlianilli aaqqissuussaanermik iluarsaaqqinnerup eqqunneqarnerata kingorna kommunit sipaarnissamut peqquneqarnissaannut siusippallaartoq Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataat isumaqarput.

Konto pingarneq 20.10.11 Ilangaaseereerluni erniat

KNR-ip atortorissaarutiminik nutarterinissani siunertaralugu nunatta karsianit tiguisinnaatitaanera tunngavigalugu KNR-ip atukkaminik taarsersuinissaa pillugu isumaqatigiissuteqarnissaq ukiut ar-

⁶ Namminersorneq pillugu Isumalioqatigiissitat april 2003-mi isumaliutissiissutaanni qupperneq 252 (danskisuuani).

lallit ingerlanerani ajornarsimasoq Naalakkersuisut paasissutissiissutigaa (apeqqut 7.6). Taarsersuinissaq pillugu isumaqatigiissutaaqqaartoq suliarineqarsimasoq oqaatigineqarpoq, isumaqatigiissulli taanna KNR-imit eqquutsinneqanngitsoorsimanersoq imaluunniit nunatta karsianit tiguisinnaati-taanerminik KNR-ip atuinnginnerani illua tungeriinnit taanna inaarlugu isumaqatiginnitigineqar-simanninnersoq paasinarsinneqanngilaq. Qanorluunniit pisoqarsimagaluarpat KNR-ip nunatta karsiata aningaasaataanik utertitsinissaanut tunngavissat aqqinneqarsimanninnerat attanqarsin-naanngitsoq Aningaasaqarnermut Ataatsimiititaliaq isumaqarpoq. Taamaattumik illua tungeriit pi-neqartoq pillugu aalajangersimasumik isumaqatigiissuteqarnissaat ataatsimiititaliamit sakkortuner-paamik **kaammattuutigineqassaaq**.

Konto pingaarneq 20.11.72 Illoqarfiit nunaqarfiillu ilaanni immikkut ittumik suliniutissatut sillim-matit

Pingajussaaneerinissamut allannguutissatut siunnersuuteqarnikkut sillimmatit taakku 15 mio. kr.-inik aningaasartalerlugit aningaasanut inatsimmut ilanngunneqarnissaat naatsorsuutigineqartoq A-ningaasaqarnermut Naalakkersuisup Aningaasaqarnermut Ataatsimiititaliamit ulloq 22. oktober 2009-mi isumasioqatiginnilluni ataatsimeeqateqarnermi paasissutissiissutigaa.

Konto pingaarneq 20.16.01 Naatsorsueqqissaartarfik

Nalunaarsuisarnermut inatsit

Inatsisartut 2010-mi upernaakkut ataatsimiinneranni akuersissutigineqarnissaa siunertaralugu inun-nut ataasiakkaanut paasissutissat pillugit inatsisissatut missingiusiap ullutsinnut naleqquttup tusar-niaassutiginnissaa Nunami Namminermi Pissutsinut, Pinngortitamut Avatangiisinullu Naalakkersui-soqarfiup naatsorsuutigigaa Naalakkersuisut paasissutissiissutigaa. Suliaq tamanna malinnaaffi-geqqullugu nukingisaarutigeqqullugulu Inatsisartut Inatsisit Atortinneqarnerannut Ataatsimiititaliaat Aningaasaqarnermut Ataatsimiititaliamit **kaammattorneqarpoq**.

Suliffeqarneq pillugu kisitsisitigut paasissutissat

Qaleralinniat 50 pct.-iisa missingi ukiumut 50.000 kr.-it inorlugit isertitaqartut, taakkulu ilarpassui ullormit ullormut sulisartuusut ataatsimiititaliaq ilisimatinneqarpoq. Tamanna tunngavigalugu sulif-feqarneq pillugu kisitsisitigut paasissutissat minnerunngitsumillu suliffeqanngitsut aammalu sulif-feqanngitsutut nalunaarsorneqarsimannngitsut pillugit kisitsisit pitsaanerusut pisariaqartinneqartut ataatsimiititaliaq isumaqarpoq. Tassunga atatillugu pisortat nalunaarsuiffii ataatsimoortinneqassa-sut, taamaallunilu siusinaartumik pensionisiaqaatigaluni aalisarsinnaanermut akuersissummik pi-gisaqartoqarnersoq nakkutigineqarsinnaasoq Naalakkersuisut paasissutissiissutigaa (apeqqut 3.1-imi suliffissaaleqisunut tunngasumi). Tamatumani maleruagassat annertunerusumik piaaraluniluun-niit unioqqutinneqartartut Aningaasaqarnermut Ataatsimiititaliamit ilimagineqanngilaq, taamaattu-millu taamaanneraanerit tusatsiakkallu eqqunngitsuusut paasinarsinneqarnissaat siunertaralugu taamatut ataatsimoortitsinissaq piaartumik pissasoq ataatsimiititaliamit kaammattuutigineqassaaq. Taamatut ataatsimoortitsinermit (ataatsimoortitsinerugallarnerusinnaasoq) inerniliinerup kingusin-nerpaamik 2010-mi kvartalip siulliup ingerlanerani tigusinissaa ataatsimiititaliamit inussiarnersumik **qinnutigineqassaaq**.

Konto pingaarneq 20.30.01 Aningaasaqarnermut Sulisoqarnermullu Aqutsisoqarfik, allaffissorneq Namminersornerullutik Oqartussani allaffissornikkut pisariillisaanermik taallugu 2008-mi ingerlan-neqartoq allaffissornikkut sipaaruteqarnermik aningaasartuuteqarnerunermilluunniit nassataqarsi-manersoq Aningaasaqarnermut Ataatsimiititaliap Naalakkersuisunut apeqqutigaa. Allannortitsineq ataatsimut aningaasartuutaasartut annertuseriarnerannik nassataqarsimasoq Naalakkersuisut paasis-

sutissiissutigaa. Suliassanik isumaginninnerup pitsanngoriarneranik aningaasartuuteqarnerup qaf-fannera kinguneqarsimanersoq allassimangilaq.

Sulisunik piginnaanilinnik pissarsiniartarneq sulisorinniinnarniartarnerlu

Namminersorlutik Oqartussat allaffissornermut aningaasartuutaasa appartinneqarnissaannik Naalakkersuisut anguniagaat Aningaasaqarnermut Ataatsimiititaliamit tunngaviusumik taperserpeqarpoq. Tamatuma peqatigisaanik pipallatanik inatsisiliorneq sulihamilluunniit pitsaanngitsumik ingerlatsineq pissutigalugu innuttaasut inatsisitigut illersugaanerata ajorseriarneranik kinguneqannginnissaa aammalu sipaaruteqarneq pisariillisaanivimmik ersersitsisusoq tunngavissaatillugu pisortat allaffissornermut aningaasartuutaat appartinneqarsinnaassappata tamanna ataatsimiititaliamit soorunami pitsaasutut isigineqarpoq. Namminersorlutilli Oqartussat allaffeqarfiat immikkut ilisimasalinik annertuumik amigaateqartoq ataatsimiititaliamit ilisimaneqarpoq, taakkununga ilaallutik inatsisilerituut aningaasaqarnermillu ilisimasallit kiisalu inuit akileraartarnermut tunngasunik immikkut paasisimasallit, ingerlatsiveqarfiit allat nunatsinnut nuunneqarnissaannik naalakkersuineramik suliqartut anguniagaat anguneqassappat innuttaasunullu sullissineq pitsaanerusoq anguneqassappat taama ilinniagallit sulisussarsiariniarneqarnissaasa immikkut suliniutigineqarnissaa pisariaqartoq ataatsimiititaliaq isumaqarpoq.

Utaqqiisaasumik inissianik atuisut akiliuteqartittalernerisigut qitiusumik allaffeqarfimmi sipaaruteqarnissaq

Utaqqiisaasumik ineqarnermut akiliuteqartarsinnaaneq pillugu kattuffiit isumaqatigiinniarfigineqartut Aningaasaqarnermut Ataatsimiititaliamik ilisimaneqarpoq. Isumaqatigiinniarnerit naammassip-pata suliq pillugu ilisimatinneqarnissani ataatsimiititaliap qinnutigaa.

Konto pingarneq 20.30.05 Nutaanngorsaanissat suliassallu

IT-mut tunngasumik suliniutit aningaasaqarnerannik aqutsineq

Qarasaasiaq atorlugu innuttaasut iserfigisinnaasannik ataatsimoorussamik pilersitsiniarnermik suliq pillugu Aningaasaqarnermut Ataatsimiititaliaq arlalinnik apeqquteqarpoq (apeqqut 7.11 a-g). Qarasaasiaq atorlugu innuttaasut iserfigisinnaasannik ataatsimoorussamik pilersitsinissamut ingerlatsinissamullu Naalakkersuisut ukiumut minnerpaamik 5 mio.-inik atuilersaarnerat apeqqutinut tunuliaqutaavoq. Qarasaasiaq atorlugu Danmarkimi innuttaasut iserfigisinnaasaat "borger.dk" suliniummum tamatumunnga isumassarsiorfiusimasoq oqaatigineqarpoq. "Borger.dk"-p inerisarneqarneranut ukiunut pingasunut 134 mio. kr.-it immikkoortinneqarsimasut, taakkunannalu 26 mio. kr.-it ukiumi siullermi atorneqarsimasut Naalakkersuisut paasisutissiissutigaa. Suliniut danskit suliffeqarfiutaannit KMD A/S-imit (siusinnerusukkt; Kommunedata) inerisarneqarpoq.

Nunatsinni tamarmi sullissivinni 80-ini qarasaasiaq atorlugu iserfiusinnaasumik innuttaasut atuineranni ikiuuttussatut suliqartussat ilinniartinneqarnissaat siunertaralugu Nuummi Niuernermik Ilinniarfimmi pikkorissarnernik immikkut ittunik pilersitsisoqassasoq Naalakkersuisut akissuteqaataan-ni allassimavoq. Ilinniagaqarnissamik suliniummum tassunga aningaasartuutit, tassunga ilanngullugit angalanernut, ineqarnernut il.il. aningaasartuutit aningaasaliissutaareersut iluanni aningaasalersor-neqarsinnaanersut paasisutissiissutigineqanngilaq.

Aallartinnerata kingorna suliniut naliliiffigineqassaaq qaquguli pinissaa erseqqinnerusumik taaneqanngilaq. Tunngaviilli aalajangersimasut suut naliliinermut tunngaviutinniarneqarnerisut paasisu-tissiissutigineqarsinnaasimangilaq.

Suliniut allassimasoq pissanganartutut Aningaasaqarnermut Ataatsimiititaliamit isigineqarpoq, suliniutilli aqunneqarnerata tassungalu atasumik aningaasaliissutit assut eqqumaffigineqarnissaat pisariaqartoq ataatsimiititaliamit isertuunneqassanngilaq. Peqatigisaanik suliniut siunnersuutigineqartoq nunatsinni inuiaqatigiinnut naapertuuttumik annertussuseqarlunilu anguniagaqarfiunersoq ingerlaavartumik isumaliutigineqartariaqarpoq. Tassunga atatillugu pisortat IT-mut tunngasumik suliniutaa sa pisiniartarnerisalu pitsanngorsarneqarnissaat siunertaralugu Aningaasaqarnermut Ataatsimiititaliaasimasoq ukiut arlallit ingerlaneranni kaammattuuteqartarsimasoq maanna Aningaasaqarnermut Ataatsimiititaliaasumit ilisimaneqarpoq. Tamatumani Aningaasaqarnermut Ataatsimiititaliaasimasoq maanna Aningaasaqarnermut Ataatsimiititaliaasumit isumaqatigineqarpoq.

Qarasaasiakkut aaqqissuussanik pisisarnermi periusissanik aalajangersaaqqullugit Naalakkersuisut ataatsimiititaliamit ukioq manna aamma **kaammattorneqarput**. Taamatut periusissionerimi ilaatigut siunertarineqassaaq pisortat pisariaqanngitsumik aningaasartuuteqannginnissaannik qulakkeerinninnissaq. Ilaatigullu siunertarineqassalluni teknologip nutaap illersorneqarsinnaasumik atulersinneqarnissaanik qulakkeerinninnissamut nalinginnaasumik sulisut pisortallu akornanni piffissamik aningaasanillu immikkoortitsisarnissaq. Taamatut sulinerup saneqqunneqarsinnaanngitsumik ilagaa sukumiisumik *pinngitsooranilu ingerlanneqartussamik* naliliisarnissamut periuseqarnissaq. Kiisalu pilersuisunik siunnersortinillu suliami ajornartorsiuteqarneq pimoorullugu isiginiarneqartariaqarpoq.

Konto pingaarneq 20.30.06 Namminersorlutik Oqartussat qitiusumik qarasaasiaqarnikkut atortuinik programmiinillu ingerlatsineq aserfallatsaaliinerlu

Qitiusumik allaffeqarfimmi Scanjour Captiap atortuulersinneqarnissaa pillugu Aningaasaqarnermut Ataatsimiititaliaq arlalinnik apeqquteqarpoq. Taamatut atortuulersitsinerimi ajornartorsiutit killeqarsimasut ajornartorsiutillu taakku maanna tamakkiisumik qaangerneqarsimasut Naalakkersuisut akis-sutaanni allassimavoq. Tamanna Aningaasaqarnermut Ataatsimiititaliamit nuannaarutigineqarpoq, tamatumani atortuulersitsineq aningaasatigut atugassarititaaqqaartut iluini ingerlanneqarsimassasoq aammalu programmit qarasaasiakkullu aaqqissuussinerit imminnut tamakkiisumik atassuteqarsinnaanissaat qulakkeerniarneqarsimassasoq ataatsimiititaliamit naatsorsuutigineqarpoq. Taamaalillunilu Scanjour Captiap tulliaata, kalaallisut danskisullu oqaasertaqartussatut naatsorsuutigineqartup, atulernissaanut ilassutitut aningaasaliissutinik qinnuteqartoqassanngitsoq ataatsimiititaliamit ilimagineqarluinnarpoq.

Kiisalu konto pingaarnermi 20.30.05-imi, Nutaanngorsaanissanut suliassanullu tunngasumi, IT-mut tunngasumik suliniutit aningaasaqarnerannik aqutsineq pillugu allassimasut innersuussutigineqarput.

Suliassaqarfik 24 Akileraartarnermut Aqutsisoqarfik

Qaasuitsup Kommuniata aningaasaqarnera, hashimik anngiortumik eqqussuinerup killilersimaarneqarnissaanut periarfissat aammalu illunik tunisinerimi iluanaarutit akitsuuserneqartalersinnaanerit pillugit apeqqutit arlallit Aningaasaqarnermut Ataatsimiititaliamit suliassaqarfimmi matumani apeqqutigineqarput. Paasisutissat assut soqutiginarlut Naalakkersuisut akissuteqaamminni saqqummiussaata erseqqinnerusumik naliliiffeqqullugit Akileraartarnermut Akitsuusiisarnermullu Ataatsimiititaliaq Aningaasaqarnermut Ataatsimiititaliamit **kaammattorneqarpoq**.

Konto pingaarneq 24.01.20 Akileraarutinut akiliisitsissutit

Konto pingaarnerup matuma ataani Naalakkersuisut ilaatigut ima paasisutissiipput:

”Akissarsiatigut atorfeqartitaanillu maanna atugassat taamaatsillugit sulisussanik akileraartarnermut kukkunersiuinermullu pisariaqartumik ilisimasalinnik piginnaaneqarluartunik atorfinitsitsiniarneq Akileraartarnermut Aqutsisoqarfiup ukiuni kingullerni ajornartorsiutigaa, tamannalu pissutigalugu pingaartumik nammineq immersugassat naatsorsuutillu ajornarnerusut naligiissinniarnerat kukkunersiorneqarnerallu ajorseriarsimalluni, tamatumani inuit akileraarutininik akiliinngitsoornissamut periarfissaat annertunerpaaffiusarlutik.”

Akileraarutissanik angissusiliinerit ukiunut tallimanut kingumoortumik suliareqqinneqarsinnaanerit akileraartarnermut oqartussaasunit ilassutigineqaraluartoq paasissutissatut allassimasut Aningaasaqarnermut Ataatsimiititaliamit isumakulunnartinneqarput. Suliassaqarfiup iluani sulisut piginnaanilit amigaataanerannik ajornartorsiut iliuuseqarfigeqqullugu Naalakkersuisut ataatsimiititaliamit **kaammattorneqarput**. Kontop pingaarnep 20.30.01-ip, Aningaasaqarnermut Sulisoqarnermullu Aqutsisoqarfimmi allaffissornermut tunngasup, ataani sulisunik piginnaanilinnik pissarsiniartarnermut sulisorinniinnarniartarnermullu allassimasut aamma innersuussutigineqarput.

Konto pingaarnep 24.11.11 Qamutinut motoorilinnut akitsuutit

Qamutinut motoorilinnut akiitsuutit oqimaassutsinut allanut, assersuutigalugu biilnut 2.000 kg. sinnerlugu oqimaassusilinnut, atuutsinneqarsinnaanera Naalakkersuisunit siunniunneqarpoq. Tamatumani illoqarfimmi angallattunut biiliit angisuut akuusut CO₂-millu aniatitsineq killilersimaarniarlugit. Taama isumaliuteqarnermut peqataaqqullugu Akileraartarnermut Akitsuusiisarnermullu Ataatsimiititaliaq Aningaasaqarnermut Ataatsimiititaliamit **kaammattorneqarpoq**.

Konto pingaarnep 24.11.12 Raajanut akitsuutit

Raajanut akitsuutip qaffanneqarnissaa siunertaralugu inatsisissatut siunnersuummik naluneqanngitsut UKA 09-mut saqqummiussisoqarpoq. Tamanna tunngavigalugu isertitassatut tagginneqartut naliliiffiginissaat siunertaralugu raajanik tunisinermi akit ineriartorsimanagerat pillugu paasissutissat Aningaasaqarnermut Ataatsimiititaliamit qinnutigineqarput. Apeqqummut 7.21-imut Naalakkersuisut akissutaat kiisalu isumaliutissiissummi immikkoortoq 1.3.1 innersuussutigineqarput.

Kiisalu Aningaasaqarnermut Naalakkersuisumik isumasioqatiginnilluni ataatsimeeqateqarnermit allakkiami ulloq 22. oktober 2009-meersumi apeqqut 5 innersuussutigineqarpoq. Allakkiaq ilanngussaq C-tut ilanngunneqarpoq.

Konto pingaarnep 24.11.13 Umiarsualivimmiinnermut akileraarutit

2009-mut sanilliullugu 2010-mi umiarsuarnut takornariartaatinut ilaasut 2.100-t missaannik ikile-riarnissaannik naatsorsuutiginninneq tunngavigalugu kontomi pingaarnemi matumani isertitassatut tagginneqartut ikilineqarput.

Konto pingaarnep 24.11.23 Aalisakkanut isumalluutininik pissarsianik akitsuut

Aningaasaqarnermut Ataatsimiititaliap ulloq 22. oktober 2009-mi isumasioqatigalugu ataatsimeeqatiginerani saarullinnut qaleralinnullu akitsuusiinissamik siunnersuut pillugu paasissutissat annertunerusut Aningaasaqarnermut Naalakkersuisumit saqqummiunneqarput. Akitsuutip inuttanut akiliggassanngortinneqassasoq qanoq annertutigisumik naatsorsuutigineqarnera paasissutissiissutigineqarnissaa Aningaasaqarnermut Ataatsimiititaliamit qinnutigineqarpoq. Tamatuma saniatigut avataasiorluni aalisarnerup aningaasaqarneranik misissueqqissaarneq GA-mit saqqummiunneqartoq raajanik akitsuummik qaffaanermit taamatullu saarullinnik qaleralinnillu isumalluutininik pissarsianik akitsuummik atulersitsinermit sanilliullugu soqutiginarlutut isigineqarnerusut paasissutissiissutigineqassasoq ataatsimiititaliamit kissaatigineqarsimavoq. Isumasioqatigiilluni ataatsimiinnermi Naalak-

kersuisunut ilaasortap paasissutissiissutigaa nalunaarusiaq assut soqutiginaateqartutut isigineqartoq aammalu aalisakkanut raajanullu akitsuutininik nutaanik atuutilersitsinissamik sulinermi paasissutisat tamarmik ilanngunneqarumaartut. GA-p misissueqqissaarnera tunngavigalugu aalisakkanik isumalluutinit pissarsianik akitsuutip kingunerisassaasa nutaamik naatsorsorneqarnissaat Naalakkersuisut qinnutigaat. Suliaq taanna pillugu paasissutissanik pingajussaaneerinissaq sioqqullugu Naalakkersuisut saqqummiussinissartik naatsorsuutigaat. Tamatuma saniatigut paasissutissiissutigaa aalisagatigiittoqartillugu aalisarnermit isertitat tamarmiusut nalinginnaasumik 28 procentiat inuttat akissarsiaannut tutsinneqartartoq Naalakkersuisunut ilaasortap paasissutissiissutigaa. Taamaalillunilu raajanut akitsuummut akiliut 1 kroniugaangat inuttat akiliutissat tamarmiusut 28 ørimik ikilineqasapput. Tamannali isumaqatigiissutinut tunngasutut Naalakkersuisunut ilaasortamit isigineqarpoq, taamaattumillu tamatuma akuliuffiginissaa Naalakkersuisunit kissaatigineqarani.

Tamatuma kingorna aalisakkanut akitsuusiinissamik siunnersuut Naalakkersuisunit tunuartinneqarpoq.

Konto pingaarneq 24.13.50 Akileraartarnermi akitsuusiisarnermilu isertitaqarnerulernissamut silimmatit

Imigassat aalakoornartortallit tupallu nunatsinnut akileraaruteqaanngitsumik eqqunneqarsinnaasut akileraaruteqaataannginnissaat atorunnaarsinneqarpat isertitassatut tagginneqartut nassuiaatigineqarnissaat ataatsimiititaliamit qinnutigineqarpoq.

Aningaasaqarnermut Naalakkersuisup isumasioqatigiilluni ataatsimiinnermut allakkiaani 22. oktober 2009-meersumi apeqqummut 5c-mut akissut sukumiisoq innersuussutigineqarpoq. Allakkiaq ilanngussaq C-tut ilanngunneqarpoq.

2.3. Suliassaqarfik 30 – Isumaginninnermut Naalakkersuisoq

Ilaqutariinnermut tunngasut pillugit kisitsisitigut paasissutisat

2009-mi aningaasanut inatsisissatut siunnersuutip aappassaaneerneqarnissaanut isumaliutissiisummini taamani Aningaasaqarnermut Ataatsimiititaliaasooq ima allappoq:

(Issuaaneq aallartippoq)

” 2007-imi aningaasanut inatsisissatut siunnersuutip aappassaaneerneqarnissaanut ataatsimiititaliap isumaliutissiissutaani Aningaasaqarnermut Ataatsimiititaliaq ima allappoq:

”Taamaattumillu ilaqutariinnermut tunngasuni tamani kisitsisitigut paasissutissanik pissarsisinnaa-nissamut tunngavissap pisariaqartup Naalakkersuisunit qulakkeerneqarnissaa ataatsimiititaliamit aammaarluni sakkortuumik kaammattuutigineqassaaq. Sulinerup tamatuma annertuumik siuararfusimanerata inernerinut uppersaatit 2008-mi aningaasanut inatsisissatut siunnersuummik saqqummiussinermut atatillugu Naalakkersuisunit kingusinnerpaamik saqqummiunneqarnissaat ataatsimiititaliamit naatsorsuutigineqarpoq.”

Naalakkersuisoqarfimmi suliassami kisitsisit 2008-mi aningaasanut inatsimmi pitsanngoriaateqarsimanngitsut Aningaasaqarnermut Ataatsimiititaliamit ajuusaarutigalugu taamani paasineqarpoq. Misingsersuutinut ilanngussanik nalinginnaasumik misissuinermini ataatsimiititaliap taamaalilluni paasivaa aningaasanut inatsisissatut siunnersuummi suliassaqarfik 30-mi arlalippassuarnik ersarilluinnarunik takussunartunillu kukkuneqartoq. Taamaattumik 2008-mi aningaasanut inatsisissatut siunnersuutip aappassaaneerneqarneranut isumaliutissiisummi kaammattuut siuliani taaneqartoq ataatsimiititaliamit uteqqinneqarpoq.

Kukkunerit arlallit ataatsimiititaliamit siornali tikkuarneqartut ukioq manna aningaasanut inatsisissatut siunnersuummi suli ilaasut ajuusaarutigalugu Aningaasaqarnermut Ataatsimiititaliap aamma ukioq manna oqaatigisariaqarpaa.

Pisimasut Naalakkersuisunit ajuusaarutigineqarput. Tassunga atatillugu 2010-mi aningaasanut inatsisissatut siunnersuutip suliarineqarnerani suliassaqaqfimmi tassani missingersuutitut ilanngussanik inaarutaasumik misissueqqittoqassasoq Naalakkersuisut paasissutissiissutigaa. Paasissutissiissutigineqartut malillugit Aningaasaqarnermut Ataatsimiititaliap apeqqutai isumaliutissiissutaalu tassunga atatillugu ilanngunneqassapput. Taama neriorsuineq ataatsimiititaliamit naammagisimaarneqarpoq, paatsoortoqaqqunaguli ukioq kingulleq kaammattuutini uteqqissallugu.” (Issuaaneq naavoq)

Missingersuutitut ilanngussami takussutissianilu ersarilluinnartumik kukkunerit ukioq manna ikile-riarsimasut paasineqarpoq. Kukkunerit ataasiakkaat pitsaassutsimik nalinginnaasumik nakkutillii-nermi⁷ paasineqarsimasariaqaraluartut apeqqutit aqputigalugit ataatsimiititaliamit qulaajarneqarpoq, suliassaqaqfiulli iluani nalinginnaasumik pitsanngoriartitsimaneq eqqarsaatigalugu ukiuni siuliani kaammattuutigisarsimasani ataatsimiititaliap uteqqissanngilaa. Isumaginninnerulli tamarmiusup iluani kisitsisitigut paasissutissat suliassamilu kisitsisit eqqortut takutinneqartarnissat Naalakkersuisoqaqfimmit suli eqqumaffigineqassasoq ataatsimiititaliamit naatsorsuutigineqarpoq.

Konto pingaarneq 30.01.10 Kommunit aggornerisa avataanniittunut isumaginninnermi tunniuttak- kat

Pituffik Air Basemi inuinaat sulisut ilaat qassit nunaqavissuunerannut paasissutissat ataatsimiitita-
liamit qinnutigineqarput. Kisitsisit eqqoqqissaartut paasissutissiissutigineqarsinnaasimangillat, 17-
20 procentitulli annertussuseqartut tagginneqarlutik. Tamatuma saniatigut ilinniartut nunatsin-
neersut 17-it sulisorineqarput.

Paasissutissat taakku naliliiffigeqqullugit Nunanut Allanut Sillimaniarnermullu Ataatsimiititaliap
Aningaasaqarnermut Ataatsimiititaliamit **kaammattorneqarpoq**. Tassunga ilanngullugu assersuu-
tigalugu *Joint Committeemi* isumaqatigiinniarnert aqputigalugit nunaqavissut sakkutooqaqfimmi
sulisorineqartut amerlisinneqarsinnaanerit periarfissaqaqarnerisooq ataatsimiititaliap taaneqartup misis-
sorsinnaavaa.

Konto pingaarneq 30.10.36 Erninnermi ullormusiat

Erninnermi ullormusiaqartut ikiliartortut piffissap ingerlanerani ersersimasooq Naalakkersuisut paa-
sissutissiissutigaa. Tamatumunnga sulisartut amerlanersaat kattuffigisaq aqputigalugu erninnermut
atatillugu akissarsiaqarnissamik qulakkeerunneqarsimanerat pissutaasut Naalakkersuisut naliler-
paat. Tamannalu pissutigalugu aningaasaliissutit piffissap ingerlanerani annikitsumik ikiliartorsi-
mapput. (Apeqqut 8.6)

Konto pingaarneq 30.10.37 Nuna tamakkerlugu meeqqanut inuusuttunullu angerlarsimaffiit

Suliassaqaqfiup tamatuma kommuninut nuunneqarnissaa pillugu suli isumaqatigiissuteqartoqarsi-
mannigitsoq Naalakkersuisut paasissutissiissutigaa. Suliassaqaqfik pingaaruteqartoq taanna pillugu
killiffimmik ingerlaavartumik ilisimatinneqartarnissani Aningaasaqarnermut Ataatsimiititaliap **qin-
nutigaa**. Tassunga atatillugu immikkoortumik tamatumunnga tunniussinissaq pilersaarut aningaasa-

⁷ Minnerunngitsumik kontomi pingaarnermi 30.01.10-mi, Kommunit aggornerisa avataanniittunut isumaginninnermi
tunniuttakkanut tunngasumi, tassani ataatsimiititaliap apeqqut 8.3-mi ima allappoq: ”Pisortanit pensionisiat pillugit
peqqussut atorunnaareersoq aningaasaliinnermi tunngavittut taaneqarsimavoq, tamanna kanngunartutut
tatiginninnermillu annikillisaataasutut oqaatigineqartariaqarpoq!”

qarnermut tunngasuinnaangitsut ilanngullugit eqqarsaatigilluagaq malillugu pisariaqartoq erseq-qissassallugu ataatsimiititaliap pisariaqarsoraa. Taamaalillunilu angerlarsimaffinni najugaqartunut perorsaannermut tunngasumik neqeroorutit tunniussinerup kingunerisaanik ajorserianninnissaat qulakkeerneqassaaq. Kommunitut tunniussinerup kingorna suliassa qarfiup iluani pitsaassusioereer-soq naatsorsuutiginnngisamik ingerlatiinnarneqarsinnaanngitsoq ilimanarsissagaluarpat nuussinissamik apeqquut tamarmiusoq Inatsisartuni oqaluuserineqagittariaqassaaq.

Konto pingaarneq 30.12.08 Utoqqalinermi pensionisiat

Nunatta karsiata naatsorsuutaanik ukiuni arlalinni saqqummiussisarnerni paasinarsisimavoq kontomi pingaarnermi matumani annaarivallaarujussuarluni missingersuusiortoqartarsimasoq. Kontomi pingaarnermi aningaasartuutissanik ukioq manna missingineq piviusorsiornerussasoq Aningaasaqarnermut Ataatsimiititaliap neriutigaa.

Tamatuma saniatigut inuit utoqqalinermi pensionisianik pisartagaqartut pinneqaratik (aningaasaliisutit nalilerneqarnissaat siunertaralugu naak tamanna naapertuunnerussagaluartoq) inunnik pensionisiaqalernissamat ukiutigut killigititamik qaangiisimasunik Naatsorsueqqissaartarfiup naatsorsuina pineqartoq 2011-imi aningaasanut inatsisissatut siunnersuummi suliassami kisitsisit pillugit takussutissiami erseqqissarneqassasoq ataatsimiititaliamit **qinnutigineqarpoq**.

Konto pingaarneq 30.12.09 Siusinaartumik pensionisiat

Siusinaartumik pensionisiaqarneq pillugu peqqussutit allanngortinneqarsinnaanera, taamaalillunilu pensionisiat pisartagaqartut isertitaqarnissamat periarfissaat naapertorlugit assigiinnngitsumik anner-tussusilerneqarsinnaanerat ammaffigineqartoq Naalakkersuisut paasissutissiissutigaat. Tamatumani-li Akileraartarneq Atugarissaarnerlu pillugit Isumalioqatigiissitap suliaa utaqqineqarpoq, tak. konto pingaarneq 20.01.97, Akileraartarneq Atugarissaarnerlu pillugit Isumalioqatigiissitaq. Ilaatigut siusinaartumik pensionisiat pillugit nassuiaat 2008-mi saqqummiunneqartoq sulinermi tassani ilanngunneqassasoq ataatsimiititaliamit naatsorsuutigineqarpoq.

Konto pingaarnerup 20.16.01-ip, Naatsorsueqqissaartarfimmut tunngasup, ataani suliffeqarneq pillugu kisitsisitigut paasissutissat pillugit allassimasut innersuussutigineqarput.

2.4. Suliassa qarfik 34 Peqqissutsumut Naalakkersuisoq

Peqqinnissa qarfiup ataatsimut isigalugu aningaasaqarnikkut inissisimanera

48 mio. kr.-inik, aningaasaliissutit 1.020 mio. kr.-iuusut 5 procentimik atuinerussuteqarfiunerannik naleqartumik atuinerussuteqarluni Peqqinnissa qarfiup naatsorsuutit ukiuat 2008qaangerpaa. Taama atuinerussuteqarneq kisimiisillugu isigalugu aarlerinannigilaq. Ukiulli ingerlanerani ilassutit aningaasaliissuteqarnissamik arlaleriarluni qinnuteqartoqarpoq, tamatumalu saniatigut 2008-mi aningaasanut inatsimmi immikkut sillimmatit 20 mio. kr.-inik immikkoortitsisoqarsimavoq, taakkulu tamakkerlutik atornerarput.

Peqqinnissa qarfimmut 2009-mi tamakkiisumik aningaasaliissutit 30 mio. kr.-inik sipporneqarnissaat aarleqqutigineqartoq 2009-mi septemberip qiteqqunnerani Aningaasaqarnermut Ataatsimiititaliaq ilisimatinneqarpoq. Sipaarniutit arlallit aallartinneqartut oqaatigineqarpoq, qularutissaanngilarli 2009-mut missingersuutit eqquutsinniarnarat Peqqinnissa qarfiup assorsuaq ajornakusoortissagaa. Taamaalillunilu taataasartoqarfinit piffissami sivikitsumi taartaasunut aningaasartuutinit, nakorsaa-

tinut aningaasartuutit qaffakkaluttuinnarnerannit, angallassigaluarnernit, napparsimasut amerliartornerannit il.il. aningaasaliissutit suli annertuumik tatisimaneqarput.

Tamanna tunngavigalugu 2010-mi missingersuutunik qaangiinissaq ajoraluartumik aamma ilimarnarpoq.

Peqqinnissaqarfiup aningaasaqarnera aqqissugaaneralu pillugit arlaannaannulluunniit attuumassuteqanngitsumik misissuinerup maanna ingerlanneqartup inerneru isumalluarfigineqartut Naalakkersuisunit oqaatigineqarpoq (apeqqut 9.4c). Nalunaarusiaq Deloittemit sularineqartoq 2010-mi upernaap ingerlanerani naammassineqartussat naatsorsuutigineqarpoq. Taamatut avataaneersut arlaannaannulluunniit attuumassuteqanngitsut misissueqqissaarnerat pisariaqartut Aningaasaqarnermut Ataatsimiititaliamit isigineqarpoq, misissueqqissaarnerlu aqqutigalugu suliassaqarfiup pineqartup iluani aningaasartuutit qaffakkiartornerannut killilersimaarutaasinnaasut aqqutissiuunneqarsinnaasasut ataatsimiititaliamit assorsuaq neriuutigineqarpoq. Nalunaarusiaq naammassineqarniariarpat nassiunneqassasoq ataatsimiititaliamit naatsorsuutigineqarpoq.

Peqqinnissaqarfimmi utaqqisut allattorsimaffii

Peqqinnissaqarfimmi utaqqisut allattorsimaffii pillugit takussutissiaq Aningaasaqarnermut Ataatsimiititaliamit qinnutigineqarpoq. Naalakkersuisut takussutissiaq matuma kingulianiittoq nassiuppaat:

Utaqqisut allattorsimaffii september 2009-mi

Suliassat	September 2007		September 2008		September 2009	
	Napparsimasut amerlasusii	Taakku-nannga 15-inik ukioqalersimannngitsut	Napparsimasut amerlasusii	Taakku-nannga 15-inik ukioqalersimannngitsut	Napparsimasut amerlasusii	Taakku-nannga 15-inik ukioqalersimannngitsut
Seeqqunik & quttoqqap mannguata nagguaanik taarsiinerit	134	0	205	0	320	0
Iloqiaasunik pilattaanerit allat	217	2	300	9	188	3
Allaanerussutunik pilattaanerit	*	*	250	4	396	12
Pilataanikkut iluarsaassinerit	58	6	80	0	34	2
Arnat nappaataat	*	*	*	*	158	0
Isilunnerit	15	2	499	8	533	1
Siutitigut, qinngakkut toq-qusaakkullu nappaatit	646	117	830	31	602	97
Katillugit	1.070	127	1.937	52	2.231	115

* Arnat nappaataa 2009-p siunernatigut misissorneqarsimannngillat. Pilattaanerit siusinnerusukku ilanngunneqartannngillat, tassami napparsimasut ulluinnami sulissinnaassuseqarnerannut il.il. sunniutilittut isigineqanngimmata.

Takussutissiami takuneqarsinnaasutut utaqqisutut allatsissimasut tamakkiisut ukiut marluk ingerlaneranni marloriaat sinnerlugu amerleriarsimapput. Suliassaqarfiilli ataasiakkaat 2009-mut naatsor-

suutini ilanngunneqarsimanerat 2007-imut naatsorsuutini isiginiarneqarsimannigilaq. Taamaakka-luortoq utaqqisutut allatsissimasut amerliartornerat annertuvoq.

Peqqinnissaqarfimmi *utaqqisarnerup sivilissusia* takussutissiami paasissutissiissutigineqanngilaq. Utaqqisutut allatsissimasut ikiliartunngippata utaqqisut allattorsimaffiat aatsaat ajornartorsiutaaler-sutut oqaatigineqarsinnaavoq. Pissutsilli nalinginnaasut aallaavigalugit piffissaq utaqqiffiusartoq sivikilliarunngitsoq qularutiginagu inernilunneqarsinnaasorinarpoq.

Utaqqisut allatsissimasut amerliartuinnarnerat assut isumakulunnartutut Aningaasaqarnermut Ataatsimiititaliamit isigineqarpoq. Napparsimasut taama amerlatiginerat tamatumalu nassatarisaanik suliaritinnissamut utaqqisarnerup sivilissusia kingunerisaanik nunatsinni innutaasut ilarpassui timikkut innarluuteqalernissamut ulorianartorsiorput imaluunniit tarnikkut inuuniarnikkullu atugari-satik pissutigalugit inuuniarnerat annertuumik ajorseriaateqarsimalluni. Tamanna attanneqarsin-naanngilluinnarpoq! Taamaattumik Peqqinnissaqarfimmi suliarisinnaasat amerlisarneqarnissaannut aqutissaasinnaasunik Naalakkersuisut nassaarniartariaqarput.

Utaqqisut allattorsimaffiisa 2010-mi killilimmik ikilieriartinnissaannut aningaasanik immikkoortitsi-soqarpoq, tamatumalu saniatigut 2009-mi ukiakkut utaqqisut ikilisarneqarnissaannut Naalakkersui-sut aningaasanik qinnuteqarput. Taama iliuuseqarnissaq Aningaasaqarnermut Ataatsimiititaliamit ajoriffissaqartinneqanngilaq, tamatumali peqatigisannik ammasumik nassuerutigineqartariaqarpoq iliuutsit taakku ingerlanneqareerpata utaqqisutut allatsissimasut amerliartoqqilerumaarmata, tassa Peqqinnissaqarfimmi suliarisinnaasat amerlineqanngippata.

Peqqinnissaqarfimmi taartaasartunik atuinermi aningaasartuutit

Dronning Ingridip Napparsimmavissuani sinerissamilu napparsimmavinni taartaasartunik atuinermi aningaasartuutit kiffiannik paasitinneqarnissaq Aningaasaqarnermut Ataatsimiititaliamit qinnutigi-neqarpoq.

Takussutissiaq matuma kingulianiittoq Naalakkersuisunit nassiunneqarpoq:

Peqqinnissaqarfimmi taartaasartunik atuineq

DIN i 1000 kr.	2004	2005	2006	2007	2008	2009 augusti- mi atuk- kat	2009 u- kiumut aningaa- sartuutis- satut missi- liukkat
Nakorsat	3.420	2.278	2.452	2.339	9.249	5.946	9.000
Peqqissaasut	13.213	15.325	17.650	27.107	37.627	17.826	27.000
Sulisut allat	0	330	118	272	701	463	800
Katillugit	16.633	17.933	20.221	29.718	47.577	24.234	36.800

SINERIS-SAMI 1000 koruuninngorlugit	2004	2005	2006	2007	2008	2009 augusti-mi atukkat	2009 ukiumut aningaasartuutisatut missi-liukkat
Nakorsat	2.988	2.904	6.930	8.790	12.740	6.198	9.300
Peqqissaasut	2.549	4.418	7.411	4.107	10.209	4.025	6.000
Sulisut allat			140				
Katillugit	5.537	7.322	14.481	12.897	22.949	10.223	15.300

Takussutissiani takuneqarsinnaasutut taartaasartoqarfinnut aningaasartuutit 2008-mi qaffariapiloor-simapput. 2009-mili taartaasartunut aningaasartuutit kiisami ikiliartulersorinarput. Taamatulli naat-sorsuinnermut tunngavik ataatsimiititaliamit ilisimaneqanngilaq paasinarseratarsinnaavorlu isumal-luarpallaartoqarsimasoq.

Pissutsilluunniilli qanoq ikkaluarpata sulisunut taartaasunut aningaasartuutit suli annertoorujus-suupput, taamaattumillu aningaasartuutit taakku ikilisarniarlugit suliniarnerup ingerlaannarnissaa pisariaqarpoq. Tamanna pitsaanerpaamik qularnanngitsumillu akikinnerpaamik pisinnaavoq aalaja-ngersimasumik sulisorisat amerlinerisigut, taamaattumillu tamanna salliutinneqartuartaqarpoq.

Tamanna tunngavigalugu Peqqinnissaqarfimmi sulisussarsiniartarnermut pisariusumut tunuliaqu-taasunik misissueqqissaarisussatut ajornartorsiutillu tamatuma annikillisarneqarnissaanut kaammattututunik saqqummiussisussatut immikkut ilisimasalinnik inuttaqartumik suleqatigiit sulinerannut tapersersuinini ataatsimiititaliap oqaatigissavaa.

Tamanna aqutigalugu Peqqinnissaqarfimmi suliarisinnaasat annertusarneqarsinnaassasut ajornan-gippallu tamatuma peqatigisaanik taartaasartunut aningaasartuutit ikilisinneqarsinnaanissaat ataatsimiititaliamit neriuutigineqarpoq. Peqqinnissaqarfimmi sulisut isumaliutigisaat siunnersuutaallu sapinngisamik annertunerpaamik sulinnermut tassunga ilanngunneqarnissaat Naalakkersuisunut a-taatsimiititaliap siunnersuutigaa.

Konto pingarneq 34.11.01 Napparsimasut nunani allani katsorsarneqartarnerat

Napparsimasunik nunani allani katsorsaanissat aalajangeriikkat ukiuni arlalinni uninngatinneqarsi-mapput. Taamatut unitsitsinnermut pissutaasoq tassatuaasoq katsorsaanissat taakku nunatsinni Peq-qinnissaqarfimmit neqeroortigineqareernerat Naalakkersuisut paasissutissiissutigaa (apeqqut 9.4a). Nassuiaat taanna tamakkiisuunngimmat Aningaasaqarnermut Ataatsimiititaliamit erseqqis-sarneqassaaq. Taamaallunilu napparsimasunik katsorsaanissat aalajangeriikkat unitsinneqarput kontomi pingarnermi matumani aningaasartuutit killilersimaarniarlugit. Taamaallunilu 2004-mut Peqqinnissaqarfiup ukiumoortumik nalunaarusiaani ilaatigut allassimavoq *anigaasaliissutitut atu-gassiissutigineqartunik* eqquutsitsinissaq eqqarsaatigalugu timikkut nappaatinik nunani allani kat-sorsaanissamik neqeroorteqartoqarsimangitsoq.

Tamatuma saniatigut utaqqisutut allatsissimasut amerligaluttuinnarnerat nunatsinni Peqqinnissaqar-fimmi katsorsaanissamik neqeroortit pigineqarnerannik Naalakkersuisut oqarnerannut naapertuus-sorinangilluinnarput.

Utaqqisut ikilisarneqarnissaannut kontomi pingaarnermi matumani aningaasaliissutinit 7,6 mio. kr.-it immikkoortinneqarput. Taama aningaasaliissuteqarneq qanoq pissarsiaqaataasussatut naatsorsuutigineqarnersoq takuneqarsinnaasunnngorteqqullugu Naalakkersuisut ataatsimiititaliamit kaammattorneqarput.

Konto pingaarneq 34.11.03 Dronning Ingridip Napparsimmavissua

Isertitassatut tagginneqartut qanoq katitigaanerat pillugu paasissutissat Aningaasaqarnermut Ataatsimiititaliamit qinnutigineqarput. Naalakkersuisut ima paasissutissiippat:

AKISSUT: 10 mio. koruunit taakku Dronning Ingridip Napparsimmavissuanut aningaasaliissutini isertitatus inissisimasut ukuninnga pissuteqarput:

- | | |
|--|--------------|
| • Neriniartarfimmit igaffimmillu tuniniaaneq | 3,5 mio. kr. |
| • Misissusarfiup sullissinerinit tunisat | 0,3 - - |
| • Napparsimasunut paarisarialinnut akiliutit | 0,9 - - |
| • Nunani allamiunik katsorsaaneq | 0,1 - - |
| • Toqqorsivimmit sinerissamut tunisat | 3,1 - - |
| • Sulisunut inissianik attartortitsinerit | 1,7 - - |
| • Meeqqerivimmit isertitat (Air Grl) | 0,2 - - |
| • Oqarasuaatit isertitallu allat | 0,2 mio. kr. |

Tamatuma saniatigut 2008-mi akuersissutitaqanngitsumik atuinerussuteqarneq tunngavigalugu kontomi pingaarnermi aningaasaqarnermik aqutsineq pillugu misissueqqissaarneq Deloitte suliarineqartoq Naalakkersuisut paasissutissiissutigaat. Misissueqqissaarneq pitsanngorsaatissanut aamma kaammattuutunik saqqummiussiviussasoq oqaatigineqarpoq. Peqqinnissaqarfiup aningaasaqarneranik aqqissugaanerani maanna misissuinerimut Deloittemit suliarineqartumut misissueqqissaarneq taanna ilaanersoq erseqqissumik allassimangilaq, Deloittemilli tunniunneqarniariarpat misissueqqissaarnerup nassiunneqarnissaa ataatsimiititaliamit kissaatigineqarpoq.

Konto pingaarneq 34.11.04 Kalaallit nakorsiartut najugaqarfiat

Konto pingaarnep 34.11.01-ip, Napparsimasut nunani allani katsorsarneqartarnerannut tunngasup, ataani allassimasut naapertorlugit utaqquisunik ikilisaanissamut aggersumut atatillugu suliarinninnerit amerlanerpaartaat napparsimmavinni namminersortuni ingerlanneqarnissaat naatsorsuutigineqartoq, taamaattumillu nakorsiartut najugaqarfiata nammakkersorneqarnissaa naatsorsuutigineqanngitsoq Naalakkersuisut paasissutissiissutigaat (apeqqut 9.7).

Taama akineq Aningaasaqarnermut Ataatsimiititaliamit assut eqqumiigineqarpoq. Taamaallunilu nunatsinneersunut Danmarkimut suliaritikkiartortunut nakorsiartut najugaqarfiannit nalinginnaasumik sullississutigineqartartut ilaannik napparsimasut utaqquisunik ikilisaanermi ilaatinneqartut pisariaqartitsinnginnissaat ilimanangilaq. Tamatumani pineqarput:

- Kalaallit Nunaannit Danmarkimut angalanissamik aqqissuussineq.
- Timmisartoqarfimmut aaneqarneq unnuiffissamullu/napparsimmavimmullu oqqunneqarneq.
- Unnuiffiup napparsimmaviullu akornanni angallanneqarneq.
- Napparsimmavimmi oqalutseqarnissamik aqqissuussineq (suliaritinneq RH-mi pissanngipat)
- Ulluunerani katsorsartittut ornigullutillu suliaritittussat unnuinissaat.
- Isumaginninnikkut siunnersuineq.
- Kalaallinik nakorsianik allanik ataatsimuualaaqateqarneq.

Tamanna tunngavigalugu aningaasaliissutissatut missingikkat naliliiffigeqqeqqullugit pisariaqarpallu aningaasanut inatsisissatut siunnersuutip pingajussaaneernissaanut allannguutissatut siunnersuummik saqqummiusseqqullugit Naalakkersuisut Aningaasaqarnermut Ataatsimiititaliamit **kaammattorneqarput**.

Konto pingaarneq 34.11.05 Imigassamik ajornartorsiuteqartunut katsorsaasarfiit

Ikiaroomartumik atonerluisunik katsorsaanernit angusat pitsanngortinneqarnissaannut periarfissat Aningaasaqarnermut Ataatsimiititaliap Naalakkersuisunut apeqqutigai (apeqqut 9.8b). Naalakkersuisulli apeqqut akinngilaat, tassami akissut alla innersuussutigineqaannarmat, taannali paasissutissanik apeqqutigineqartumut tunngasunik imaqaanngilaq. Taamaattumillu nutaamik akissuteqarfigineqarnissaa ataatsimiititaliap **qinnutigaa**.

Konto pingaarneq 34.11.06 Nappaatinik misileraalluni katsorsaaneq

Konto pingaarneq una aqutugalugu katsorsartinnissamik neqeroorfigineqarnissamut piumasaqaatinik naammassinnittut ikittuinnaasut, taamaattumillu 2009-mi aningaasaliissutit atuinikinneruffiusasut naatsorsuutigineqartoq Naalakkersuisut paasissutissiissutigaa.

Tamatuma saniatigut kontomi pingaarnermi matumani aningaasaliussat siffissakkut pilattaanerit 30-it ingerlanneqarnissaannut naammakkaluartut Naalakkersuisut paasissutissiissutigaa. Aaqqissuusineq ukiut marlussuit atuutereerpat aningaasaliinermi siunertap matumani pineqartup naliiffigineqarnerani paasissutissat taakku ilaatinneqarnissaat naatsorsuutigineqarpoq.

Konto pingaarneq 34.12.01 Najukkani peqqinnissaqarfiit

Peqqinnissaqarfiup nunap immikkoortuinut immikkortinneqarneranut atatillugu nunatsinni najukkani peqqinnissaqarfiit nunap immikkoortuinut tallimanut allanngortinneqassapput.

Peqqinnissaqarfiup ilusiligaanerata pitsanngoriaateqarneranik nunap immikkoortuinut immikkortitsinerup kinguneqarnissaa sapinngisamik qulakkeerneqarsinnaaqqullugu nunap immikkoortuinut pilersaarutit taakku sukumiisumik naliliiffigeqqullugit Peqqissutsimut Ataatsimiititaliaq Aningaasaqarnermut Ataatsimiititaliamit **kaammattorneqarpoq**.

Konto pingaarneq 34.12.03 Ataatsimut aningaasartuutit, napparsimasunik angallasserit

Telemedicinimik atuinerup nuna tamakkerlugu sullississutitut atornerqalerluni siammarnissaa 2010-mi naammassineqartussatut naatsorsuutigineqartoq oqaatigineqarpoq (apeqqut 9.11). Tamatuma kingorna innuttaasut 95 procentii telemedicinimik atuisinnaalissapput. Telemedicinip atornerqarnerata annertusarnera napparsimasunik angallassigasuarnerit ikileriarnerannik suliaritittussanillu nalinginnaasumik angallasserit atornerqarnerulernerannik kinguneqarsinnaasasoq Peqqinnissaqarfiup neriuutigaa. Tamanna Aningaasaqarnermut Ataatsimiititaliamit aamma neriuutigineqarpoq.

Konto pingaarneq 34.12.05 Nuna tamakkerlugu nakorsaaserisoqarfik

Ukioqatigiiaat HPV-virusimut akiuussutissamik kapitinnissamik neqeroorfigineqartut 5-10 procentii itigartitsisimasut Naalakkersuisut paasissutissiissutigaa (apeqqut 9.12). Tamanna isumakulunnartutut oqaatigineqartariaqarpoq, akiuussutissamimmi kapitinneq illissap paavatigut kræfteqalinnginnissamut aammalu kinguaassiuutitigut kræfteqalinnginnissamut illersuutaammat. Peqqissutsimut aqutsisoqarfik naapertorlugu akiuussutissamik kapitinneq assut qularnaatsutut isigineqarpoq aammalu 30 mio.-it sinnerlugit akiuussutissiisoqareerluni. Taamaallunilu akiuussutissamik kapitinnerup kingunipiluuteqarsinnaanera aarleqqutigissallugu tunngavissaqarsorinangilaq. Taamaat-

tumillu isumakulunnarpoq taama amerlatigisut akiuussutissamik kapitinnissartik itigartittarmassuk, taamaalillutimmi allanut illersuuteqanngitsunut HPV-virusimik tunillatsissinnaammatat.

Tamanna tunngavigalugu paasisitsiniaanermik immikkut ingerlatsinissaq pisariaqartinneqarsorinarpoq. Aningaasaliissutit pitsaanerpaamik pissarsissutaanissaannik qulakkeerininnissaq tamatumalu peqatigisaanik kræftimik katsorsaaneermut siunissami aningaasartuutaasussat killilersimaarneqarnissaat siunertaralugu akiuussutissamik kapitinnissap piumasaaqatinnngortinneqarsinnaanera isumaliutigineqarsinnaavoq.

Konto pingarneq 34.13.01 Peqqinnissaqarfiit, kigutigissaaneq

Taratsut flourimik akusat iganermi atorneqartartut Kalaallit Nunaanniinnaq tunineqartarnissaat pilugu niuertarfiutillit isumaqatigiissuteqarfigineqarsimasut taamani Naalakkersuisuusut Aningaasaqarnermut Ataatsimiititaliaasumut 2007-imi paasissutissiissutigaat.

Piffissaliussaaqqaartorli kinguartoorfiusimasoq Aningaasaqarnermut Ataatsimiititaliap paasivaa. Taamaalillunilu tamanna inaarutaasumik sulii isumaqatigiissuteqarfiusimannilaq. Tamanna ajuusaarnartutut isigineqarpoq. Tamanna tunngavigalugu sulii pingaaruteqartup tamatuma piaartumik naammassineqarnissaa siunertaralugu 2007-imi **kaammattuutini** Aningaasaqarnermut Ataatsimiititaliap uteqqippaa.

2.5. Suliassaqarfik 40 Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq

2010-mi aningaasanut inatsisissatut siunnersuummut Aningaasaqarnermut Ataatsimiititaliap apeq-qutai, tak. ilanngussaq A, tunngavigalugit Kultureqarnermut Ilinniartitaanermullu Ataatsimiititaliap saaffiginnissutaanik ataatsimiititaliaq tigusarpoq. Aningaasaqarnermut Ataatsimiititaliap apeq-qutai isummersuutaalu tamakkiisumik taperserlugit Kultureqarnermut Ilinniartitaanermullu Ataatsimiititaliap saaffiginnissummi oqaatigaa, soorluttaaq ataatsimiititaliap suliassaqarfiata iluani apeq-qutinik qulaajaassutaasunik arlalinnik saqqummiussisoqartoq. Aningaasanut inatsisip aningaasaqar-nikkut nammaneqarsinnaanerunissaanik anguniagaqarnermi Kultureqarnermut Ilinniartitaanermullu Ataatsimiititaliap suleqataalluarnera Aningaasaqarnermut Ataatsimiititaliap periarfissaq iluatsillugu qujassutigiumavaa. Kultureqarnermut Ilinniartitaanermullu Ataatsimiititaliap saaffiginnissutaa Naalakkersuisullu akissutaat tamarmik ilanngussaq I-p ataanut ilanngunneqarput.

2008-mut tunngasumik ajornartorsiut

“Ukioqatigiiaat marluiit” meeqqat atuarfiannik 2008-mi ataatsikkut qimatsinerat pissutigalugu ajornartorsiut Aningaasaqarnermut Ataatsimiititaliap malitseqartippaa (apeqqut 10.1). ”Ukioqatigiiaat marluiit” (Naalakkersuisut nassuiaataat malillugu) tassaapput 1991-imi aamma 1992-imi inunngortut meeqqallu atuarfiannik juni 2008-mi qimatsisut. Inuusuttuaqqat ukioqatigiiaat marluiit ilinniarnernik ataatsikkut ingerlatsinissaasa nassatarisaanik ajornartorsiutaasinnaasut Aningaasaqarnermut Ataatsimiititaliaasarsimasunit ukiut ingerlaneranni pinaveersimatinniarneqartarsimanerat killilersimaarniarneqartarsimanerallu ataatsimiititaliap suliamut soqutiginninneranut pissutaavoq. Suliassaq annertoq tassaasimavoq ilinniartarfiit illutaannik allaffissornikkut ingerlatsinerannik, ukioqatigiiaat marluiit taakku ilinniarnerninnik naammassinnereerpata atorfissaaruttussanik annertusaanngikku-luarluni inuusuttut ukioqatigiiaat marluiit taakku ilinniarnissamut periarfissinneqarnissaannik ilinniartarfinni inissanik naammattunik peqarnissap qulakkeernissaa.

Ajornartorsiut taanna pillugu siorna aningaasanut inatsisissatut siunnersuummut isumaliutissiis-summini Aningaasaqarnermut Ataatsimiititaliaasoq ilaatigut ima allappoq:

”... Ukioqatigiiaat marluiit taakku 2008-mi meeqqat atuarfiannik qimatsisussat ilaasa ilinniartinnit katataanissaat assut aarleqqutigineqarsinnaasoq 2008-mut atatillugu ajornartorsiutip tamakkiisup naliliiffiginerani Aningaasaqarnermut Ataatsimiititaliaq isumaqarpoq. Taamatut aarleqqutiginninneq soorunami inuusuttunut nukissakinnerusunut, tassa sivikinnerusumik atuartinneqarsimasunut tunnganeruvoq. Taakkorpiaallumi kingusinnerusukkut ilinniarnermik aallartisisinniarnissaat ajornarnerpaassaaq.”

Ilinniagaqarneq, suliffissaaleqineq assigisaallu eqqarsaatigalugit ukioqatigiiaat marluiit taakku manna tikillugu qanoq agguataarsimanerit naatsorsuineq Aningaasaqarnermut Ataatsimiititaliap ukioq manna qinnutigaa. Naalakkersuisut akissuteqaataat tamakkiisutut isigineqarsinnaanngilaq, taamaattorli suliamik tamakkiisuunngikkaluamik paasissutissiilluni.

Ukioqatigiiaat marluiit taakku katillutik 1661-iusut Naalakkersuisut paasissutissiisutigaat, taakkulu 1991-imi aamma 1992-imi inunngortunut avikannerlutik agguataarsimapput.⁸

Naalakkersuisut paasissutissiisutaat naapertorlugit inuit 1661-it taakku ima agguataarsimapput:

- 699-it, 42 procentit nalingi, ilinniagaqalernissamut piareersarput imaluunniit inuusutissarsiutinut tunngaviumik ilinniarpup imaluunniit efterskolerlutik.
- 962-it, 58 procentit, ilinniarnermik ingerlataqanngillat.

Inuusuttut ukioqatigiiaat siuliinut sanilliullugu ineriartorneq Naalakkersuisut naatsorsuineranni ajoraluartumik takutinneqanngilaq. Taamaalillunilu ineriartorneq ilorraap tungaanut ingerlanersoq taamaannginnersorluunniit nalilissallugu periarfissaqanngilaq. Tamatuma saniatigut inuit 962-it ilinniakkamik ingerlatsinngitsut sulerinersut paasissutissiisutigineqanngilaq. Taamaalillunilu takuneqarsinnaanngilaq taakku suliffissaaleqisuunersut, suliffeqarnerisut inuusutissarsiummilluunniit ingerlatsinersut (aalisarneq piniarnerluunniit).

Naalakkersuisut akissutaatigut ajoraluartumik erserpoq “ukioqatigiiaat marluiit” pillugit tamakkiisumik ilisimasaqartoqanngitsaq. Tamanna ajorpallaarpoq. Taamaattumillu apeqqutip nutaamik ataatsimoortumik akineqaaqqinnissaa ataatsimiititaliap **qinnutigaa**. Aallaavissat pingaarutillit assersuutigalugu suliffissaaleqisut akissummi aamma ilanngunneqarnissaat naatsorsuutigineqarpoq, soorlu tamanna apeqquteqaqqaarnermini ataatsimiititaliap allakkaa.

Ilinniartitaanerup immikkut ittumik suliniuteqarfigineqarnerani naluneqanngitsutut anguniagaavoq 2020-mi sulisinnaasut 2/3-ii piginnaaniliisumik ilinniagaqarsimanissaat. Inuusuttut ilaat “ukioqatigiiaat marluiit” ilaannit ilinniagaqarlernissamut maanna piareersartunit efterskolertunilluunniit 42 procentiusunit amerlanerungaartut meeqqat atuarfiannik naammassinninnerup kingorna ilinniagaqarlertanngippata anguniagaq taanna anguneqarsinnaanngilaq.

Tamanna tunngavigalugu ukioqatigiiaat marluiit meeqqat atuarfiannik qimatsinerannut atatillugu manna tikillugu suliniutigineqartunik naliliineq ingerlanneqarsinnaaqullugu ukioqatigiiaat marluiit

⁸ Tamanna naatsorsueqqissaartarfik malillugu 16- aamma 17-inik ukiullit 1. januar 2009-mi katillutik amerlassuserisaannut naapertuuppoq. Naatsorsueqqissaartarfik malillugu 1991-imi aamma 1992-imi inunngortut 1192-iullutillu 1237-iupput, taakkulu katillutik 2429-iupput.

suliffeqarnermut ilinniagaqarnermullu ingerlaqqinneranni killiffik erseqqissoq Naalakkersuisunit saqqummiunneqassasoq Aningaasaqarnermut Ataatsimiititaliamit **kaammattuutigineqarpoq**.

KIIN-ip aaqqissugaanerani allanngortitsineq

Taamani Suliffeqarnermut Inuussutissarsiutinullu Ilinniartitaanermut Naalakkersuisoqarfiusumit inuussutissarsiornermut ilinniartitaanerit KIIN-imut uterteqqinneqarnissaannut aalajangiinissamut tunngavigineqarpiartoq nassiunneqaqqullugu Aningaasaqarnermut Ataatsimiititaliap qinnutigaa (apeqqut 10.2).

Naalakkersuisut ima akissuteqarput:

”Innersuutigineqassaaq Aningaasaqarnermut Nunanulu allanut Naalakkersuisuusimasup Aningaasaqarnermut Ataatsimiititaliamut allagai 29. september 2009-imeersut uunga tunngasut ”Inuussutissarsiornermut Suliffeqarnermullu Naalakkersuisoqarfiup aamma Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup akornanni oqartussaaffiit pillugit isumaqatigiissutit kingunerisaanik 2009-mut ukiunullu tulliit teknikkut nuussinerit pillugit Illassutitut akuersissuteqarnissamik qinnuteqaat.”

Paasissutissiissutigineqassaaq oqartussaaffinnik allannguinissamik naalakkersuisut siulittaasorisimasaata aalajangerera naalakkersuisut 28. november 2008-mi ataatsimiinneranni akuerineqartoq, tak. naalakkersuisut ataatsimiinnerannit imaqarniliaq nr. 264/2008.”

Naalakkersuisulli akissuteqaataat ajoraluartumik atorsinnaanngilluinnarpoq. Taamaattumillu makku Aningaasaqarnermut Ataatsimiititaliamit oqaatigineqassapput:

1. Siuliani issuakkami immikkoortumi siullermi aningaasaliissuteqarnissamik qinnuteqaat innersuussutigineqartoq ulloq 29. september 2009-minngaanneersuunngilaq, akerlianilli 10. december 2008-minngaanneersuulluni (Aningaasaqarnermut Ataatsimiititaliap suliaa 08-395). Aningaasaliissuteqarnissamik suliama taaneqartumi Aningaasaqarnermut Ataatsimiititaliap aalajangiinngilaq, tassa ataatsimiititaliap oqartussaaffiata avataaniittutut isigineqarpat.
2. Suliassaqarfinnik allannguinineq tunngavigalugu aningaasaliissutinik aalajangersimasunik allannguinissamut aningaasaliissuteqarnissamik suliassaq taaneqartoq tunngagalarpoq, suliassaqarfimmilli allannguinermut tunuliaqutaasoq pillugu qinnuteqaammik paasissutissiissutigineqartutuaq tassaavoq tamanna pisoq taamani Naalakkersuisunit siulittaasuusup sapaatit akunnerani 42-mi aalajangiineratigut. Taamaallunilu suliassaqarfinnik allannguinermut *tunuliaqutaasoq pillugu allasimasoqanngilaq*.
3. Naalakkersuisut ulloq 28. november 2008-mi ataatsimiinnerannit imaqarniliami tamanit takuneqarsinnaasumi taamaallaat allasimavoq suliassaqarfinnik allannguinermut malitsigisaanik aningaasaliissutinik allannguinermut arlallit Naalakkersuisunit ataatsimiinnermi akuerineqartut.⁹ Taamaallunilu suliassaqarfinnik allannguinermut *tunuliaqutaasoq pillugu allasimasoqanngilaq*.

Taamaallunilu oqaatigineqartariaqarpoq Aningaasaqarnermut Ataatsimiititaliap apeqqutaa akineqarsimanngitsoq. Taamaattumillu akineqarnissaq ataatsimiititaliamit **qinnutigeqqinneqarpoq**. Tamatumuuna pimoorussamik tamakkiisumillu akineqarnissaq ataatsimiititaliamit naatsorsuutigineqarpoq.

⁹ http://dk.nanoq.gl/Emner/Landsstyre/Referat_fra_Landsstyret/Referat_fra_Landsstyret/2009/02/28_11_08.aspx

Konto pingarneq 40.01.08 Ilinniartitaanermut pilersaarut kiisalu ilinniartitaanerup immikkut ittumik suliniuteqarfigineqarnera

Ilinniartitaanerup immikkut ittumik suliniuteqarfigineqarnerata killiffia pillugu nalunaarut 2010-mi aningaasanut inatsisissatut siunnersuutip aappassaaneerseqarnissaa sioqqullugu piareerseqartussatut naatsorsuutigineqartoq Naalakkersuisut paasissutissiissutigaa. Nalunaarut Aningaasaqarnermut Ataatsimiititaliamit qilanaarineqarpoq, tassa ilaatigut ilinniartitaanerup suliniuteqarfigineqarnerata ingerlaavartumik pisariaqartumillu naliliiffigineqartarnerani pingaarutilittut isigineqarmat ilaatigullu 2008-mut tunngasumik ajornartorsiut pillugu ataatsimiititaliap apeqqutaanut siuliani taaneqartumut Naalakkersuisut amigartumik akissuteqarnerat tunngavigalugu.

Isumaliutissiissuteqarnerup nalaani nalunaarusiaq taanna suli agguanneqanngilaq. Suliap tamatuma piffissaalluartillugu ingerlanneqarnissaa qulakkeeqqullugu Naalakkersuisut Aningaasaqarnermut Ataatsimiititaliamit **kaammattorneqassapput**. Tamatuma peqatigisaanik piffissap suliniuteqarfiusup naliliiffiginissaa siunertaralugu ilinniartitaanerup suliniuteqarfigineqarnerata ingerlanneqarnerani angusat tamarmiusut piffissamut agguataarlugit naliliinnermit takuneqarsinnaanissaat pingaaruteqartoq ataatsimiititaliamit erseqqissarneqassaaq. Tamanna aamma ima pissaaq suliniuteqarnermi angusat aningaasaliissutigineqartunut sanilliunneqarsinnaasunnorlugit.

Konto pingarneq 40.02.01 Ilinniagaqarnerisuteqartitsivik, aqutsineq aammalu Ilinniartut Ineqarfii-sa Allaffeqarfiat

Innuttaasunut ukiut pingasut *sinnerlugit* Nuummi najugaqarsimasunut IIA ilinniartut inaannik atugassiineq ajorpoq, tamatumalu peqatigisaanik Sermersuup Kommuniamit ukiut tallimat *inorlugit* Nuummi najugaqarsimasunut ilinniartut inaannik atugassiineq ajortoq Aningaasaqarnermut Ataatsimiititaliap paasivaa. Taamaallunilu ilinniartut ilaat ajornartorsiortinneqarput. Tamanna naliliiffigeqqullugu Naalakkersuisut ataatsimiititaliamit qinnuigineqarput. Ajornartorsiut ilisimaneqartoq aammalu suleqatigiissitaq Nuummi ilinniartut inaannik allatut agguariaaseqarnissaaq pillugu kaammattuuteqartussaaq pilersinneqarsimasooq Naalakkersuisut paasissutissiissutigaa. (Apeqqut 10.5) Tamatuma saniatigut Nuummi ilinniartut inaannik arlalinnik sanaartorneq Naalakkersuisunit innersuussutigineqarpoq.

Naalakkersuisut akissutaat ersernerluttutut Aningaasaqarnermut Ataatsimiititaliamit isigineqarpoq. Akissulli ataatsimiititaliamit ima paasineqartariaqarpoq; Nuummi ilinniartut inaannik agguaaassisarnermi maleruagassat piaartumik allanngortinneqarnissaat Naalakkersuisut naatsorsuutigigaat. Tamanna pisariaqartutut naapertuuttutullu ataatsimiititaliamit isigineqarpoq.

Konto pingarneq 40.10.05 Villads Villadsenip Efterskolia

Efterskoli aningaasaqarnikkut ajornartorsiuteqartoq Aningaasaqarnermut Ataatsimiititaliaq ilisimanneqarpoq. Ajornartorsiutinullu taakkununga tunuliaqutaasooq ataatsimiititaliamit erseqqinnerusumik ilisimaneqanngilaq. Ataatsimiititaliamillu oqaatigineqassaaq efterskoli imminut pigisuummat, taamaattumillu angajoqqaat akiliutaat aammalu aningaasanut inatsisikkut tapiissutit aqqutigalugit isertitarisartakkami iluani aningaasartuutigisassat aqunnissaat nammineq tamakkiisumik akisussaaffigalugu. Atuarfiup, atuarfiup pisortaata siulersuisullu suliassaaq taanna isumagisinnaagat Aningaasaqarnermut Ataatsimiititaliap tatigilluinnarpaa, aamma piffissami aallarnisarfiusumi pisariusinnaasumi ikaarsaariarfiusumiluunniit. Taamatutaaq atuarfimmut nakkutilliisussaataaerminnik isumatusaartumik ingerlatsinissartik sapernagulu ulluinnarni aningaasaqarnikkut pitsaasumik aqutsinissap qulakkeerseqarnissaa siunertaralugu ilinniakkatigut siunnersuinikkullu atuarfimmit pisariaqartinne-

qartunik ikiunnissartik Naalackersuisut isumagisinnaassagaat ataatsimiititaliamit qularutigineqanngilaq.

Konto pingaarneq 40.10.10 Namminersorlutik Oqartussat atuarfiutaat

Herstedvesterimi ilinniartitsisutut atorfik ukiut arlallit inuttaqarsimanngitsoq paasineqarpoq (apeq-qut 10.9). Ajornartorsiummut tassunga tunuliaqutaasoq erseqqinnerusumik misissoqqullugu Inatsisit Atortinneqarnerannut Ataatsimiititaliaq Aningaasaqarnermut Ataatsimiititaliamit **kaammattorneqarpoq**.

Konto pingaarneq 40.10.15 Atuarfimmi nerisaqartitsineq

Atuarfimmi nerisaqartitsineq tamakkiisuunngikkaluartumik atorneqalersimasoq Naalackersuisut apeqqummut 10.11-imut akissuteqaataanni allassimavoq. Minnerunngitsumik Qaasuitsup Kommuniyani illoqarfiit arlaannaataluunniit aaqqissuussinermut ilanngunnissaq kissaatiginngimmassuk eqqumiiginanngitsuunngilaq. Taamatuttaaq kujataani illoqarfinit qinnuteqartut amerlanngillat. Taamaattumillu aningaasanut inatsimmi amigartoorutissat killilersimaarneqarnissaat siunertaralugu 2010-mi aningaasaliissutissatut qinnuteqaatigineqartut ilaasa peerneqarnissaat illersorneqarsinnaasansoq aningaasanut inatsisissatut siunnersuutip pingajussaaneerneqarnissaa sioqqullugu naliliiffigeqqullugu Kultureqarnermut Ilinniartitaanermullu Ataatsimiititaliaq Aningaasaqarnermut Ataatsimiititaliamit **kaammattorneqarpoq**.

Konto pingaarneq 40.12.34 Ilinniarnertuunngorniartarfiit

Ilinniarnertuunngorniartarnermik iluarsartuussinermut aningaasartuutit aningaasaliissutaasut iluini ingerlanneqartut Naalackersuisut paasissutissiissutigaa. Tamanna pisariaqartutut naammaginartutullu Aningaasaqarnermut Ataatsimiititaliamit isigineqarpoq.

Tamatuma saniatigut ilinniarnertuunngorniartarfiimmi ilinniarnep qaffasissusiata qaffariarneranik ilinniarnertuunngorniartarnermik iluarsartuussinerup kinguneqarnissaa qanoq qulakkeerneqassansoq Naalackersuisut ataatsimiititaliamit aperineqarput, tamatumalu peqatigisaanik ataatsimiititaliamit erseqqissarneqarluni porsarsimassutsit aalajangersimasut imaluunniit eqqarsartaatsit aalajangersimasut tunngavigalugit takorluueriaatsit ilinniarnertuunngorniartarfiimmi tunngavilerneqarnissaannit ilinniarnep qaffasissusianik qaffasaanissaq pingaarnepusoo. Tamanna Naalackersuisut isumaqatigalugu oqaatigaat, tamatumunngalu peqatigitillugu Naalackersuisut paasissutissiissutigaa iluarsartuussinerup anguniarneqartoq tassarpiaasoq ilinniarnertuunngorfinni tamani ilinniarnep qaffasissusianik qaffasaanissaq.

Iluarsartuussinerup ingerlanneqarnera tamaat ilinniarnep qaffasissusianik qaffasaanissamik anguniagaqarneq aalajangiusimaneqarsinnaaqqullugu ilinniarnertuunngorniartarnermik iluarsartuussinerup eqqumaffiginera aalajangiusimaqqullugu Kultureqarnermut Ilinniartitaanermullu Ataatsimiititaliaq Aningaasaqarnermut Ataatsimiititaliamit **kaammattorneqarpoq**.

Konto pingaarneq 40.90.02 Kalaallit illuinut tapiissutit

Kalaallit Nunaata avataani (piffissaq tamaat) ilinniartut katillutik amerlassusiat ukiuni kingullerni 4-5-ini qaffariarsimanngitsoq Naalackersuisut paasissutissiissutigaa. Paasissutissaq taanna isumakuluutissaqarnarsorinarpoq. Ilinniartitaanerup immikkut ittumik suliniuteqarfigineqarnera ukiut ikittuinnaat matuma siorna aallartikkaluarpoo, ilinniartitaanerulli immikkut annertuumik suliniuteqarfigineqarnera ilinniartut (killeqaraluartumik) amerleriarnerisigut takuneqarsinnaaleriissagaluarpoq. Tunngavissatut pineqartut naapertorlugit tamatumaa erseqqinnerusumik naliliiffiginissaa ajor-

narpoq. Ilinniartitaanerup suliniuteqarfigineqarnera pillugu nalunaarut kingulleq agguanneqarpat pisariaqartitsineq malillugu tamanna uterfigineqarumaarpoq.

Konto pingaarneq 40.90.08 Ilinniartitaanermi qarasaasiaqarneq

Attaveqaatip ATTAT-ip aningaasaqarnermik pissuteqartumik inooqatigiinnermut tunngasumik sullississutit ilaat, soorlu Arto, Facebook Messenger matusimagai Naalakkersuisut paasissutissiissutigaat. Tamatuma nassatarisaa pitsaasoq Naalakkersuisut malillugit tassaavoq sullississutit taakku ilinniartunut atuartunullu ukiukitsunut attaveqarniarnermut meeqqanik atornerluisartunit atornerlunneqarsinnaannginnerat. (Apeqqu 10.15) Naalakkersuisulli aningaasaliissutit amerlillugit allannguutissatut siunnersuummik (Nr. 91) saqqummiussisimapput, tamatumalu kingunerisaanik sullississutit inooqatigiinnermut tunngasut ammaqpinneqartussatut oqaatigineqarlutik. Meeqqanik atornerluiniartartut attaveqaatinut taakkununga inooqatigiinnermut tunngasunut isersinnaatinneqannginnissaannik qulakkeerinissaq siunertaralugu Naalakkersuisut piffissaagallartillugu iliuuseqarnissaat Aningaasaqarnermut Ataatsimiititaliamit **ersarilluinnartumik naatsorsuutigineqarpoq**. Aningaasanut inatsisissatut siunnersuutip aappassaaneernejarnissaanut akissuteqaamminni Naalakkersuisut tamatuminnga uppersaanaassaat naatsorsuutigineqarpoq.

Konto pingaarneq 40.90.12 Radioqarnermut TV-qarnermullu ataatsimiititaliaq

Aningaasaliissutit matumani pineqartup pisariaqartinneqarneranik Kultureqarnermut Ilinniartitaanermullu Ataatsimiititaliaq piaartumik nalileeqqullugu Aningaasaqarnermut Ataatsimiititaliamit **kaammattorneqarpoq**. Radioqarnermut TV-qarnermullu ataatsimiititaliamit ingerlanneqartartut aningaasanut inatsimmi aningaasaliissutit pisariaqarnera ingerlaannarnissaaluunniit tungavissingikkaat ataatsimiititaliaq isumaqassappat aningaasanut inatsisissatut siunnersuutip Inatsisartunit pingajussaaneernejarnissaa sapinngisamik sioqqulluarlugu tamanna pillugu paasissutissiinnissaq Aningaasaqarnermut Ataatsimiititaliamit qinnutigineqassaaq. (Apeqqu 10.16)

Konto pingaarneq 40.91.05 Iluarsartuussinermut ilinniartitaanerit

Minnerunngitsumik aatsitassarsiornermut sanaartugassanullu tunngasumik pikkorissartitsinerit unitsikkallarnejarnissaat siunertaralugu kontomi pingaarnermi matumani sipaarutissatut 2 mio. kr.-it ilanngunneqarsimapput. Aningaasarliornerup nalaani suliaasaqarfinni taakkunani sulisunik pisariaqartitsineq killeqartoq aammalu pikkorissarnerit taakku aningaasarliorneq annikillippat piffissap sivikitsup ingerlanerani aallarteqqinneqarsinnaasut Naalakkersuisut paasissutissiissutigaat. (Apeqqu 10.19)

Nangaassuteqarluni Aningaasaqarnermut Ataatsimiititaliaq tamanna akuersaarpa. Ilinniartitsinisamulli pisariaqartut pigiinnarnejarnissaat qulakkeerneqartariaqartoq ataatsimiititaliaq isumaqarpoq, taamaalilluni pikkorissarnerit aallaqqaataaniit aallartitseqqaanngikkaluarluni ingerlanneqarsinnaaqqullugit.

Tamatuma saniatigut suliaasaqarfimmi tassani ilinniartitaanerit amerlanerusut nunatsinnut nuunneqarnissaat periarfissaqarlunilu naapertuuttuussanersoq nalileeqqullugu Kultureqarnermut Ilinniartitaanermullu Ataatsimiititaliaq Aningaasaqarnermut Ataatsimiititaliamit **kaammattorneqarpoq**.

Konto pingaarneq 40.91.08 Inuussutissarsiutinut ilinniartitaanerit ataani ilinniarfiit

Angallatini naalaganngornianik ilinniartitaaneq Danmarkimut nuunneqassasoq Naalakkersuisut paasissutissiissutigaat. Ilinniarnermik naammassinnittartut ukiut kingulliit ingerlaneranni apparuarjussuarsimanerat nuussinermut tunuliaqutaavoq. Taama ikileriarnernunut ilaatigut pissutaasinnaagunarpoq ilinniartitaanerup Nuummit Paamiunut nuunneqarnera (apeqqut 10.21).

Namminersornerulluni Oqartussaanerup eqqunneqarnerata kingorna ilinniartitaanerit nunatsinnut nuunneqartut siulliit ilagalugit angallatani naalagannngorniat ilinniarfiat nuunneqarpoq. Taamaattumillu namminersornerup eqqunneqarnerata kingorna taassuma siullersaalluni Danmarkimut utertinneqarnera uggornarpoq. Ilinniarfiup Nuummot imaluunniit nunatsinni illoqarfimmut anginerlut allamut nuunneratigut naammattunik ilinniartoqaqqilersinnaanersoq misissoqqullugu Kultureqarnermut Ilinniartitaanermullu Ataatsimiititaliaq Aningaasaqarnermut Ataatsimiititaliamit **kaammattorneqarpoq**.

Konto pingaarneq 40.92.11 Eqqumiitsuliornermik Ilinniarfik

Eqqumiitsuliornermut ilinniarfiup ilusilersuinernullu ilinniarfiup ataatsimoortinneqarnissannik pilersaarutit qimanneqarsimasut paasineqarpoq. Tassunga taarsiullugu assassorluni eqqumiitsuliornermik ilinniarfimmik pilersitsinissamut periarfissat misissorneqartut oqaatigineqarpoq. Annikitsunik ingerlatsinerup pitsaanngequtai, suliffeqarfiit mikisut sanngeequtigisartagaat killilersimaarniarlugit ilinniarfiup ilinniarfimmut allamut atasunngorlugi sapinngisamik pilersinniarneqarnissaa Aningaasaqarnermut Ataatsimiititaliamit kaammattuutigineqarpoq. Tamatuma saniatigut ilusilersuinerlut ilinniarfissamut, taamani Sisimiuni arnat ilinniarfiannut atatillugu taanna pilersinneqartussat naatsorsuutigineqarallarmat atortussat pisarineqartut Naalackersuisunit qulakkeerneqarlutillu atoqqinneqarnissaat ataatsimiititaliamit ersarilluinnartumik naatsorsuutigineqarpoq.

Konto pingaarneq 40.92.13 Ilimmarfik

Kontomi pingaarnermi matumani aningaasaliissutit Ilimmarfimmik ilinniarfinnut ataasiakkaanut agguataarnerat aningaasanut inatsimmi takuneqarsinnaasunngorteqqinneqassasoq Aningaasaqarnermut Ataatsimiititaliamit qinnutigineqarpoq. Suliassami kisitsisit taakku pingaaruteqartut 2008-mi aningaasanut inatsimmi taamatullu 2009-mi aningaasanut inatsimmi ilanngunneqarsimapput. 2010-mili aningaasanut inatsisissatut siunnersuummit peeneqarsimallutik.

Naalackersuisulli paasissutissiissutigaat ilisimatusarfik pillugu inatsimmi (Inatsisartut inatsisaat nr. 19, 19. november 2007-imeersoq) allassimasoq ilisimatusarfimmut aningaasaliussat agguataarneqarnissaannut, tassungalugu ilanngullugu ilinniarfinnut ataasiakkaanut agguataarneqarnissaannut akissusaasuusut tassaasut ilisimatusarfiup siulersuisui. Tamannalu tunngavigalugu ataatsimiititaliap qinnutigisaa Naalackersuisunit malinneqarsinnaasimangilaq.

Naalackersuisut suliamik naliliinerat Aningaasaqarnermut Ataatsimiititaliamit akuerineqarsinnaangilaq. Taamaallunilu ataatsimiititaliap erseqqissassavaa ilisimatusarfik pillugu inatsit 1. januar 2008-mi atuutilerlut, taamaattumillu minnerpaamik 2009-mut aningaasanut inatsit piffissami ilisimatusarfik pillugu inatsisip atuutilereernerani akuersissutigineqarluni. Tamanna innuttaasunit pisariaqartinneqarlunilu kissaatigineqartumik aningaasaliissutit Ilimmarfimmik ilinniarfinnut agguataarneqarnerisa ersarissunngortinneqarnissaannut killiliisutut taamani isigineqanngilaq. Inatsit taaneqartoq ukioq mannaarpiq sooq killiliisuussanersoq erseqqissumik allassimangilaq.

Missingersuornermut inatsimmi § 4, imm. 2 naapertorlugi aningaasanut inatsimmi aningaasaliissutit kontonut pingaarnernut aningaasaliissutigineqartarput. Tamannarpiarlu pissutigalugu suliassamit kisitsisit kissaatigineqartutut ilanngunniissat siulersuisut inatsit malillugu namminneq aalangiisinnaassuseqarnerannut killiliisutut isigineqanngilaq, tassa tamatuma kingorna aningaasaliissutit tamarmiusut sipporneqanngippata aningaasanut inatsimmi missingersuutitut ilanngussami suliasamut kisitsisit apeqqutaatinnagit siulersuisut aalangiisinnaassutsiminnik ingerlatsinissaminnut periarfissaqarmata.

Tamatuma saniatigut pisortat aningaasaataasa ikinngitsut atornerarnerat pillugu paasitinneqarnisamik nunatsinni aningaasaliisartut pisariaqartitsinerisa malinneqarnissaanik siulersuisut (aammalumi Naalakkersuisut) kissaatiginninnginnissaannut tunngavissaqarsorinangilaq. Akerlianilli paasisimasaqarnerminnik aqutsisinnaassuseqarnerminnullu aningaasaliisartunut minnerunngitsumillu innuttaasunut takutitsisinaanertik siulersuisut pitsaasutut qularnangitsumik isigissavaat.

Tamanna tunngavigalugu aningaasanut inatsisissatut siunnersuutip pingajussaaneernissaanut allanguutissatut siunnersuummik saqqummiusseqqullugit Naalakkersuisut Aningaasaqarnermut Ataatsimiititaliamit **kaammattorneqarpoq**, taamaaliornikkut kontomut pingaarnermut 40.92.13-imut, Ilimmarfimmut tunngasumut, missingersuutitut ilanngussami suliasamatut kisitsisit aningaasaliissutit Ilimmarfimmi ilinniarfinnut agguataarneqarnerannut takutitsisut ilannguteqqinneqarlutik.

Suliami matumani Aningaasaqarnermut Ataatsimiititaliap isummiussaanut tapersiinini Inatsisartut Kultureqarnermut Ilinniartitaanermullu Ataatsimiititaliaata oqaatigimmagu ilassutigineqassaaq, tak. ilanngussaq I.

Konto pingarneq 40.94.10 Aviisit nuna tamakkerlugu saqqummersartut assartornerinut aningaasartuutitut nuusiorfiillu NCB-p akitsuutaannut matussutissatut tapiissutit

Kultureqarnermut Ilinniartitaanermullu Ataatsimiititaliamit ingerlanneqartumi aviisit Sermitsiap AG-llu sassartinneqarneranni Aningaasaqarnermut Ataatsimiititaliaq peqataavoq. Tele Greenlandip aviisinik nassiussinermut immikkut akeqartitsinerminik atorunnaarsitsinerata kingunerisaanik aningaasaqarnikkut imaannaangitsumik inissinnissamik paasineqarnissaa pillugu sassartinneqarnisartik aviit kissatigisimavaat. (Avisinik nassiussinermit toqqaannaangitsumik tapiissut aamma aviisinik nassiussuinermit immikkut akigitinneqartartutut taaneqartartoq). Tamatuma saniatigut Ineqarnermut, Attaveqarnermut Angallanermullu Naalakkersuisumik suliaq pillugu Kultureqarnermut Ilinniartitaanermullu Ataatsimiititaliap isumasioqatiginnilluni ataatsimeeqateqarnera ataatsimiititaliap peqataaffigisimavaa.

Tele Greenland aqutugalugu aviisinik nassiussuinermit immikkut akigitinneqartup atorunnaarsinneqarneranik suliaq Aningaasaqarnermut Ataatsimiititaliamit isummerfigineqanngilaq, tassa suliaq aningaasanut inatsimmi aningaasaliissutigineqartunut attuumassuteqanngimmat. Aningaasaliissutilli attatiinnarneqarnissaat pillugu inassuteqaammik kiisalu taassuma aningaasalersorneqarnissaanut siunnersuummik Kultureqarnermut Ilinniartitaanermullu Ataatsimiititaliamit ataatsimiititaliaq tigu-saassaguni suliaq naliliiffigiumaarpaa.

Konto pingarneq 40.94.13 Timersornermut tapiissutit

Pisortat timersornermut tapiissutaasa Kalaallit Nunaanni Timersoqatigiit Kattuffianni timersoqatigiilluunniit ataasiakkaat kattuffiini allaffissornermut, akissarsianut, angalanernut aammalu ilassininnermut atornagit timersornermut atornerqarnissaat Naalakkersuisunit eqqumaffigineqaannassoq Aningaasaqarnermut Ataatsimiititaliamit kaammattuutigineqarpoq. Tamanna pillugu piumasqaatinik uuttorneqarsinnaasunik Kalaallit Nunaanni Timersoqatigiit Kattuffiannik angusassat pillugit isumaqatigiissuteqarnerminni ilanngusseqqullugit Naalakkersuisut ataatsimiititaliamit tassunga atattillugu kaammattorneqarput.

Tamanna pillugu akissuteqarlutik Naalakkersuisut oqaatigaat naammassisassat pillugit isumaqatigiissummi allassimammat pisortat aningaasaataannik aqutsineq sipaarnissamik aallaaveqarluni Kalaallit Nunaanni Timersoqatigiit Kattuffiannit ingerlanneqassasoq aammalu Kalaallit Nunaanni Ti-

mersoqatigiit Kattuffiannit paasissutissiissutigigaat 2008-mi allaffissornermut aningaasartuutit tamakkiisumik aningaasartuutit 18,75 procenterigaat.

Allaffissornermut aningaasartuutit aningaasaliissutit 40 procentiannit 18,75 procentimut Kalaallit Nunaanni Timersoqatigiit Kattuffiannit appartinneqarsinnaasimanerat ataatsimiititaliamit pitsaasutut isigineqarpoq (tak. 2008-mi aningaasanut inatsisissatut siunnersuutip aappasaaneerneqarnissaanut Aningaasaqarnermut Ataatsimiititaliap isumaliutissiissutaa). Kalaallit Nunaanni Timersoqatigiiffiit Kattuffiata paasissutissiissutigisaanik taassuminnga isummerfiginninatik, uppernarsaanatik allatigulluunniit tatiginassusianik Naalakkersuisut apeqqusiinatik ingerlatitseqqinnarnerat ataatsimiititaliap maluginianningsuunngilaa. Paasissutissamilli eqqunngitsutut salluusutulluunniit isigineqarsinnaasumik erseqqissumik nangaassutitalernagu Naalakkersuisut nassiussinavianningsut ataatsimiititaliamit tatigineqarpoq, tassa taamatut ingerlatitseqqinneq Naalakkersuisunut ilaasortamut akisussaasuusumut soorunami tuttussaammat.

Tamatuma saniatigut timersornermut toqqaannartumik tapiissutit pingaarnerusunngortinneqarnissaanik Naalakkersuisut ataatsimiititaliamit kaammattorneqarput. Aningaasanut inatsisissani aggersuni aningaasanik amerlanerusunik immikkoortitsinissap qinnutigineqarnissaanut piumasuseqarneratik Naalakkersuisut oqaatigaat, tamannalu ataatsimiititaliamit pitsaalluinnartutut isigineqarpoq. (Apeqput 10.30)

Kiisalu Kalaallit Nunaanni Timersoqatigiit Kattuffiata ukiumoortumik nalunaarusiaa kingulleq piaartumik nassiuteqqullugu Naalakkersuisut ataatsimiititaliamit **qinnuigineqarput**.

Konto pingaarneq 40.94.14 Nuna tamakkerlugu meeqqanut inuusuttunullu suliniaqatigiiffinnut tapiissutit

Maannatut annertussusilinnik Sorlammut Spejderinullu tapiissuteqartarnerup ingerlatiinnarnissaa naapertuunnersoq isumaliutigeqqullugu Naalakkersuisut Aningaasaqarnermut Ataatsimiititaliamit kaammattorneqarput. Tassunga akissuteqarlutik Naalakkersuisut oqarput kattuffiit taaneqartut annertuumik iluaqutaasumillu suliaqartutut isigineqartut. Akissulli naapertorlugu kattuffinnut naatsorsuutaagallartut arlalinnik uparuaanissamut tunngavissiisimapput, taamaattumillu tamanna pillugu ataatsimiigiaqqusisoqarsimalluni. (Apeqput 10.31)

Tamanna Aningaasaqarnermut Ataatsimiititaliamit ima paasineqarpoq; aningaasaliissutit maannatut annertussuseqartillugit attatiinnarneqarnissaat pisariaqartinneqarnerasoq pillugu Naalakkersuisut tamakkiisumik suli isumminngitsut. Tamanna ataatsimiititaliamit tusaatissatut tiguneqarallarpog, ataatsimiititaliamilli naatsorsuutigineqarpoq kattuffiit naatsorsuutaannik Naalakkersuisut misissuinerat siuartinniarneqassasoq, taamaaliornikkut aningaasanut inatsisissatut siunnersuutip pingajussaaneernissaa sioqqulluarlugu allannguutissatut siunnersuutaajunnartumik saqqummiussinissaq angumerineqarsinnaaqqullugu.

Konto pingaarneq 40.94.18 Kulturip illorsua Katuaq

Angusassat pillugit KNR-imut isumaqatigiissutissami Katuamit raadiukkut tv-kullu aallakaatitsisarnissat pillugit piomasagaat ilannguteqqullugu Naalakkersuisut Aningaasaqarnermut Ataatsimiititaliamit kaammattorneqarput. Tamanna Naalakkersuisunit akuersaarneqarpoq, tamannalu ataatsimiititaliamit pitsaasutut isigineqarpoq. (Apeqput 10.33)

Siunertamut konto 40.97 Ilagiit

Ukiu moortumik aningaasanut inatsisit aqutugalugit ilagiinnik aningaasalersuisarneq atuuttoq ullut-sinnut naleqqullunilu naapertuunnersoq Aningaasaqarnermut Ataatsimiititaliamit arlaleriarluni oqallisigineqarpoq. Minnerunngitsumik upperisarsiortunik naligiimmik pinninnissaq eqqarsaatigalugu aningaasalersueriaatsimik allamik piumassuseq naapertorlugu tapiissuteqarnermik aallaaveqartumik aaqqissuussisoqarnissaa pissusissamisoorinarpoq. Apeqqut oqaaseqarfigeqqullugu Naalakkersuisut ataatsimiititaliamit qinnuigineqarput.

Ilagiit evangelisk-lutherikkuusut inatsisini tunngaviusuni § 4 naapertorlugu tassaasut ilagiit danskit taamatullu naalagaaffimmit tapiiffigineqartartut Naalakkersuisunit innersuussutigineqarpoq. Tassunga tunngatillugu tunngaviusumik isigalugu oqaatigineqassaaq Danmarkimi ilagiinnut naalagaaffiup tapiisarnera ilagiinnut akileraarutit aqutugalugit nammineq piumassuseq aallaavigalugu akiliuteqartarnikkut pisinnaasutut isigineqarmat.

Nunatsinni ilagiit ingerlanneqarnissaannut atugassatut immikkoortitanik naalagaaffimmit ataatsimoortumik tapiissutit ilaqartut Naalakkersuisunit aamma innersuussutigineqarpoq. Tamannali kukkuneruvoq. Taamaallunilu namminersorneq pillugu inatsisip akuersissutigineqarnerani ataatsimoortumik tapiissutit aalajangersimasumik annertussuseqartussatut aalajangiunneqarnerat oqaatigissallugu Aningaasaqarnermut Ataatsimiititaliap pisariaqarsora. Taamaallunilu Namminersorlutik Oqartussat aatsitassarsiortnermit annertuumik isertitaqalissagaluarpata ataatsimoortumik tapiissutit aatsaat ikilisinneqarsinnaapput.

Suliassa qarfirmili sipaartoqarnissaa ilagiinnulluunniit aningaasalersuisarnerup allangortinneqarnissaa isumaqatigineqarneris akerlerineqarneris iluunniit Aningaasaqarnermut Ataatsimiititaliamit isummerfigineqanngilaq. Ilagiinni pissutsit pillugit inatsisissatut siunnersuummut saqqummiunneqartussatut naatsorsuutigineqartumut atatillugu ilagiinni pissutsit ilagiinnillu aningaasalersuineq pillugit oqallinnissap aallarnerneqarnerani isumaliutit siuliani allassimasut tunngaviliisuusussatut isigineqarnissaat Aningaasaqarnermut Ataatsimiititaliamit kissaatigineqarpoq. Siunnersuummik taaneqartumik suliarinninnermini Aningaasaqarnermut Ataatsimiititaliap isumaliutai siulianiittut ilannguteqqullugit Kultureqarnermut Ilinniartitaanermullu Ataatsimiititaliap ataatsimiititaliamit **qinnuigineqarpoq**.

2.6. Suliassa qarfik 50-51 Aalisarnermut, Piniarnermut Nunalerinermullu Naalakkersuisoq

Aningaasaqarnermut Ataatsimiititaliamit aallarniutit apeqqutigineqartut ilaasa oqaluuserineqarnissaat siunertarlugu Aalisarnermut, Piniarnermut Nunalerinermullu Naalakkersuisoq isumasioqatigiilluni ataatsimiinnissamut ataatsimiititaliamit aggersarneqarpoq, tak. ilanngussaq A aamma B. Ilanngussaq F innersuussutigineqarpoq, tassani isumasioqatigiilluni ataatsimiinnissamut Naalakkersuisunut ilaasortap allakkiaa ilanngunneqarpoq.

Tamatuma saniatigut Aalisarnermut Ataatsimiititaliamit saaffiginnissummik ataatsimiititaliap tigu-saqarpoq, tak. ilanngussaq G. Suliassa qarfiup matuma ataani aningaasaliissutit pillugit isumaliutit arlallit ataatsimiititaliap taaneqartup allakkani saqqummiuppai.

Taakku isumasioqatigiilluni ataatsimiinnermi siuliani taaneqartumi oqaaseqarfigeqqullugit Naalakkersuisoq Aningaasaqarnermut Ataatsimiititaliamit qinnuigineqarpoq, tassunga peqataanissamut Aalisanermit Ataatsimiititaliamut ilaasortat aamma aggersarneqarput.

Konto pingarneq 50.01.01 Alisarnermut, Piniarnermut Nunalerinermullu Naalackersuisoqarfik

Tammajuitsussanik piniartitsisarnerit aallartinniarlugit sumiiffippassuit atorneqanngitsut atorluarneqarnissaat sulissutigineqartoq Naalackersuisut paasissutissiissutigaa. Ilaatigut Ilulissat eqqaanni umimmanniartitsisarnissamut periarfissaqarluartoq Naalackersuisut oqaatigaat. Tamanna pillugu paasissutissanik amerlanerusunik tigusaqarnissani ataatsimiititaliap qilanaaraa.

Konto pingarneq 50.01.20 Aalisarneq piniarnerlu

Ilaatigut misileraalluni aalisarnermut aningaasartuutit konto pingarneq una aqqutigalugu akilerneqartarput. Aalisakkanik iluanaarniutigineqarsinnaasutut soqutiginaatilinnik biologit ilisimatusarne-rannik kiisalu uumasunut tunngasunik misissuinernik allanik siuarsaanissaq siunertaralugu nunarput ukiumut 500.000 euronik misileraalluni aalisarnissamut immikkoortitsinissaminut EU-mik isumaqatigiissut naapertorlugu pisussaaffeqarpoq. Assersuutigalugu nunaqarfinni isorliunerusunilu sulif-feqarfinni aalajangersimasuni suliffiit tunisassiassanilluunniit pilersuinerup attatiinnarneqarnissaat misileraalluni aalisarnissamut akuersissutinik tunniussinermi tunngavigineqartuuppata, tamanna kontomi pingarnermi aningaasaliissuteqarnermi tunngavigineqartunut (aammalumi suliamut at-tuumassuteqanngitsut naliliinermi tunngavinnut ilanngunneqartannginnissaanik tunngaveqarner-nermut) naappertuunnaviarunanngilaq. Nunaqarfinni isorliunerusunilu tunisassiorfinnik suliffinnillu attassiinnarnissamut aningaasartuutit taamaallaat konto pingarneq 20.11.72, Nunaqarfinnut illoqar-finnillu arlaqartunut immikkut ittunik aningaasaliissutissanut tunngasoq, aqqutigalugu ingerlanne-qarsinnaapput.

EU-mik isumaqatigiissutip sutigut tamatigut nunatsinnit eqquutsinneqarnissaa assorsuaq pingaaruteqarpoq, tassa isumaqatigiissutip ilaatut nunarput ukiumut 300 mio. kr.-it sinnerlugit EU-mit pis-sarsisarmat. Isumaqatigiissutip eqquutsinneqannginnera nutaamik isumaqatigiissuteqarnissaq pillu-gu isumaqatigiinniarnierit pisariunerulernerannik kinguneqarsinnaasoq aarleqqutigineqarsinnaavoq. Isumaqatigiinniarnierit taakku 2010-p aallartinnerani aallarnerneqassapput. (Apeqqut 11.3c)

Tamanna tunngavigalugu misileraalluni aalisarnerit 2009-mi manna tikillugu ingerlanneqarsimasut aammalu misileraalluni aalisarnerit taakku kikkunnit ingerlanneqarsimanersut pillugit paasissutissat Aningaasaqarnermut Ataatsimiititaliamit qinnutigineqarput (apeqqut 11.4).

Naalackersuisut ima akipput:

"Aningaasat sumut atorneqarsinnaaneri Pinngortitaleriffik suleqatigalugu pilersaarusiorneqartarput, ukioq manna aningaasaliissutit Kujataata kitaani Tununumilu saarulleqassutsip, sinerissap qanittuani saarullit suffisarneri kissalu Qeqertarsuup Tunuani qalerallit pisarisoorneqartartut pillugit misissuinernut atorneqarput."

Ingerlatat akissummi allassimasut aningaasaliinermi tunngavigineqartunut EU-mulluunniit isumaqatigiissummut akerliusutut isigineqanngillat, tamannalu naammagisimaarneqarpoq. Ataatsimiititalialli maluginiarpaa ataatsimiititaliap apeqqutaata immikkoortuata appaa misileraanermik ingerlatsi-sunut tunngasoq Naalackersuisunit akineqanngitsoq. Aningaasanut inatsisissatut siunnersuutip aap-passaaneerneqarnissaanut akissuteqaamminni paasissutissat taakku saqqummiuteqqullugit Naalak-kersuisut **qinnuigineqarput**.

Konto pingarneq 50.06.50 Aalisarnermut aningaasaliissutinut immikkoortitat

Kontomi pingarnermi matumani 2007-imili aningaasanut inatsimmi aningaasaliissuteqarnerup kingorna aningaasaliissuteqartoqaqqinngilaq. Tamanna pisariaqarsorineqarsimanngilaq, konto-mummi pingarnermut aningaasaliissutit atunngitsuukkat ukiumut aningaasanut inatsiseqarfiusumut

tullermut nuunneqartarsimammata. Naalakkersuisunut ilaasortaq naapertorlugu juli 2009-mi immikkoortitani uninngasuutigineqarput 23,5 mio. kr.-it missaat.

Inatsisissatut siunnersuut, immikkoortitanut aningaasaliissuteqartarnermi tunngavinnik allanngortit-sisoq, Inatsisartut UKA 2009-mi oqaluuseraat. Tamanna tunngavigalugu aalisariutit angissusiat aaligaqassuserlu tamakkiisumik imminnut naapertuuttunngortinneqassappata sinerissamut qanittumi aalisariutit aaqqissuussaananerannik naleqqussanissami tamakkiisumik aningaasartuutaasussatut tag-ginneqartunut missingiut Aningaasaqarnermut Ataatsimiititaliamit qinnutigineqarpoq.

Aaqqissuussaananermik naleqqussaananermi aningaasartuutaasussat suliassallu pillugit takussutissiaq sukumiisoq isumasioqatigiilluni ataatsimiinnermi Naalakkersuisunut ilaasortap saqqummiuppaq, tak. ilanngussaq F.

Aaqqissuussaananermik naleqqussaananermi aningaasartutit

Sinerissamut qanittumi aalisariutit aaqqissuussaananerannik naleqqussaasoqarlunilu nutarterisoqassap-pat aningaasartuutissat annertuupilussuussasut KANUAANA-p paasissutissiissutai tunngavigalugit ataatsimiititaliamit paasineqarpoq. Taamaalillunilu aalisariutinik isaterinnermi aningaasartuutissatut pisariaqartinneqartut tamakkiisut 85 mio. kr.-iusussatut Naalakkersuisunut ilaasortamit tagginne-qarput. Taamatut naliliinnermi soorunami ilaatinneqanngillat aalisariutinik nutaanik nutaaliaasunillu pisinnermut tapiissutitut aningaasartuutaasinnaasut.

Qaleralinniarnermut immikkut tunngasut

Aalisarnermik inuussutissarsiutip ilaani tassani aalisartut amerliartuinnartutut tamatumalu peqatigi-saanik tamakkiisumik pisassat ikiliartuinnartutut Naalakkersuisunut ilaasortamit oqaatigineqartut ataatsimiititaliamit maluginiarneqarpoq. Tamanna attanneqarsinnaanngitsutut Naalakkersuisunut ilaasortamit oqaatigineqarpoq. Aalisarnermi tassani pisuussutit tunngaviusut aalisarnerullu anner-tussusia imminnut naapertuuttunngortinneqarsinnaaqullugit aalisartut angallatillu ikilisarneqarnis-saannut suliniutinik aalajangersimasunik aallartitseqqullugit Naalakkersuisut Aningaasaqarnermut Ataatsimiititaliamit kaammattorneqarput.

Raajarniarnermut immikkut tunngasut

Sinerissap qanittuani raajarniarnermi aalisariutit agguaqatigiissillugu ukiunik 24-inik pisoqaassuse-qartut Naalakkersuisunut ilaasortap paasissutissiissutigaa. Tamanna assut qaffasippoq. Taamaattu-millu ukiut amerlanngitsut ingerlaneranni sinerissap qanittuani aalisariutit taakku aalisarunnaarsin-neqartussatut naliliiffigineqartariaqarput. Taamatulli iliuuseqarnissamut aningaasanik immikkoortit-sisoqanngilaq, tamatumanilu aningaasartuutissat ilisimaneqaratik. Taamaalillunilu sinerissap qanit-tuani aalisarnerup aaqqissuussaananerannik naleqqussaananermi periuserineqartussaq pitsaanerpaq tas-saaratarsinnaavoq avataasiorluni aalisarnerup aaqqissuussaananerannik naleqqussaaneq 1990-ikkunni ingerlanneqartoq, taamani aalisariutaatillit imminut akilersinnaanerusut aalisariutaatilinnik imminut akilersinnaannginnerusunik pisiortornermikkut pisussaaffimmik tamatuminnga tigusipput. Tassu-ngalu atatillugu sinerissamut qanittumi aalisariutit ungasissoq isigalugu periarfissaat pillugit aali-sarnermut isumalioqatigiissitat periusissatut isumaliutigisaat ataatsimiititaliamit innersuussutigine-qassapput. Taamatut qulaajaasimaneq tunngavigalugu aalisarnermik inuussutissarsiutip siunissaanik misissueqqissaarnermik Naalakkersuisut aallartitsisimanerat ataatsimiititaliamit pitsaasutut isigine-qarpoq. Nunatta karsianut annertuallaamik nanertuutaanngitsumik sinerissap qanittuani raajarniar-nerup aaqqissuussaananerannik naleqqussaananerup aalisariutaatillit nammineerlutik iliuuseqarnerisigut piviusunngortinneqarsinnaanera misissueqqissaarnissami Naalakkersuisunit aamma nalilerneqassa-soq ataatsimiititaliamit naatsorsuutigineqarpoq.

Saattuarniarnermut immikkut tunngasut

Naak piffissami tassani pisassiissutit affaannangajannngortinneqarsimagaluartut saattuarniarnissamut 2008-mi 2009-milu akuersissutit amerliartorsimasut Naalakkersuisunut ilaasortaq allattoq ataatsimiititaliap maluginiarpa. Aalisarnermik aqutsineq nassuiaatigineqartoq saattuarniarnierup imminut akilersinnaasumik ingerlanneqalernissaanik ilungersuutiginninnermut naapertuutinnitsoq ataatsimiititaliaq isumaqarpoq. Taamaattumillu aalisarnerup tamatuma aqutsivigineqarnerata 2010-mi naleqqussarnissaanik Naalakkersuisunut ilaasortap oqariartuuteqarnera ataatsimiititaliamit iluarisimaarneqarpoq.

Konto pingarneq 51.01.01 Aalisarnermut, Piniarnermut Nunalerinermullu Aqutsisoqarfik

Piniarnermut Siunnersuisoqatigiinni ukioq manna ataatsimiinnissat telefonikkut ingerlanneqarnissaat Aningaasaqarnermut Ataatsimiititaliamit nuannaarutigineqarpoq. Pissusissaatut sipaarniuteqarneq taanna, siunnersuisartutut ingerlasunut allanut maligassiuisutut isigineqarsinnaasoq iluarisimariini ataatsimiititaliap oqaatigissavaa.

Konto pingarneq 51.01.04 Aallarteqqinnissamut tapiissuteqartarneq

Konto pingarneq una pillugu saaffiginnissummik Aalisarnermut Ataatsimiititaliamit Aningaasaqarnermut Ataatsimiititaliaq tigusaqarpoq, tak. ilanngussaq G. Aningaasanut taarsiissutaasinnaasunut qaffasinnerpaaffiup 25.000 kr.-init 40.000 kr.-inut qaffanneqarsinnaanera isumaliutigineqarsinnaasoq Aalisarnermut Ataatsimiititaliaq saaffiginnissummi allappoq. Kontomut pingarneq aningaasaliissutaareersut iluini tamanna ingerlanneqarsinnaasoq Aalisarnermut Ataatsimiititaliaq isumaqarpoq. Aalisarnermut Ataatsimiititaliap siunnersuutaa piviusunngortinneqassappat pisut aallarteqqinnissamut tapiissuteqarfigineqarsinnaasut ikinnerulernissaat Aningaasaqarnermut Ataatsimiititaliamit tunngavissaatinneqartariaqassaaq. Kontomili pingarneq tamakkiisumik aningaasaliissutit piffissaq qanittoq ungasinnerusorluunniit isigalugu qaangerneqanngippata Aalisarnermut Ataatsimiititaliap kissaataata malinneqarnissaa Aningaasaqarnermut Ataatsimiititaliamit akornutissaqartinneqanngilaq, tamannalu Naalakkersuisunut naliligassanngortinneqarlunilu iliuseqarfigisassanngortinneqarpoq. Allannguutilli taamaattut kisaatiginartinneqanngitsut isumasioqatigiilluni ataatsimiinnermi Naalakkersuisunut ilaasortap paasissutissiissutigimmagu ataatsimiititaliamit maluginiarneqarpoq.

Konto pingarneq 51.01.06 Piniarnermik nakkutilliisoqarneq

Sunngiffimmi piniartut piniarnermut allagartunut akiliutaannik qaffaanikkut piniarnermik nakkutilliisoqarnermut aningaasartuutit ilaat amerlanerusut matussuserneqarsinnaanersut Aningaasaqarnermut Ataatsimiititaliamit apeqqutigineqarpoq (apeqqut 11.8).

Piniarnermut allagartamut ataatsimut aningaasartuutit maanna akiliutigittinneqartartumit 50,00 kr.-iusumit matussuserneqartartut isigineqartut aammalu akiliummik qaffaaneq akitsuusiinertut isigineqarsinnaasoq Naalakkersuisut paasissutissiissutigaaq.

Sunngiffimmi piniartuunermut allagartamut akiliut 250 kr.-eqalersinneqarpat, tamanna suut tamaasa ilanngutereerlugit nunatta karsiata ukiumut 2 mio. kr.-inik isertitaqarneranik nassataqartussatut Naalakkersuisunit nalilerneqarpoq.

Konto pingaarneq 51.01.07 Aalisartut piniartullu siunnersortinit sullinneqarnerat

Siunnersortit sullissinerinut aningaasartuutit ilaasa matussuserneqarnissaat siunertaralugu kontomi pingaarnermi matumani isertitaqarnissaq siusinnerusukkut ilanngunneqartarsimavoq. Pilersaarutit taakku maanna taamaatinneqarsimasorinarput.

Konto pingaarneq 51.02.03 Puisit amiinik tunisinermi akinut tapiissutit

Tapiissutit nunap immikkoortuini sumiiffinni aalajangersimasuni piniartunut pingaarnerutillugu tunniunneqartarnissaannik Naalakkersuisunut ilaasortaq aalajangiisinnaasoq kontomut pingaarnermut matumunnga aningaasaliinermut tunngavinni allassimavoq. Naalakkersuisut ilassutigalugu paasissutissiissutigaat, taamaattoqassappat Uummanaq, Upernavik, Qaanaaq aammalu Tunu salliutinneqassasut.

Konto pingaarnermut oqaasertaliussamut allannguutissatut siunnersuummik saqqummiusseqqullugit Naalakkersuisut Aningaasaqarnermut Ataatsimiititaliamit qinnuigineqarput, taamaalilluni matumani aningaasaliissutinik siunertanut allanut nuussineq Aningaasaqarnermut Ataatsimiititaliamut siu-moortumik ilisimatsitsissuteqaqqaarluni (imaluunniit akuersiteqqaarlugu) aatsaat pisinnaalluni. Naalakkersuisut akippat kissaatigineqartutut allannguutissatut siunnersuummik saqqummiussisoqassasoq (apeqqut 11.11). Ataatsimiititaliali paasivaa allannguutissatut siunnersuummik taamaatumik aappassaaneerinissamut saqqummiussisoqarsimanngitsoq. Taamaattumik pingajussaaneerinissamut allannguutissatut siunnersuummik taamaattumik saqqummiussinissaq aningaasanut inatsissatut siunnersuutip Inatsisartunit aappassaaneernejarnissaanut akissuteqaamminni **uppernar-saqqullugu** Naalakkersuisut qinnuigineqarput.

Puisit amiinut nunarsuarmi suli tunitsivissaqartoq Naalakkersuisut isumaqarnerat Naalakkersuisunut ilaasortap isumasioqatigiilluni ataatsimiinnermi oqaatigigaa ataatsimiititaliamit oqaatigineqassaaq. Naalakkersuisunullu ilaasortap aamma nassuerutigaa tunitsiveqarniarneq assut tatisimaneqartoq, taamaattumillu nunap immikkoortuinut periusissat aqutigalugit suliniutinik allanik tunngaviliinissaq Naalakkersuisunit suliniutiginiarneqarluni.

Konto pingaarneq 51.03.02 Nunalerinermik inuussutissarsiuteqartunut aningaasalersuinikkut taper-siisarneq

Neqi A/S-ip 2012 tikillugu sullissinissamik isumaqatigiissuteqarfigineqarnissaanut kontomi pingaarnermi matumani aningaasanik immikkoortitsisoqarpoq. Siunertamut taaneqartumut 2013-imut aningaasanik immikkoortitsisoqarsimanngilaq. Tamatumunnga tunuliaqutaasoq Aningaasaqarnermut Ataatsimiititaliamit apeqqutigineqarpoq (apeqqut 11.12). 2012-ip kingorna Neqi A/S-ip immi-nut akilersinnaasumik ingerlalnissaa Naalakkersuisunit naatsorsuutigineqarlunilu tunngavissaa-tinneqartoq Naalakkersuisut paasissutissiissutigaat. Taamaalillunilu 2012-ip kingorna sullissinissa-mut isumaqatigiissummut aningaasanik immikkoortitsinissaq pisariaqartinneqassanngilaq, tamanna-lu Aningaasaqarnermut Ataatsimiititaliamit iluarisimaarlugu tusaatissatut tiguneqarpoq.

Siunertamut konto 51.07 Inuussutissarsiutinut tapersiissutit

Silap pissusaanik pissuteqartumik nunatsinni uillunik kapisilinnillu tukertitsisarnissamut periarfissat killeqartutut isigineqartut Naalakkersuisut paasissutissiissutigaat (apeqqut 3.2). Suliniutilli taamaat-tut New Foundlandimi, silap pissusaa eqqarsaatigalugu uatsinnit allaanerungaanngitsunik atugaqar-fiusumi, ingerlanneqartut ataatsimiititaliamit ilisimaneqarpoq.

Taamaattumillu apeqqut taanna malersoqqullugu Inuussutissarsiornermut Ataatsimiititaliaq Aali-sarnermullu Ataatsimiititaliaq Aningaasaqarnermut Ataatsimiititaliamit **kaammattorneqarput**.

Qeqqussanik nerisassatut atugassanik tunisassiornissamut periarfissanik misissuineq misissuinerni taakkunani ilanngunneqarluarsinnaavoq.

2.7. Suliassaqarfik 62-66 Inuussutissarsiornermut Aatsitassanullu Naalakkersuisoq

Konto pingaarneq 64.01.01 Inuussutissarsiornermut Suliffeqarnermullu Naalakkersuisoqarfik

Aluminiumik suliniummik aqutsinerup Greenland Development A/S-imit naalakkersuisoqarfimmut nuunneqarnissaa qanoq pitsaaquteqarsinnaallunilu ajoquteqarsinnaanersoq Aningaasaqarnermut Ataatsimiititaliap Naalakkersuisunut apeqqutigaa (apeqqut 12.4a). Naalakkersuisut akissutaat innersuussutigineqarpoq, matumanili oqaatigineqaannassaaq aluminiumik suliniummut tunngasumik maanna aaqqissuussisimaneq Naalakkersuisunit pitsaanerpaatut nalilerneqarmat. Taamaattumillu siusinnerpaamik UPA 10-iutinnagu, piginnittuunerup qanoq iluseqartinneqarnissaanik aluminiumul- lu tunngatillugu suliniutip ingerlaqqinnissaa pillugu Inatsisartut aalajangiinissaanik naatsorsuuti- ginninneq sioqqullugu Greenland Developmentip suliassanik aaqqissugaaneraniilluunniit allan- ngortitsisoqarnissaa naatsorsuutigineqanngilaq.

Kiisalu inuussutissanik nunatsinneersunik Danmarkimut EU-llu sinneranut eqqussuisarnermi male- ruagassat eqaallisarniarlugit sulineq sumut killinnersoq ataatsimiititaliap apeqqutigaa (apeqqut 12.4a). Naalakkersuisut ima akipput:

”DK/EU-mut aalisakkanik eqqussuinerup malittarisassanik eqaallisaanermut atatillugu killissaqarfinni eqqussukkanik nakkutilliisoqarfiup Aalborg Havnimit Nuummuk kingusinnerusukkut Sisimiunut nuunneqarnissaa pillugu EU maanna isumaqatigiinniarfigineqarpoq. Ukiup affaata tulliuuttup ingerlanerani tamatuma aaqqiivigineqarnissaa Namminersorlutik Oqartussat naatsorsuutigaat.

Aalisakkat saniatigut nioqutissianik allanik Kalaallit Nunaannit EU-mut tunisisarnerit eqqarsaatigalugit Namminersorlutik Oqartussat naliliipput inuussutissanik eqqussuineq pillugu EU-p maanna malittarisassarititai imaaliiallaannarlugit eqaallisarneqarsinnaanngitsut.

Taamaattorli paasissutissiissutigineqassaaq aalisakkanik EU-mut eqqusseriaaseq eqaallisarneqassappat nersutit nappaataannut suliassaqarfik nunatsinnut nuunneqartariaqartoq. Nersutit nappaataannut suliassaqarfik nunatsinnut nuunneqassappat killissaqarfinni eqqussukkanik nakkutilliineq aallaaviatigut Aalborg Havnimut nuunneqartariaqassaaq.”

Minnerunngitsumik issuakkap immikkoortuani kingullermi allassimasut pingaaruteqartutut Ani- ngaasaqarnermut Ataatsimiititaliamit isigineqarput. Taamaattumillu nersutit nakorsaqaqarnermut su- liassaqaqarfiup nunatsinnut nuunneqarnissaanik naatsorsuutiginninneq pillugu paasissutissat taakku Inatsisartut aalajangiinissaanni tunngavinnut ilanngunneqartariaqarput.

Siunertamut konto 64.13 Suliffeqarneq

“Suliffeqarneq pillugu naalakkersuinikkut Nassuiaat” Naalakkersuisut apeqqut 3.12a-mut akissu- taanni allassimasutut Inatsisartunut agguanneqarsimanngimmat Aningaasaqarnermut Ataatsimiiti- taliamit maluginiarneqarpoq. Nassuiaat ataatsimiititaliamit utaqqimaarneqarallarpoq.

Tamatuma saniatigut kontop pingaarnerup 20.16.01-ip, Naatsorsueqqissaartarfimmut tunngasup, ataani suliffeqarnermi kisitsisitigut paasissutissat pillugit allassimasut innersuussutigineqarput.

Konto pingarneq 64.10.17 Nunami inuussutissarsiutinut takornariartitsinermullu tapiissutit

Vestnorden Travelmart 2009 K benhavnimi ingerlanneqartoq ataatsimiititaliamit maluginiarneqarpoq. Aaqqissuussinerit taamaattut nunani avannarlerni killerni ingerlanneqarluarsinnaasutut ataatsimiititaliamit isigineqarput, taamaattumillu Vestnorden Travelmart 2010-p Islandimi ingerlanneqarnissaa pitsaasutut isigineqarpoq.

Konto pingarneq 64.10.25 Aluminiumik pilersaarut

Aluminiumik aatsitsivimmi ingerlatsisoqalerpat 750-it missaasa sulisorineqarnissaat naatsorsuutigineqartoq Naalakkersuisut apequt 3.3b-mut akissummini paasissutissiissutigaa. Tamatumani soorunami apequtaalluni pilersaarummut akuunissamik UPA 10-mi Naalakkersuisut aalajangivinnerat. 430-it missaat ilinniagaqarsimasuussanngitsut, 180-it tunngaviumik ilinniagaqarsimanissaat, 60-it akunnatumik sivisussusilimmik ilinniagaqarsimanissaat 80-illu missaat ingerlaqqiffiusumik ilinniagaqarsimanissaat naatsorsuutigineqarpoq.

Tamatuma saniatigut tamatuma nassatarisaanik sullissinermik, suliffeqarfimmi il.il. suliaqartut 350-400-it missaat pisariaqartinneqartussatut naatsorsuutigineqarput.

Pilersaarummut atatillugu amerlanerit tunngaviumik ilinniagartinneqarnissaat suliassaavoq anner-tooq.

Tamanna tunngavigalugu ilinniagaqarnerup tungaatigut pisariaqartunik suliniuteqartoqarnissaa siunertaralugu aluminiumik suliniut pillugu Inatsisartut ataatsimiititaliaat aammalu Kultureqarnermut Ilinniartitaanermullu Ataatsimiititaliaq suliamut akuunissamik Aningaasaqarnermut Ataatsimiititaliamit kaammattorneqarput.

Konto pingarneq 66.01.02 Aatsitassarsiorneq

Sajupillatsitsilluni paasissutissanik pissarsiniarluni misissuinernit angusat kingulliit killiffiannik Aningaasaqarnermut Ataatsimiititaliaq tigusaqarpoq. Suliassaqarfimmi ajunngitsumik siuariartortoqarnera Naalakkersuisut akissutaannit takuneqarsinnaavoq. Ilanngussaq B-ip ataani apequt 12.11-imut akissut innersuussutigineqarpoq.

Tamatuma saniatigut aatsitassarsiornermik pilersaarutit arlallit 2010-mi aallartinneqarnissaat (-qinneqarnissaat) naatsorsuutigineqartoq Naalakkersuisut paasissutissiissutigaa. Uku tamatumani pineqarput:

- ”Inngili Qernertoq”: Bly/Zink-mine, Maarmorilimmi, kingusinnerpaamik 31. oktober 2010-mi ingerlatsivigineqalersussatut naatsorsuutigineqartoq.
- ”Angel Gold Mine”: Guldmine, 2010-p aallartinnerani paaanerup ingerlateqqinneqarnissaa naatsorsuutigineqartoq.¹⁰
- ”London Mining mine”: Nuup Eqqaani Isuani saviminermik aatsitassarsiorfik, tamatumani neriuutigineqarluni atuisinnaatitaanermik akuersissummik 2010-mi tunniussisoqarsinnaanera.

Aatsitassarsiornermik pilersaarutit taakku, nunatsinnut aningaasanik suliffissanillu pissarsissutaasinnaasutut naatsorsuutigineqartut aallartisarneqarnissaat Aningaasaqarnermut Ataatsimiititaliamit neriuulluarfiummat oqaatigineqassaaq. Tassunga atatillugu aatsitassarsiornermut ilinniartitaanerit

¹⁰ Siusinnerusukkat Nalunaq Gold Mine

pillugit oqaaseqaatini ataatsimiititaliap innersuussutiginnitsoorumanngilai, tak. konto pingaarneq 40.91.05, Iluarsartuussinermut ilinniartitaanernut tunngasoq.

2.8. Suliassaqarfik 70-73 Ineqarnermut, Attaveqarnermut Angallanermullu Naalakkersuisoq

Suliassaqarfimmut matumunnga Naalakkersuisoq ulloq 25. oktober 2009-mi ataatsimiititaliamit isumasioqatigalugu ataatsimeeqatigineqarpoq. Isumasioqatigiilluni ataatsimiinnissamut allakkiaq tassungalu atatillugu atortussat ilanngussaq E-p ataanut ilanngunneqartut innersuussutigineqarput. Tamatuma saniatigut isumaliutissiissummi immikkoortoq 2.10 innersuussutigineqarpoq.

Konto pingaarneq 70.10.01 Ineqarnermut, Attaveqarnermut Angallanermullu Aqutsisoqarfik, allaf-fissorneq

Aqutsisoqarfimmi pisortatut atorfiit minnerpaamik 25 procentimik ikilisinneqarnissaat anguniagaasoq Naalakkersuisut paasissutissiissutigaat. Aqutsisoqarfimmi sulisuusut pingajorarterutaat ullumikkut pisortaammata, taama anguniagaqarneq naapertuussorinarpoq.

Konto pingaarneq 73.01.15 Usinik assartuineq

RAB'ip angallatissai nutaat

Usinik assartuutissatut angallatinik nutaanik RAB-ip (Royal Arctic Bygdeservice) pisinissamik naatsorsuutiginninnera Aningaasaqarnermut Ataatsimiititaliamit arlalinnik apeqquteqarfingineqarpoq. Tassunga atatillugu suliamut tunngaviusumik isummernini imaattoq ataatsimiititaliap saqqummiuppaa:

” Nunaqarfinnut angallatinik nutaanik pisineq atuisut toqqaannartumik akiuleqartinnerisigut aammalu ersarissumik ingerlanneqarnissaanik qulakkeerilluni sapinngismik pisariaqartoq [-poq] ... Suliffeqarfiup iluani tapiiffigeqatigiittarneq ingerlanneqassanngilaq. Tassunga atatillugu inuiaqatigiit aqqissugaanerat pillugu iliuusissatut pilersaarutit ukiut qulikkaar aallartinneranneersut innersuussutigineqarput.”

Ataatsimiititaliap isummernermini tunuliaqutigisaanut tamakkiisumik tapersiinertik Naalakkersuisut oqaatigaat, tamannalu Naalakkersuisut suliamik isumaliutiginneqqinneranni matuma kingorna aallaaviusussatut isigineqarpoq.

Aningaasaliissutinut akileeqataassutinik akiliuteqartitsisarnikkut angallatit tamakkiisumik aningasalersorneqarnissaat Naalakkersuisut siunnersuutigigaat ataatsimiititaliap soqutigalugu maluginiarpaa. Tamatumani pineqarluni assartuineranut akiliuteqarnermi aningaasanik angallatinik pisinermi aningaasartuutitut matussutissanik immikkut akileeqqussuteqartarnissaq. Tamanna angallatinik ersarissumik toqqaannartumillu aningaasalersuineruvoq, naammaginarluinnartutullu oqaatigisariaqarluni.

Piffissamut ukiunik 20-inik sivisusseqartumut sullissinissaq pillugu RAB-mut Naalakkersuisut isumaqatigiissuteqarnissartik naatsorsuutigimmassuk ataatsimiititaliap isumakulunnartillugu apeqquteqarnermini oqaatigaa. Taamaattumillu piffissamut taama sivisutigisumut isumaqatigiissuteqartoqassappat sullissinissamut isumaqatigiissummut akiliutissat annertussusissaattut siunnersuutigineqartunut sanilliullugu akiliutigineqartussat annikillisinneqarnissaat piumasaqaataasariaqartoq ataatsimiititaliamit oqaatigineqarpoq. Tassunga atatillugu ataatsimiititaliap oqaatiginngitsoorumanngilaa umiarsuaatileqatigiiffiup usinik assartuineq Assartuivik A/S-imit tigullugu ingerlateqqilermagu ukiut arlaqanngitsut matuma siorna atuuttunut sanilliullugu usinik assartuineranut akit RAB-ip ma-

lunnaatilimmik qaffariaateqartimmagit. Taamaattumik angallatinik nutaanik atuilernermi pisariillisaanikkut pissarsiat ilaat sullissinissamut isumaqatigiissutinut akiliutissap ikilisinneqarneranut ator-neqarsinnaassapput – minnerunngitsumik aningaasaliissutinut akileeqataassutissanik akiliisitsisar-nissaq eqqarsaatigineqartillugu. Tamatuma saniatigut aktiaateqarluni ingerlatseqatigiiffiit Nammi-nersorlutik Oqartussanit pineqartut assertuutigalugu ukiumut 2 procentimik sipaaruteqartussanngor-lugit ingerlatsinerminnik aqqissuussisussanngorlugit peqquneqarnissaat ataatsimiititaliap isumaliu-tissiisummi uani piffimmi allami Naalakkersuisunut qinnutigaa. Tamanna RAB-mut, ingerlatsi-nermik ingerlaavartumik pisariillisaanissamik aamma peqquneqartariaqartumut soorunalimi aamma atuuppq. Tamanna sullissinissamut isumaqatigiissutissani aggersuni Naalakkersuisut ilanngutissa-gaat ataatsimiititaliamit naatsorsuutigineqarpoq.

Taamatuttaaq sullissinissamik isumaqatigiissutit ima eqaatsigisumik ilusiligaasariaqarput sullissi-nissami anguniakkat qummut amnulluunniit iluarsineqarsinnaasunngorlugit, tamatumalu nassatari-saanik sullissinissamut isumaqatigiissutinut akiliutit allanngortinneqarsinnaasunngorlugit, taamaa-lionikkut angallannerup ilaanik tamatuminnga maleruagassiuinissamut pingaarnerusutigullu atugas-sarisaasunik inerisaanissamut Inatsisartut periarfissaqarnerat attatiinnaarneqaaqullugu.

Sullissinissamik nutaamik isumaqatigiissuteqartoqannginnerani nunatsinni usinik angallassineq suliariumannittussarsiuunneqassasoq ukioq kingulleq aningaasanut inatsisissatut siunnersuutip su-liarineqarneranut atatillugu taamani Naalakkersuisuusut paasissutissiissutigaat. Siuliani oqaatigine-qartut suliariumannittussarsiuussinissamut atortussanut tamatumalu kingorna isumaqatigiinniarni ilanngunneqarnissaat naatsorsuutigineqarpoq.

Konto pingarneq 73.02.02 Umiarsualivinnik aserfallatsaaliineq

Umiarsualivinnik aserfallatsaaliinermi kinguaattoorutit 80 mio. kr.-it missaannut tagginneqarsima-sut Naalakkersuisut paasissutissiissutigaat (apeqqut 13.8). Taama annertutigisumik kinguaattoorneq Aningaasaqarnermut Ataatsimiititaliamit isumakulunnartinneqarpoq, minnerunngitsumik usinik ilaasunillu angallassinermi umiarsualiviit qanoq pingaaruteqartiginerat eqqarsaatigigaanni.

Kinguaattoorneq taanna qaangerniarlugu ukiuni aggersuni aningaasanut inatsisissani aningaasanik immikkoortitsinissaq anguniaqqullugu Naalakkersuisut Aningaasaqarnermut Ataatsimiititaliamit **kaammattorneqarput**. Taamatuttaaq suliaasaq taanna malinnaaffigeqqullugu Ineqarnermut Atta-veqarnermullu Ataatsimiititaliaq ataatsimiititaliamit **kaammattorneqarpoq**.

Siunertamut konto 73.94 Nukissiorfiit

Kujataani erngup nukinganik innaallagissiorfik pillugu eqqartuussivikkut suliaassanngortitsinermi Nukissiorfinnut 220 mio. kr.-inik piumasaqarneq tunngavissaqanngitsutut Naalakkersuisunit nali-lerneqartoq ataatsimiititaliamit maluginiarneqarpoq. (Apeqqut 3.18) Paasissutissaq taanna iluarisi-maarlugu Aningaasaqarnermut Ataatsimiititaliamit tusaatissatut tiguneqarpoq. Suliaq aalajangiiffi-gineqariarpat kinguarsaanertaqanngitsumik ilisimatitsissuteqarfigineqarnissani ataatsimiititaliap **qinnutigaa**.

Aalisakkanik suliffissuit innaallagissamut imermullu immikkut akikillisaaffigineqartarnerat, taa-maalillutillu innaallagissamut imermullu akiviusut affat inorlugit akiliisinneqartarnerat Nukissiorfiit sullitaannut allanut saniullugu immikkoortitsinertut isiginagu Naalakkersuisut naliliinerat ataatsi-miititaliamit aamma maluginiarneqarpoq (apeqqut 13.9).

Tamanna ataatsimiititaliamit maannangaq tusaatissatut tiguneqarallarpoq. Aalisakkanik suliffissuit innaallagissap erngullu akiviinik akikinnerusumik akiliisarnerat ungasinnerusiq isigalugu attanneqarsinnaanersoq ataatsimiititaliamit periarfissaq iluatsillugu isumaliutigineqarsimavoq. Aalisakkanik suliffissuarnut taamatut tapiissuteqartarneq aalisarnermik inuussutissarsuteqarnermi tassungalu atatillugu ingerlatani suliffissaqartitsinissamik naalakkersuinermik suliaqartut kissaateqarnerat eqqarsaatigalugu naapertuututut immaqa isigineqarsinnaavoq. Aammalu nunatsinni unammillersinnaasunik aalisakkanik suliffissuaqassagutta innaallagiamik imermillu akikitsumik atuisinnaanissaq pisariaqarsinnaavoq. Taamatulli annertutigisumik tapiissuteqartarneq kajumikkunnaarnermik aamma nassataqarsinnaavoq. Taamaalillunilu innaallagissamik imermillu akikitsumik atuisinnaaneq taakkuninnga atuiunerup killilersimaarneqarnissaanik kajumissutsip killeqalerneranik kinguneqarsinnaavoq. Taamatuttaaq tapiissuteqarneq aalisakkanik suliffissuit nutaat piffinni inuiaqatigiit tungaannit isigalugu tunisassiorfiliiffigissallugit naapertuutinningsuni pilersinneqarnerannik kinguneqarsinnaavoq.

Taamattumillu aalisakkanik suliffissuarnut tapiissutaasartut ilaasa assersuutigalugu teknologimik innaallagissamut imermullu sipaarutaasinnaasunik atuilernissamut tapiissutitut tunniunneqarsinnaanerat tunngaviusumik isigalugu isumaliutigineqarsinnaavoq. Pisuni ataasiakkaani assersuutigalugu tunisassiornermut atortunik innaallagissamut imermullu sipaarutaasinnasunik ikkussuinerup innaallagissamut imermullu suliffinnut akikillisaassutinut taarsiullugu Namminersorlutik Oqartussanit akilerneqarnissaa suliffeqarfinnut isumaqatigiissutigineqarsinnaavoq. Taamaaliornermi suliffeqarfimmut akikillisaassummik appartitsineq suliffeqarfiup angusaanut allannguutaasuusaajunnaarlugu aaqqinneqassaaq. Tamatuma peqatigisaanik Nukissiorfiit tunisassiornermini aningaasartuutaasa ikilineqarnerisigut inuiaqatigiit sipaaruteqassapput. Taamatut iliuuseqarneq akiviit aallaavigineqarnissaannik nalinginnaasumik anguniagaqarnermut ilaatissallugu naleqquttuunersoq isumaliutigeqqullugu Naalakkersuisut Aningaasaqarnermut Ataatsimiititaliamit **kaammattorneqassapput**.

2.9. Suliassaqarfik 77 Nunami Namminermi pissutsinut Naalakkersuisoq

Siunertamut konto 77.05 Avatangiisit pinngortitarlu

Eqqagassalerinermut pilersaarut

Aningaasaqarnermut Ataatsimiititaliap apeqqutaanut 7.5-imut Naalakkersuisut akissutaat naapertorlugu eqqagassalerinermik pilersaarutip aallartisarneqarnissaanut Naalakkersuisut aningaasassarsinnaasimangillat. Minnerunngitsumik kommunit aningaasaleeqataanissaat pillugu kommunit umaqatigiissuteqarfigineqarsinnaasimangillat.

Tassunga atatillugu Eqqissimatitsinermut Avatangiisinullu Ataatsimiititaliamit saaffiginnissummik Aningaasaqarnermut Ataatsimiititaliaq tigusaqarpoq. Saaffiginnissut ilanngussaq H-tut ilanngunneqarpoq.

Eqqagassalerinermut pilersaarutip aallarnisarneqarnissaanut aningaasanik atugassiisoqassasoq Eqqissimatitsinermut Avatangiisinullu Ataatsimiititaliap kaammattuutigaa. Taamaalillunilu ataatsimiititaliaq taaneqartoq isumaqarpoq eqqagassalerineq pillugu pilersaarutip aningaasanut inatsisissatut siunnersuummut ilanngunneqarsimanginnera naalakkersuinerup avatangiisillu tungaannit isigalugu attanneqarsinnangitsoq. Taamatuttaaq pilersaarutip piviusunngortinneqarnissaata aallartinneqannginnerata kingunerisassaanic qulaajaanissaq ataatsimiititaliamit kissaatigineqarpoq.

Eqqissimatitsinermut Avatangiisinullu Ataatsimiititaliap saaffiginnissutaa pitsaasutut isigigini Aningaasaqarnermut Ataatsimiititaliap oqaatigissavaa. Taamatuttaaq eqqagassalerinermik pilersaarutip, minnerpaamilluunniit taassani immikkoortut ataasiakkaat atulersinneqarnissaasa aallartinneqarnissaannut piaartumik aningaasaliinissaq pisariaqartutut Aningaasaqarnermut Ataatsimiititaliamit isigineqarpoq.

Eqqagassalerinermut pilersaarut pillugu nassuiaat Inatsisartunit ukiup ataatsip matuma siorna oqaluuserineqarpoq (UKA 08/120). Piffissamut pilersaaruteqarfiusumut ukiunik sisamanik sivisussulimmut (2010-2013) agguataarlugit aningaasaliissutissat 132,0 mio.-it eqqagassalerinermut pilersaarummiittut nassuiaammit takuneqarsinnaavoq. Piffissami tassani ingerlatsineq aqutsinerlu aningaasartuuteqarneruffiusussatut naatsorsuutigineqarput. Taakku 2010-mi ukiumut 4 mio. kr.-it missaannit 2013-imi ukiumut 24 mio. kr.-it missaannut qaffattussatut tagginneqarput.

Tamatuma kingorna piffissaq pilersaaruteqarfik ukiunik arfineq pingasunik sivisussusilik pilersaarummi aallaavigineqarpoq (2014-2021). Piffissap tamatuma ingerlanerani pisortat 267 mio. kr.-inik aningaasaliissuteqarnissaat naatsorsuutigineqarpoq. Ingerlatsinermut aqutsinermullu aningaasartuutit 2014-imit ukiumut 32 mio. kr.-it missaannit 2021-imit ukiumut 75 mio. kr.-it missaannut qaffattussatut naatsorsuutigineqarput.

Aningaasaqarneq maannatut ilungersunartorsiortillugu, tassa aningaasanut inatsit amigartooruteqarfiutillugu Aningaasaqarnermut Ataatsimiititaliamit ajuusaarutigalugu oqaatigineqassaaq eqqagassalerinermik pilersaarutip tamakkiisumik aallarnisarneqarnissaanut aningaasanik immikkoortitsinissaq ajornassasoq. Tamatumali peqatigisaanik eqqagassalerinermik pilersaarutip piviusunnigortinneqarnissaata ukiumit ukiumut kinguartinneqartuarnera attanneqarsinnaanngitsoq ataatsimiititaliap isumaqarpoq. Taamaattumillu aningaasanik tassunga immikkoortitsisoqarsinnaaleriarpat eqqagassalerinermik pilersaarutip aningaasanut inatsimmi pingaarnersiuiinermut ilanngunneqarnissaa pilersaarutilluunniit piviusunnigortinneqarnissaanut allamik piffissaliinissap suliniutiginnissaa Naalakkersuisunut ataatsimiititaliap **kaammattuutigissavaa**.

Konto pingarneq 77.02.01 Kommuninut Nakkutilliisoqarfik

Kommunit kattunnissaat sioqqutitsiarlugu Narsami kommunalbestyrelsiusimasup aningaasatigut iliuusai pillugit paasissutissinneqarnissani Aningaasaqarnermut Ataatsimiititaliap Naalakkersuisunut qinnutigaa, tamatumani akisussaatitsisoqalersaarnersoq pillugu paasissutissiinissaq Aningaasaqarnermut Ataatsimiititaliamit immikkut kissaatigineqarsimalluni (apeqqut 14.2).

Karsimik taama imaarsineq Nakkutilliisoqarfimmit sakkortuumik uparuarneqarsimasoq Naalakkersuisunit paasissutissiissutigineqarpoq. Taamaallunilu karsip imaanera kommunini suliaasaqarfiit aqqissuuteqqinneqarnerat pillugu Inatsisartut inatsisaanni nr. 14-imi, 19. november 2007-imeersumi § 20-imi aalajangersakkamik unioqqutitsinerusoq oqaatigineqarpoq.

Naalakkersuisut ilassutigalugu paasissutissiissutigaat Nakkutilliisoqarfik suliami iliuuseqqaqilersaanngitsoq.

Tassunga atatillugu kommunit aqunneqarnerat pillugu Inatsisartut inatsisaanni nr. 14-mi, 5. december 2008-meersumi kapitali 9 Aningaasaqarnermut Ataatsimiititaliamit maluginiarneqarpoq (aqutsinermut inatsit). Kapitalimi taaneqartumi iliuusereriikkanut kinguneqartitsinerit taarsiissuteqarnerillu pillugit aalajangersagaqarpoq. § 69, imm. 2, aamma § 71, imm. 1 immikkut, taakkuinnanngit-sulli innersuussutigineqarput.

Nakkutilliisoqarfiup allagaa, Aningaasaqarnermut Ataatsimiititaliamit nuutitanngorlugu tiguneqartoq, Naalakkesuisulluunniit Aningaasaqarnermut Ataatsimiititaliamut akissutaa iliusereriikkanut kinguneqartitsinissaq taarsiissuteqartitsinissarlu pillugit tunngavilersuutinik erseqqinnerusumilluunniit isumaliutiginninnermik imaqaqngimmata ilassutitut ima apeqquteqarnissaq ataatsimiititaliap tunngavissaqarsoraa:

- 1) Aalajangersakkat siuliani taaneqartut ilaat akisussaanerluunniit pillugu aalajangersakkat allat suliami matumani pineqartumi Nakkutilliisoqarfimmit atortussanngortinneqarsinnaappat?
- 2) Taamaassimappat Nakkutilliisoqarfiup taama ilunnginnissamik toqqaanera pillugu nassuiaat sukkumiisoq kissaatigineqarpoq.

Apeqqutinut siuliani taaneqartunut immikkut akissuteqaammik isumaliutissiissutip matuma tunniunneqarnerata kingorna ullut arfineq marluk qaangiutsinnagit pissarsisneqarnissaq Aningaasaqarnermut Ataatsimiititaliamit **qinnutigineqarpoq**.

Konto pingarneq 77.05.01 Mingutsaaliuineranut atortulersuutit, ingerlatsineq

Missingersuutinut ilanngussami suliassami kisitsisunik ilanngussinissaq siunertaralugu konto pingarneq pillugu allannguutissatut siunnersuummik saqqummiusseqqullugit Aningaasaqarnermut Ataatsimiititaliap apeqqutinimi Naalakersuisut qinnuigai. Naalakersuisut akissumminni tamanna akuersaarpaat (apeqqut 14.4b). Ataatsimiititaliali paasivaa allannguutissatut siunnersuummik taamaattumik aappassaaneerinissamut saqqummiussisoqarsimanngitsoq. Taamaattumik pingajussaanerinissamut allannguutissatut siunnersuummik taamaattumik saqqummiussinissaq aningaasanut inatsisissatut siunnersuutip Inatsisartunit aappassaaneerneqarnissaanut akissuteqaamminni **uppernarsaqqullugu** Naalakersuisut qinnuigineqarput.

2.10. Suliassa qarfik 80-89 Ineqarnermut, Attaveqarnermut Angallanermullu Naalakkersuisoq

Suliassa qarfimmu matumunnga Naalakkersuisoq ulloq 25. oktober 2009-mi ataatsimiititaliamit isumasioqatigalugu ataatsimeeqatigineqarpoq. Isumasioqatigiilluni ataatsimiinnissamut allakkiat tassungalu atatillugu atortussat ilanngussaq E-p ataanut ilanngunneqartut innersuussutigineqarput.

Sanaartornermut Iluarsaanermullu Aningaasaateqarfik

Suliassani aalajangersimasuni sanaartugassanut iluarsagassanullu aningaasaliissutissatut missingersuusiartineqartut tamarmik Sanaartugassanut Iluarsagassanullu Aningaasaateqarfimmut nuunneqassapput. Ukiup ataatsip iluani sanaartugassat aningaasaliiffigineqarsimasut suliarineqarsimatinnagit, aningaasat Sanaartugassanut Iluarsagassanullu Aningaasaateqarfiup missingersuusiornikkut teknikkimut tunngassutilinnik suliaqartut sanaartugassat pineqartut naammassineqarnissaannut katersor-tassavai.

Sanaartornermut Iluarsaanermullu Aningaasaateqarfimmut tunngavigisat missingersuusiornermut inatsisip kapitaliata tallimaani tassungalu nassuiaatini erseqqinnerusumik nassuiaatigineqarput.

Sanaartugassanut Iluarsagassanullu Aningaasaateqarfimmi aningaasat uninngasuutigineqartut amerliartuinnarnerannik ajornartorsiut Aningaasaqarnermut Ataatsimiititalianit assigiinngitsunit ukiuni arlaqalersuni tikkuarneqartarsimavoq. Aningaasanik uninngasuuteqartarnermut ilaatigut pissutaavoq aningaasaliissutissanik naliliinerminni Naalakkersuisut isumalluarpallaartarnerat. Ukiuni arfineq

marlunni kingullerni aningaasanut inatsisinut ataatsimiititaliap isumaliutissiissutigisartagai inner-suussutigineqarput.

Aningaasaateqarfimmi aningaasat uninngasuutigineqartut ukiuni aggersuni ikileriarnissaat naatsorsuutigineqartoq Naalakkersuisut paasissutissiissutigaat. Taama oqarneq Aningaasaqarnermut Ataatsimiititaliamit maluginiarneqarpoq. Taamatulli naatsorsuutiginninneq ukiut siuliini aningaasanut inatsisissatut siunnersuutini aamma allaqqasarsimasoq ataatsimiititaliamit maluginiarneqarpoq.

2008-p naanerani Sanaartornermut Iluarsaanermullu Aningaasaateqarfimmiipput 880 mio. kr.-it missaat.

Nammineq pigisassatut illuliortiternermut ukiuni kingullerni annertoorujussuarmik aningaasalersuineq aningaasat atorneqaratik uninngaannartut amerliartornerannut immikkut peqataaqataavoq. Immikkoortumi ullumikkut ingerlatseriaaseq imaappoq; qinnuteqaateqartoqarnera naapertorlugu sanaartornissamut taarsigassarsisitsinissamik Naalakkersuisut nalunaaruteqartarlutik, tamatumalu kingorna aningaasaliissutit Sanaartornermut Iluarsaanermullu Aningaasaateqarfimmut nuunneqartarlutik. Taarsigassarsiallu sanaartorneq aatsaat naammassereeraangat taarsigassarsisumut tunniunneqartarput. Taamaattumillu taarsigassarsiniartup qinnuteqarneranit sanaartornerup naammassineqarnissaata tungaanut ukiut arlallit ingerlareersimasinnaasarput. Tamatuma kingunerisaanik piffissami tassani taarsigassarsiaritit atorneqaratik Sanaartornermut Iluarsaanermullu Aningaasaateqarfimmi uninngaannartarput. Taarsigassarsiatut akuersissutigineqartunik Sanaartornermut Iluarsaanermullu Aningaasaateqarfimmut Namminersorlutik Oqartussat uninngatitassangorlugit nuussisarnerat piginnaatitsissummik tunniussisarnermik tunngaveqarnermik pissuteqarpoq. Taama tunngaveqarnerup kingunerisaanik aningaasat erseqqinnerusumik nassuiaatigisat inatsisit malillugit piumasaaqatigineqarsinnaalerspata aningaasartuut aningaasartuutigineqarsimasutut isertitallu tiguneqarsimasutut isigineqarsinnaalersarput. Tapiissuteqarnissamik taarsigassarsisitsinissamillu neriorsuutitut tunngatilugulu Namminersorlutik Oqartussat neriorsuummik pituttuisumik nalunaarutiginnikkaangata taamaallutillu pisussaaffimmik tigusigaangata aningaasartuut aningaasartuutigineqartutut isigineqartarpoq, tamatumani apeqqutaatinneqarneq ajorpoq ukiumi aningaasanut inatsisip maanna atuuffiani kingusinnerusumiluunniit aningaasanik tunniussinissaq pissanersoq. Tamatuma kingunerisaanik nammineq pigisassatut illuliornissamut neriorsuut ukiumi neriorsuummik tunniussiffimmi aningaasatigit sunniuteqartarpoq (IST-mi sunniut). Tamanna aamma atuuppoq aningaasat ukiut pingasut qaangiunnerini aatsaat atorneqaraluarpataluunniit. Taamaaliornikkut aningaasat piffissami sivisunerusumi atorneqaratik uninngaannartinneqartarnerat naapertuutinngitsutut isumaqarfigineqarsinnaavoq.

Aningaasat Sanaartugassanut Iluarsagassanullu Aningaasaateqarfimmi atorneqaratik uninngaannartussaasut ilisimagaluarlugu aningaasanik qinnuteqartoqartaqqunagu sanaartugassanut aningaasaliisutunik atuinissamik **piviusorsioortumik** missingersuusiortarnissamik Naalakkersuisut qulakkeerininnissaat Aningaasaqarnermut Ataatsimiititaliamit **kaammattuutigineqassaaq**.

Aktiaateqarluni illuutileqatigiiffik Illuut A/S

Aktiaateqarluni illuutileqatigiiffiup siuliani taaneqartup pilersinneqarnissaanut piginnaatitsissummik tunineqarnissaq Naalakkersuisut qinnutigaat, tak. aappassaaneerinissamut allannguutissatut siunnersuut nr. 116. Aningaasanut inatsisissatut siunnersuummi oqaasertaliussat naapertorlugit Namminersorlutik Oqartussat illuutaanik (tassunga ilanngullugu ilaatigit Nuummi blok P) isatერიarluni nutaanik sananissaq aammalu illunik nutaanik sananissaq piginnittuunissarlu siunertaralugit realkreditimit taarsigassarsiniarnissaq ingerlatseqatigiiffiup immikkut siunertaraa. Inissianik nali-

nginnaasumik attartortittakkanik sananissaq siunertaralugu ingerlatseqatigiiffiup realkreditimit taarsigassarsisarnissaa naatsorsuutigineqartoq immikkut soqutiginaateqarpoq.

Namminersorlutik Oqartussat inissiaataanik attartortittakkanik Illuut A/S *aqutsisuussanngilaq*, suliassarmi taanna A/S Inissiaatileqatigiiffimmit INI-mit ingerlanneqaannartussatut naatsorsuutigineqarmat.

Illuut A/S-ip erseqqinnerusumik oqaluuserineqarnissaa siunertaralugu aningaasaliissuteqarnissamik suliassamut 09-436-imut atatillugu Ineqarnermut, Attaveqarnermut Angallanermullu Naalakkersuisoq isumasioqatigiilluni ataatsimiinnissamik Aningaasaqarnermut Ataatsimiititaliamit quigineqarpoq. Isumasioqatigiilluni ataatsimiinnissamut Naalakkersuisunut ilaasortap allakkiaa kiisalu tasunga atatillugu Illuut A/S pillugu allakkiaq, tamarmik ilanngussaq E-tut ilanngunneqartut innersuussutigineqarput. Allanguutissatut siunnersuummut 116-imut nassuiaatit aamma innersuussutigineqarput (Suliassaqarfimmi 80-89-imi, Sanaartornermut iluarsaanermullu tunngasumi, oqaasertaliussamut nr. 9-mut allanguutissatut siunnersuut). Allanguutissatut siunnersuut taaneqartoq isumaliutissiisummut ilanngussaq D-tut ilanngunneqarpoq. Kiisalu isumaliutissiisummi immikkortoq 4 innersuussutigineqarpoq.

Illuut A/S-imik ilusiliineq naapertuuttuunersoq Aningaasaqarnermut Ataatsimiititaliamit isumaqatigiiffiunngilaq.

Aningaasaqarnermut Ataatsimiititaliami ikinnerussuteqartut, Siumup Atassutillu sinniisaasa erseqqis-sarumavaat, soorunami akerliunnginnamik suliniutinut inissianik amerlanernik pilersitsinernik kinguneqartussanut, minnerunngitsumik akissaatikinnerit akilersinnaasaannik inissianik neqerooruteqarsinnaanerup qularnaarneqarnissaa eqqarsaatigalugu. Taamaattorli ingerlatseqatigiiffik Illuut A/S eqqarsaatigalugu aqqissuussaaneq suli nalorninartorta-qarpoq, qularnaatsumillu oqaatigineqarsinnaanani taamatut aqqissuussineq ilumut inatsisiliornernut naapertuunnersoq. Tamatuma saniatigut sanaartornermi suliassat annertoorujussuit ingerlatseqatigiiffimmut suliluunniit pilersinneqanngitsumut akisussaaffigisassanngortissallugit illersorneqarsinnaanngitsunut isigineqarpoq.

Atassutip sinniisaata tamatuma saniatigut immikkut pingaartippaa aqqissuussinerup inatsisitigut naapertuuttuunera suli pitsaanagerusumik uppenarsaaseqqaarneqartariaqartoq Naalakkersuisut inasuteqaataat akuersissutigineqarsinnaassappat.

Aningaasaqarnermut Ataatsimiititaliami amerlanerussuteqartut, Inuit Ataqtigiit Demokratillu sinniisaasa tunngavissaatippaat Naalakkersuisut naapertuuttumik isumannaatsumik qulaajarlugulu qularnaarsimassagaat Illuut A/S eqqarsaatigalugu aqqissuussineq inatsisinut naapertuutiinnarani aamma aningaasaqarniarnikkut pissusissamisussasooq, taamaaliornikkut Nunatta Karsiata naatsorsuutiginnngisamik annaasaqariataarsinnaanera pinngitsoortinniarlugu.

Konto pingarneq 84.40.10 Kommunini atuarfiit

Atuarfik pillugu peqqussut naapertorlugu atuarfimi atuartitsinermut sanaartornermullu aningaasartuutit tamarmik kommuninit aningaasartuutigineqassapput. Atuarfitsialaap akuersissutigineqarnera, tamatumalu nassatarisaanik atuarfinni init atuartitsiviusut anginerunissaannik piumasagaatit kiisalu minnerunngitsumik suliassaqarfimmi tassani iluarsaanermi kinguaattoorutit annertuut pissutigalugit atuarfinni immikkut iluarsaassinernut aningaasartuutit kontomi pingaarnermi matumani akilerneqartarput.

Ukiunut qulinut immikkoortumut pilersaarut malillugu suliassat tulleriiaariffigineqarput. Pilersaarut pisariaqartitsinerup, kissaatit aningaasatigullu tulleriiaarinerup akornanni naapeqatigiissitsiniarsi-manermik takutitsivoq.

Kommunit atuarfinnik aserfallatsaaliisannginnerat iluarsaanermi kinguaattoornerit ilaannut pissu-taasoq ataatsimiititaliap ilisimavaa. Taamaattumillu iluarsaanissamut pisussaaffimminnik pimoorus-seqqullugit kommunit Naalakkersuisunit kaammattorneqartariaqartut ataatsimiititaliamit erseqqis-sarneqassaaq, taamaaliornikkut atuarfiit iluarsaateqammersut iluarsaaqqittariaqalernermik kingune-qartumik aserfallaqqeqqunagit. Aserfallanneq ajorluinnalerpat Namminersorlutik Oqartussat akili-gassamik tigusinissaat naatsorsuutigalugu atuarfiup (iluarsaateriikkap) aserfallatsinnissaanut kom-munit aningaasaqarneq eqqarsaatigalugu qaqugukkulluunniit kajumilersinneqanngisaannassapput.

Suliassaqarfimmi matumani ukiumut 100 mio. kr.-inik atuinissaq ukiuni arlaqartuni anguniagaasi-mavoq. 2010-li aallarnerfigalugu 80 mio. kr.-innaat immikkoortinneqartarnissaat Naalakkersuisut siunnersuutigaat. Tamanna isumakuluutigineqartoq Aningaasaqarnermut Ataatsimiititaliamit oqaa-tigineqarpoq. Taamaattumik ukiumut 100 mio. kr.-inik immikkoortitsisarnissaq anguniaqqeqqullu-gu Naalakkersuisut ataatsimiititaliamit kaammattorneqarput. Taamaallunilu atuarfinnik iluarsaa-nermik kinguaattoornerit anguneqarnissaat ilinniartitaanerup immikkut suliniarfigineqarnerata ilaa-tut pingaaruteqarlunnartutut ataatsimiititaliamit isigineqarpoq.

Tamatumunnga Naalakkersuisut oqarput ukiumut 100 mio. kr.-inik sanaartornermut anigaasaliun-neqartartut tamakkerlugit atornissaat ajornakusoortartoq. Ilaatigut sanaartornermi akit qaffasissupi-lussuusimapput, tamannalu arlalitsigut kinguaattoornermik nassataqarsimavoq, ilaatigullu atuartut amerlassusissaannik naatsorsuinerit pillugit kommunit isumaqatigiinnngissuteqarfigineqarsimapput kiisalu nunaqarfinni atuarfinnik sanaartornissap nunap immikkoortuinut pilersaarutissanut ataqati-giissarneqarnissaa Naalakkersuisunit kissaatigineqarpoq. Tamanna ataatsimiititaliamit tusaatissatut tiguneqarallarpoq, tassa nunap immikkoortuinut pilersaarutissat naammassineqarpata suliap ataat-simiititaliamit uterfigineqarnissaa naatsorsuutigineqarluni.

Missingersuutit pillugit Aningaasaqarnermut Ataatsimiititaliap isumasioqatigiinnerani Qaasuitsup Kommuniiani kommunalbestyrelsimut sinniisut peqatigalugit ataatsimiititaliap Atuarfik Mathias Storch takuniarpaa. Atuarfiup iluarsaaneranut aningaasartuutit pillugit kommnit Naalakkersuisullu isumaqatigiinnngissuteqarnerat takuniaanermi ataatsimiititaliamut saqqummiunneqarpoq. Ajornar-torsiut nassuiaateqarfigeqqullugu Naalakkersuisut ataatsimiititaliamit qinnuigineqarput. Tamatuma-ni Naalakkersuisunit immikkut innersuussutigineqarpoq illoqarfimmi atuartut amerlanerpaartaat Jørgen Brønlundip Atuarfiani atuartinneqarsinnaanerata, taamaattumillu Atuarfik Mathias Storchip atuarfia ukioqatigiiaanut klassinut ataasiinnarnut naatsorsuussanngorlugu naleqqussarneqarnissaa taamaallaat pisariaqartinneqarluni, tamannalu 2010-mi aningaasanut inatsisissatut siunnersuummi aningaasaliissutissatut siunnersuutaareersut 66,5 mio. kr.-it atorlugit pisinnaasutut Naalakkersuisu-nit naatsorsuutigineqarpoq. Apeqqummut 15.3 a-b-mut Naalakkersuisut akissutaat ilanngussaq B-p ataaniittoq innersuussutigineqarpoq.

Konto pingarneq 84.40.12 Ilinniartitaanermut sanaartukkat

Sanaartornermi immikkoortup aappaat pingajuallu ataatsimut ilanngullugit Nuummi Ilinniarnertuunngorniarfiup allilerneqarnissaa siunertaralugu kontomut pingaarnermut matumunnga allannguutissatut siunnersuummik saqqummiussinissaq pilersaarutigineqartoq Naalakkersuisut Aningaasaqarnermut Ataatsimiititaliap apeqqutaanut 15.4-mut akissumminni paasissutissiissutigaat. Sanaar-

tornerup immikkoortuata siulliup ingerlanneqarnera pillugu Aningaasaqarnermut Ataatsimiititaliaasimasup sakkortuumik uparuaanikuunera tunngavigalugu Naalakkersuisut akissutaat isigineqassaaq. Ataatsimiititaliaasoq ilaatigut isumaqarsimavoq maanna allilerinissamut pilersaarutissatut missi-ngiusiaq ima suliarineqarsimasoq; sanaartugassap piaartumik allileqqinneqarnissaa itigartinneqarsinnaajunnaartillugu. Taamanili isumaqartoqarsimavoq piffissami qaninnerusumi allilereqqinnissaq pisariaqartinneqassanngitsoq. Tamatuma saniatigut sanaartornissamik suliassap KIIIN-imit anner-tuumik kinguarsarneqarsimanera isornartoqartinneqarsimavoq, tamatumalu nassatarisimallugu sa-naartornerup ukiukkut kingusippallaartukkut aallartisarneqartariaqarsimanera, taamaalillunilu u-kiuunerani sanaartorneq tuaviuutipilunneqartariaqarluni, tamannalu soorunami sanaartornermut akitsorsaataasimavoq.

Allilerinissami ajornartorsiutit siuliani taaneqartut uteqqinneqannginnissaat Aningaasaqarnermut Ataatsimiititaliamit ersarilluinnartumik naatsorsuutigineqarpoq. Pilersaarummik suliarilluakkamik aningaasaqarnikkullu illersorneqarsinnaasumik aammalu Inatsisartunit imaaliallaannarlugu akueri-neqarsinnaasumik saqqummiussisoqarnissaanik Naalakkersuisut piffissaagallartillugu qulakkeer-inissasut naatsorsuutigineqarpoq. Pilersaarummut atatillugu aningaasaliissutit sanaartornerup suk-kassusissaanut piviusorsiortumut naleqqussarneqarsimassasut soorunami naatsorsuutigineqarpoq, tak. sanaartugassanut aningaasaliissutit piviusorsiortumik ingerlanneqartarnissaat pillugu ataatsimii-titaliap kaammattuutaa.

Pilersaarut aningaasanut inatsisissatut siunnersuummut augustip qaammataani saqqummiunneqar-tumut ilanngunneqarsinnaasunngorlugu naammassineqarsimasuuppat pitsaanerpaasimassagaluartoq ataatsimiititaliap oqaatiginngitsoorumanngilaa. Tamannali pinnaasimaganngimmat aningaasa-nut inatsisissatut siunnersuutip aappassaaneerneqarnissaanut allannguutissatut siunnersuummik Naalakkersuisut saqqummiussisimasariaqaraluarput. Allannguutissatut siunnersuutit Inatsisartut pingajussaaneerinissaanut aatsaat saqqummiunneqarsinnaasunngorlugit naammassiniarneqarnis-saat Naalakkersuisut aallaqqaammuli anguniagarisimammassuk naapertuutinngilluinnarpoq. Taa-matut pissusilersorneq inatsisip pitsaasuunissaanut siuarsaataanngilaq, tamatumalu saniatigut tun-ngaviusumik isigalugu pingajussaaneerinissamut allannguutissatut siunnersuutit tassaasariaqarput Inatsisartut aappassaaneerinerannik kiisalu inatsisissatut aalajangiiffigisassatullu siunnersuutini-k Inatsisartunit akuerineqartunik aningaasatigut kinguneqaateqartunik aningaasanut inatsisissatut i-lanngunneqartussanik toqqaannartumik aallaavillit.

Konto pingaarneq 87.72.21 Inissianik kommuninit attartortitassanik tapiissutitalimmik sanaartorneq Siunissami pisortat inissianik attartortittakkanik sanaartornerat (nalinginnaasumik inissiat) realkreditimit aningaasaleeqataaffiusumik pisassasoq sulissutigineqartoq Naalakkersuisut paasissutissiissutigaa. Taamaaliornikkut pisortat aningaasaataat killeqartut inissianik amerlanernik sanaartornermut tapertaanissaat qulakkeerneqaaqullugu. Aningaasalersueriaasissat pillugit isumaliutit siulliit takutikkaat realkrediti 40 procentimit 60 procent tikillugu atorneqarsinnaasoq oqaatigineqarpoq, tamatumani apeqqutaalluni suliassap sanaartorneqartussap kvadratmeterimut akia.

Inissianik attartortittakkanik sanaartorneq annertusiartussappat tamanna tunngaviusumik isigalugu pitsaasutut Aningaasaqarnermut Ataatsimiititaliamit isigineqarpoq – minnerunngitsumik illoqarfin-ni initaarniarlutik utaqqisorpassualinni.

Tamatuma peqatigisaanik nunap immikkoortuinut nunalu tamakkerlugu pilersaarummik ataatsimoortumik suliarinnittoqarnissaanik naammassinnittoqarnissaanillu pisariaqartitsisoqarnera Aningaasaqarnermut Ataatsimiititaliap erseqqissassavaa.

Immikkoortoq 2.10-mut aallarniummi Illuut A/S pillugu allassimasut aamma innersuussutigineqarput.

3. Aningaasaliissutinut allannguutissatut siunnersuutit

Immikkoortoq 1.3-mi taaneqartutut aningaasanut inatsisissatut siunnersuummut allannguutissatut siunnersuutit 206-inik Naalakkersuisut saqqummiussipput. Taakkunannga 28-it oqaasertaliussanut aammalu oqaasertaliussat nassuaataannut allannguutissatut siunnersuutaallutik. Oqaasertaliussanut allannguutissatut siunnersuutit sammisaq 10-t taaguuserneqarput; Sammisaq taanna isumaliutissiissutip immikkoortuani 4-mi sammineqarpoq.

Tamatuma kingorna allannguutissatut siunnersuutit nr. 110 aamma 114 Naalakkersuisunit tunuarinneqarput. Taakku tamarmik oqaasertaliussaapput, taamaalillunilu oqaasertaliussanut allannguutissatut siunnersuutit 26-it sinnerupput.

Tamatuma saniatigut Suleriaaseq pillugu Inatsisartut Ataatsimiititaliaat aningaasaliissutinut allannguutissatut siunnersuutit marlunnik saqqummiussivoq, nr. 207 aamma 208. Taakku sammisaq 20-imut ilaapput.

Aningaasaliissutinut allannguutissatut siunnersuutit sammisanut ukununnga immikkoortinneqarsimapput:

- sammisaq 1 Teknikikkut allanngortitsinerit: allannguutissatut siunnersuutit 53-it
- sammisaq 2 Missingersuutit sunniuteqanngitsumik allanngortitsinerit: allannguutissatut siunnersuutit 10-t
- sammisaq 3 Isertitassatut naatsorsuutigisat nutaat aamma inatsisitigut pisussaaffigalugit aningaasartuutissanut nutaamik naatsorsuutigilikkat: allannguutissatut siunnersuutit 5-it
- sammisaq 4 Meeqqanut inuusuttunullu sillimmatinik atugassanngortitsineq: allannguutissatut siunnersuutit 10-t
- sammisaq 6 Sanaartornermi nussuineq: allannguutissatut siunnersuutit 10-t
- sammisaq 7 Ilinniartitaanermi nussuineq: allannguutissatut siunnersuutit 6-it
- sammisaq 8 Allaffissornikkut sipaaruteqarnerneq: allannguutissatut siunnersuutit 47-t
- sammisaq 9 Utaqqiisaasumik inissiaqarnerup qitiusumik aquneqarneri: allannguutissatut siunnersuutit 37-t
- sammisaq 20 Suleriaaseq pillugu Ataatsimiititaliap allannguutissatut siunnersuutit: allannguutissatut siunnersuutit marluk

Aappassaaneerinermi sammisaq nr. 5-ip ataani kiisalu 11-mit 19-ip ataanni allannguutissatut siunnersuutit saqqummiussisoqanngilaq.

Aningaasaliissutinut allannguutissatut siunnersuutit nr. 1-imit nr. 94-imut kiisalu nr. 123-imit nr. 208-imut *normulersugaapput*. Taamaattorli allannguutissatut siunnersuutit 110 aamma 114 siunnersuuteqartumit tunuarinneqarput.

Aningaasaliissutit pineqartillugit allannguutissatut siunnersuutit ataasiakkaat normui *aningaasaliissutininut takussutissiami* allassimapput; ilanngussaq 1. Aningaasaliissutinut takussutissiat Naalakkersuisut allannguutissatut siunnersuutaannut saarlíngorlugit ilanngunneqarput, taakkulu isumaliutissiisummut ilanngussaq D-tut ilanngunneqarlutik.

Oqaasertaliussanut tunngatillugu normuliunneqartoq oqaasertaliussat siornagut allanneqarpoq. Oqaasertaliussat *ilanngussaq 2*-mik taaguuserneqarput. Taakku oqaasertaliussanut nassuiaatit peqatigalugit isumaliutissiisummut ilanngussaq D-p ataani ilanngunneqarput.

Aningaasaliissutinut aamma oqaasertaliussanut allannguutissatut siunnersuutit ilaat arlallit naqqiuteqarfigneqarput. Taakku isumaliutissiisummut ilanngussaq J-ip ataanut ilanngunneqarput.

Allannguutissatut siunnersuutit ilarpassui saqqummiunneqartigatik pitsaanerusumik kukkunersiorneqarsimasariaqaraluartut Aningaasaqarnermut Ataatsimiititaliamit oqaatigineqassaaq. Naqinnerlukkanat oqaaseqatigiiliornermilu kukkunerit amerlavallaarput. Taamaattumillu allannguutissatut siunnersuutit aningaasanut inatsimmut ilanngunneqartigatik tamarmik sukumiisumik kukkunersiorneqarnissaat ataatsimiititaliamit naatsorsuutigineqarpoq.

3.1 Sammisag 1 - Teknikikkut allannortitsinerit

Qulequttami tassani allannguutissatut siunnersuutinik 53-inik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiunilu missingersuorsiorfiusuni ataatsimut isigalugit IST-mut sunniteqassanngillat. Pineqartut tassaanerupput missingersuutinut ilanngussat oqaasertaasa ilusiligaanerannik erseqqissaanerit annikinnerusut. Allannguutissatut siunnersuutit ilaat taakku Aningaasaqarnermut Ataatsimiititaliap apeqqutaanit aallaveqarput, tak. ilanngussaq A.

Allannguutissatut siunnersuummut nr. 20-imut naqqiummik suliaqartoqarmat immikkut maluginiaqquneqarpoq, tak. isumaliutissiisummi ilanngussaq J.

Sammisag 1-ip ataani allannguutissatut siunnersuutit nr. 1-imit 53-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

3.2 Sammisag 2 - Missingersuutinut sunniteqanngitsumik allannortitsinerit

Qulequttami tassani allannguutissatut siunnersuutinik 10-nik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiunilu missingersuorsiorfiusuni ataatsimut isigalugit IST-mut sunniteqassanngillat.

Allannguutissatut siunnersuutinut taakkununga pissutaanerupput Naalakkersuisut allaffeqarfianni allannortitsinerit. Immikkut taaneqassaaq Ineqarnermut, Attaveqarnermut Angallannermullu Aqut-sisoqarfik atorunnaarsinneqarmat (Allannguutissatut siunnersuut nr. 61), tamatumalu kingorna suliaasaqarfik Naalakkersuisoqarfiup ataanut nuunneqarluni (Allannguutissatut siunnersuut nr. 59).

Sammisag 2-p ataani allannguutissatut siunnersuutit nr. 54-imit 63-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

3.3 Sammisag 3 – Isertitassatut naatsorsuutigisat nutaat aamma inatsisitigut pisussaaffigalugit aningaasartuutissanut nutaamik naatsorsuutigilikkat

Qulequttami tassani allannguutissatut siunnersuutinik 5-inik Naalakkersuisut saqqummiussipput. Allannguutissatut siunnersuutit taakku IST-p inerneranut 2010-mi 25.016.000 kr.-inik aammalu ukiuni missingersuusiorfiusuni pingasuni ukiuni tamani 31,0 mio. kr.-inik ajorseriaataassapput.

Aningaasanut inatsisissatut siunnersuummik saqqummiussinerup kingorna kontonut pingaarnernut arlalinnut missingersuutit eqqornerusumik takutitsisut Naalakkersuisunit suliarineqarsimanerat taakkuninnga allannguutissatut siunnersuuteqarnermut pissutaavoq. Minnerunngitsumik Nationalbankip sinneqartoorutaanit pisassanit isertitassatut naatsorsuutigineqartut ukiuni tamani 25,7 mio. kr.-inik ikilineqarput, tamatumunngalu pissutaavoq aningaasarliornerup kingunerisaanik aningaase-riviit iluanaarutiminnit tunniuttagaasa ikilinerat.

Allannguutissatut siunnersuutitut nr. 66-imut aamma 67-imut naqqiummik suliaqartoqarmat im-mikkut maluginiaqquneqarpoq, tak. isumaliutissiisummi ilanngussaq J.

Sammisag 3-p ataani allannguutissatut siunnersuutit nr. 64-imit 68-imut **akuerineqassasut** Ani-ngaasaqarnermut Ataatsimiititaliamit **inassutigineqarpoq**.

Konto pingarneq 30.12.11 Danmarkimi siusinaartumik pensionisiat

Aningaasaliissutit 2010-mi 1.000.000 kr.-inik ukiunilu missingersuusiorfinni tamani ukiumut 1,0 mio. kr.-inik amerlineqarnissaat naalakkersuisut siunnersuutigaat. 2010-mi aningaasanut inatsisissa-tut siunnersuutit suliarinerani allaffissornikkut kukkusoqarneratigut siusinaartumik Danmarkimi pensionisialinnut marlunnut aningaasanik immikkoortitsisoqanngitsoorpoq, naak taakku 2010-mut tamatumalu kingorna suliaassami kisitsisini ilanngunneqaraluartut. Aningaasanut inatsisissatut siun-nersuutit suliarineqarnerata kingorna siusinaartumik pensionisiallit allanik marlunnik ilapput. Taa-maalillunilu aningaasaliissutit 1 mio. kr.-inik amerleriarnerat siusinaartumik pensionisiallit sisama-nik amerleriarnerat aallaavigalugu isigineqassaaq.

(Allannguutissatut siunnersuut nr. 67)

3.4 Sammisag 4 – Meeqqanut inuusuttunullu sillimmatinik atugassanngortitsineq

Qulequttami tassani allannguutissatut siunnersuutinik 10-nik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiunilu missinger-suusiorfiusuni ataatsimut isigalugit IST-mut sunniuteqassanngillat.

Allannguutissatut siunnersuutit aqutigalugit sillimmatitut immikkoortitat 25 mio. kr.-it, konto pi-ngaarnermi 20.11.70-imi, Suliniutinut nutaanut sillimmatinut tunngasumi, immikkoortinneqarsima-sut atugassiisutigineqarput (Allannguutissatut siunnersuut nr. 69).

Ataatsimut isigalugu qulequttap matuma ataani missingersuutinut ilanngussat ataasiakkaat naam-mattumik paasissutisseeqqalaartutut Aningaasaqarnermut Ataatsimiititaliamit isineqarmata oqaati-gineqassaaq. Atugssiinermi anguniagaasut aappassaaneerineranut akissuteqaamminni erseqqissaq-qullugit Naalakkersuisut ataatsimiititaliamit **qinnuigineqarput**.

Allannguutissatut siunnersuutitut nr. 72-imut aamma 78-imut naqqiummik suliaqartoqarmat im-mikkut maluginiaqquneqarpoq, tak. isumaliutissiisummi ilanngussaq J.

Sammisaq 4-p ataani allannguutissatut siunnersuutit nr. 69-imit 78-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

3.5 Sammisaq 6 – Sanaartornermi nussuineq

Qulequttami tassani allannguutissatut siunnersuutinik 10-nik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiunilu missinger-suusiorfiusuni ataatsimut isigalugit IST-mut sunniuteqassanngillat.

Allannguutissatut siunnersuutit aqutugalugit suliassanut aalajangersimasunut aningaasaliissutit atugassiissutigineqarput/nuunneqarput, minnerunngitsumik ilinniarfinnut ilinniartunullu inissianut aammalu taartitit sanaartukkanut.

Qulequttap matuma ataani allannguutissatut siunnersuutit amerlanersaat ataatsimiititaliami ikinne-russuteqartut, Siumup Atassutillu ilaasortaataaasa akuersissutigisinnaanngilaat. Taamaalillunilu allannguutissatut siunnersuutinut arlalinnut aallaaviuvoq Illuutiqatigiiffimmik Illuut A/S-imik pilersitsinissamik Naalakkersuisut pilersaarutaat. Ikinne-russuteqartut isumaqarput ingerlatseqatigiiffik Illuut A/S eqqarsaatigalugu aqqissuussaneq suli nalorninartorta-qarpoq, qularnaatsumillu oqaatigineqarsinnaanani taamatut aqqissuussineq ilumut inatsisiliornernut naapertuunnersoq. Tamatumani saniatigut sanaartornermi suliassat annerto-orujussuit ingerlatseqatigiiffimmut suliluunniit pilersinneqanngitsumut akisussaaffigisassanngortissallugit illersorneqarsinnaanngitsunut isigineqarpoq.

Aningaasaqarnermut Ataatsimiititaliami amerlanerussuteqartut, Inuit Ata-qatigiit Demokratillu ilaasortaataaasa tunngavissaatippaat Naalakkersuisut naapertuuttumik isumannaatsumik qulaajarlugulu qularnaarsimassagaat Illuut A/S eqqarsaatigalugu aqqissuussineq inatsisinut naapertuutiinnarani aamma aningaasaqarniarnikkut pissusissamisuussasoq, taamaaliornikkut Nunatta Karsiata naatsorsuutiginnngisamik annaasaqariataarsinnaanera pinngitsoortinniarlugu.

Isumaliutissiissummi immikkoortoq 2.10-mut aallarniummi Illuut pillugu amerlanerussuteqartut ikinne-russuteqartullu oqaaseqaataat aamma innersuussutigineqarput.

Aningaasaqarnermut Ataatsimiititaliami ikinne-russuteqartut, Siumup Atassutillu ilaasortaataaasa **inassutigaat** sammisaq 6-ip ataani allannguutissatut siunnersuutit nr. 80, 81, 84, 86, 87 aamma 88 **itigartinneqassasut**.

Aningaasaqarnermut Ataatsimiititaliami amerlanerussuteqartut, Inuit Ata-qatigiit Demokratillu ilaasortaataaasa **inassutigaat** sammisaq 6-ip ataani allannguutissatut siunnersuutit nr. 80, 81, 84, 86, 87 aamma 88 **akuerineqassasut**.

Aningaasaqarnermut Ataatsimiititaliap isumaqatigiittup inassutigaa sammisaq nr. 6-ip ataani allannguutissatut siunnersuutit nr. 79, 82, 83 aamma 85 **akuerineqassasut**.

3.6 Sammisaq 7 – Ilinniartitaanermi nussuineq

Qulequttami tassani allannguutissatut siunnersuutinik 6-inik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiunilu missinger-suusiorfiusuni ataatsimut isigalugit IST-mut sunniuteqassanngillat.

Allannguutissatut siunnersuutit aqputigalugit aningaasaliissutinit atugassanngortinneqanngitsunik aningaasat ilinniartitaanerup iluani suliniutissanut aalajangersimasunut nuunneqarput.

Allannguutissatut siunnersuummut nr. 93-imut naqqiummik suliaqartoqarmat immikkut maluginiaqquneqarpoq, tak. isumaliutissiissummi ilanngussaq J.

Sammissaq 7-ip ataani allannguutissatut siunnersuutit nr. 89-imit 94-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

Konto pingaarneq 40.91.08 Inuussutissarsiutinut ilinniartitaanerit ataanni ilinniarfiit

Ukiumut ilinniartorineqartartunut aningaasartuutit pillugit tabelimi allannguisoqassasoq Naalakkersuisut siunnersuutigaat. Aningaasaqarnermut Ataatsimiititaliap paasinninnera malillugu naatsorsueeriaatsip allanngornera suliasami kisitsisini taakkunani allannguutitigut takutinneqarpoq, tassa ilinniarfimmi ilinniartut amerlassusiannut taamaallaat sanilliullugu ukiumut ilinniartunut aningaasartuutit maanna naatsorsorneqartalerata. Naatsuinerni siusinnerusukkut ilaatinneqartarsimapput ilinniartut ingerlatat isertitaqaataasut aqputigalugit ilinniarfiup immikkut akiliutitik pissarsiffigisaragai.

Suliasami kisitsisit taakku qanoq ersarissunngortinneqarlutillu eqqortumik takutitsisunngortinneqarsinnaanerata isumaliutigeqqullugu Naalakkersuisut Aningaasaqarnermut Ataatsimiititaliamit **kaammittorneqarput**.

(Allannguutissatut siunnersuut nr. 93)

3.7 Sammissaq 8 – Allaffissornikkut sipaaruteqarneq

Qulequttami tassani allannguutissatut siunnersuutit 47-inik Naalakkersuisut saqqummiussipput. Allannguutissatut siunnersuutit taakku IST-p inerneranut 2010-mi 3.889.000 kr. kr.-inik aammalu ukiuni missingersuusiorfiusuni pingasuni ukiuni tamani 4,2 mio. kr.-inik ajorseriaataassapput.

Allaffissornikkut *sipaarutit* ataatsimut isigalugu IST-p inernerata *ajorseriarneranik* kinguneqarnerat eqqumiiginngitsoornagu Aningaasaqarnermut Ataatsimiititaliap maluginiarpa. Allaffissornikkut sipaarutissat aningaasanut inatsimmut ilanngunneqareersut ilaannik sipaarutigisassaminik Kultureqarnermut, Ilinniartitaanermut, Iisimatusarnermut Ilageeqarnermullu Naalakkersuisoqarfiup tamakkiisunik sipaaruteqarsimannginnera taamatut ajorseriartoqarneranut pissutaasoq ataatsimiititaliamit oqaatigineqassaaq. Tamanna Naalakkersuisoqarfinnut unneqarillutik sipaarutissat ilaannik *namminneq sipaarutigisassaminnik* sipaaruteqarsimasunut naammaginangitsoq ataatsimiititaliaq isumaqarpoq. Taamatut iliorsinnaanerup akuerineratigut siunissami sipaarutissanik ingerlatsisoqasatillugu Naalakkersuisut imminnut artukkerput. Tamatuma saniatigut suliasaqarfiit akornanni aningaasanik pingaarnersiulluni tullerriaarisarnerup naligiikkunnaartinneqarsinnaanera aarleqqutigineqarsinnaavoq. Tamanna tunngaviummik isigalugu Aningaasaqarnermut Ataatsimiititaliamit asorsuaq eqqarsarnartoqartinneqarpoq. Taamaattumillu Kultureqarnermut, Ilinniartitaanermut, Iisimatusarnermut Ilageeqarnermullu Naalakkersuisoqarfiup allaffissornikkut sipaarutissaatut siunnersuutigineqartut aalajangiusimaqqullugit tamannalu pillugu aningaasanut inatsisissatut siunnersuutit Inatsisartunit pingajussaaneerineqarnissaanut allannguutissatut siunnersuummik saqqummiusseqqullugit Naalakkersuisut Aningaasaqarnermut Ataatsimiititaliamit **kaammattorneqarput**.

Sammissaq 8-p ataani allannguutissatut siunnersuutit nr. 123-imit 169-imut **akuerineqassasut** Aningaasaqarnermut Ataatsimiititaliamit **inassutigineqarpoq**.

3.8 Sammisag 9 – Utaqqiisaasumik inissiaqarnerup qitiusumik aqunneqarnera

Qulequttami tassani allannguutissatut siunnersuutiniq 6-inik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiunilu missingersuusiorfiusuni ataatsimut isigalugit IST-mut sunniuteqassanngillat.

Namminersorlutik Oqartussat utaqqiisaasumik ineqartitsinerata qitiusumit aqunneqalenera tunngavigalugu kontoni pingaarnerni allaffissornermut tunngasuni arlalinni allannguutissatut siunnersuutit aqutugalugit sipaaruteqartitsisoqarpoq. Utaqqiisaasumik ineqartitsinermik aqutsineq aningaasartuuteqarnerlu allaffissornikkut immikkoortortanit ataasiakkaanit manna tikillugu isumagineqartarsimavoq. Tamanna allannguutissatut siunnersuut matumani pineqartoq aqutugalugu allanngortinneqarpoq, taamaalillunilu utaqqiisaasumik ineqartitsinermik aqutsineq siunissami Aningaasaqarnermut Sulisoqarnermullu Aqutsisoqarfimmi (ASA) immikkoortortamit nutaatut pilersinneqartumit isumagineqartalissalluni, tak. allannguutissatut siunnersuut nr. 175. Sipaarutissap ilaa aningaasanut inatsissatut siunnersuutip Inatsisartunit pingajussaaneerreqarnerani aatsaat piviusunngortinneqassaaq, tassa Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup sipaarutissani tamakkiisoq piviusunngortissimanngimmagu, tak. konto pingaarnerni 40.01.99-imi, Missingersuutinit iluarsisutinit tunngasumi, missingersuutiniq iluarsineq (Allannguutissatut siunnersuut nr. 182).

Sipaarutissatut siunnersuutigineqartut ilaat Nuummi Tuapannguani inissarsuit 4-mit 7-imut sulisunut inissianut atorneqarnerisigut sipaarutigineqarput. Taamaalillunilu sipaarutissat missingersuutigineqartunit annikinnerusinnaapput, tassa Ineqarnermut, Attaveqarnermut Angallanermullu Naalakkersuisup isumasioqatigiilluni ataatsimiinnermi Aningaasaqarnermut Ataatsimiititaliamut paasisutissiisutigimmagu inissarsuarni taakkunani inissiat ilaasa sulisunut inissianut atornagit nalinginnaasumik attartugassatut atorneqarnissaat naatsorsuutigineqartoq.

Qulequttap tamatuma ataani sipaarutissat ilaat immikkoortunut siulersuisunik tamakkiisumik ilaannakortumilluunniit pilersitsivigineqarsimasunut tutsinniarneqartut ataatsimiititaliap maluginiarpaa. Tamatumani ilaatigut pineqarput Katuaq (Allannguutissatut siunnersuut nr. 192) aamma KNR (Allannguutissatut siunnersuut nr. 191). Sipaarutissat taakku siulersuisut taakku oqartussaaffiisa pilersaarutaanngitsumik killilersorneqarnerannik kinguneqannginnissaat Naalakkersuisunit piffisaatillugu qulakkeerneqarsimassasoq ataatsimiititaliamit naatsorsuutigineqarpoq.

Qulequttap matuma ataani allannguutissatut siunnersuutit amerlanersaat ataatsimiititaliami ikinnerussuteqartut, Siumup Atassutillu ilaasortaataaasa akuersisutigisinnaanngilaat. Taamaalillutillu ikinnerussuteqartut isumaqarput utaqqiisaasumik inissiaanut akiliuteqartarnissamik Naalakkersuisut aalajangernerat suliffeqarnermut isumaqatigiissutinit maleruagassanullu naapertuunnersoq suli qulaarneqanngitsoq. Tamatuma saniatigut sipaaruteqarnissamut aallaaviuvoq Tuapannguani inissarsuit sisamat sulisunut inissianut atorneqarnissaat. Partiit marluusut ilaasortaatit isumaqarput inissarsuit taakku nalinginnaasumik attartortittakkatut atorneqartariaqartut.

Allannguutissatut siunnersuummut nr. 175-imut aningaasaliinnermi tunngavigineqartut innersuussutugalugit Naalakkersuisut siunnersuutaat ataatsimiititaliami amerlanerussuteqartunit, Inuit Ataqaatiit Demokraatillu ilaasortaataaannit taperserreqarpoq, tassa Namminersorlutik Oqartussat allaffissornikkut aningaasartuutaasa ikilisinneqarnissaat amerlanerussuteqartunit pingartinneqarmat. Tamatuma peqatigisaanik Namminersorlutik Oqartussat inissianik amigaateqarnerannik iluanaarniute-

qarneq killilernerqartariaqartut amerlanerussuteqartunit isigineqarpoq, tamannami utaqqiisaasumik ineqartitsinermi annertoorujussuarnik aningaasartuuteqarnermik naluneqanngitsutut kinguneqartar-mat. Matumani iliuserisaq aqutigalugu aningaasat inissianut nalinginnaasumik attartortittakkanut atornerqarsinnaasut pissarsiarineqassapput.

Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataasa **inassutigaa**t sammisaq 9-p ataani allannguutissatut siunnersuutit nr. 170-imit 206-imut **itigartin-neqassasut**.

Aningaasaqarnermut Ataatsimiititaliami amerlanerussuteqartut, Inuit Ataqtigiit Demokraatillu i-laasortaataasa **inassutigaa**t sammisaq 9-p ataani allannguutissatut siunnersuutit nr. 170-imit 206-imut **akuerineqassasut**.

3.9 Sammisag 20 - Suleriaaseq pillugu Ataatsimiititaliap allannguutissatut siunnersuutai

Suleriaaseq pillugu Ataatsimiititaliap allannguutissatut siunnersuutit marlunnik saqqummius-sivoq. Allannguutissatut siunnersuutit taakku ukiumi aningaasanut inatsiseqarfiusumi ukiumilu missingersuusiorfiusuni ataatsimut isigalugit IST-mut sunniuteqassanngillat. Allannguutissatut siunnersuutit taakku 207-imit 208-imit normoqarput.

Ulloq 23. oktober 2009 Inatsisartut imm. UKA09/82 ima qulequtalik: "Uunga siunnersuut: *Naa-lakkersuinikkut sulinermit aningaasatigut tapiissuteqartarneq pillugu Inatsisartut inatsisaata allanngortinneqarneranik Inatsisartut inatsisaat nr. xx, dd. mm 2009-meersoq.*" akuersissuti-gaat.

Siunnersuutip aningaasatigut kingunerisassai pillugit inatsimmut nalinginnaasumik nassuiaatini allassimavoq:

"3.1 Aningaasatigut kingunerisassat

Inatsisissatut siunnersuut ataatsimut isigalugu Nunatta Karsianut kinguneqaate-qassanngilaq. Kontumilli pingaarnermi 01.10.10-imit, Inatsisartut, missingersuuti-tut aningaasaliissutinit kr. 3.145.000-it kontumut pingaarnermut 01.06.11-imut, Naalakkersuinikkut suliniaqatigiiffinnut aningaasatigut tapiissuteqartarneq, nuun-neqartussaassapput."

Allannguutissatut siunnersuut manna saqqummiunneqarpoq Inatsisartut aalajangerata 2010-mut aningaasanut inatsisissatut siunnersuummut ilanngunneqarnissaa siunertaralugu.

Allannguutissatut siunnersuutit taakkununga Aningaasaqarnermut Ataatsimiititaliap inassute-qanngilaq, tassa Suleriaaseq pillugu Ataatsimiititaliap suliaasaqarfianut tunngammata (Suliaasaqar-fik 01).

Ilanngussaq K innersuussutigineqarpoq.

Allannguutissatut siunnersuutit nr. 207 aamma 208 akuerineqassasut Suleriaaseq pillugu A-taatsimiititaliap inassutigaa.

4. Oqaasertaliussanut allannguutissatut siunnersuutit

Oqaasertaliussanik nutaanik katillugit 28-inik Naalackersuisut siunnersuuteqarput. Allannguutissatut siunnersuutit taakku 95-imit 122-imut normoqarput. Oqaasertaliussanut allannguutissatut siunnersuutit sammisaq 10-p ataani ataatsimoortinneqarput.

Allannguutissatut siunnersuutit saqqummiunneqareerneranni allannguutissatut siunnersuutit nr. 110 aamma 114 Naalackersuisut tunuartippaat, tak. ilanngussaq J. Tamatuma kingorna oqaasertaliussanut allannguutissatut siunnersuutit 26-it sinnerupput.

Allannguutissatut siunnersuutit nr. 106-imut, 113-imut, 116-imut, 117-imut aamma 122-imut naqqiummik suliaqartoqarmat immikkut maluginiaqquneqarpoq, tak. isumaliutissiisummi ilanngussaq J.

Oqaasertaliussanut allannguutissatut siunnersuutit ilaat atugassarititat piginnaatitsissutillu ilusili-gaanerisa erseqqissarneqarnerannut tunngapput. Allannguutissatut siunnersuutit taakku Aningaasaqarnermut Ataatsimiititaliap qinnuiginninneratigut amerlanertigut saqqummiunneqarput.

Oqaasertaliussanut allannguutissatut siunnersuutit nr. 95-imit 109-mut aamma 111-imit 113-imut aammalu nr. 115-imit 120-imut aamma 122 **akuerineqassasut** Aningaasaqarnermut Ataatsimiititaliamit **inassutigineqarpoq**.

Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaatitaasa allannguutissatut siunnersuut nr. 121 akuerisinnaanngilaat.

Aningaasaqarnermut Ataatsimiititaliami amerlanerussuteqartut, Inuit Ataqatigiit Demokratitillu ilaasortaatitaasa allannguutissatut siunnersuutit nr. 121 akueraat.

Oqaasertaliussanut toqqakkanut ataasiakkaanut oqaasertaliussat ilassutaasut nassuiaataasullu matuma kinguliani ilanngunneqarput.

Konto pingaarnemut 20.11.72-imut Illoqarfiit nunaqarfiillu ilaanni immikkut ittumik suliniutissatut sillimmatit

Oqaasertaliussaq Naalackersuisut tunisassiorfimmik sullissinissaq pillugu isumaqatigiissuteqarnissaannik piginnaatitsisoq ilanngunneqassasoq Naalackersuisut siunnersuutigaat. Sullissinissamik isumaqatigiissut Aningaasaqarnermut Ataatsimiititaliamit akuersissutigineqareersimassaaq.

Kontomi pingaarnermi aningaasaliissuteqarnissaq suli sinnersuutigineqarsimannngilaq. Tamanna pingajussaaneerinissamut allannguutissatut siunnersuuteqarnikkut pissasoq naatsorsuutigineqarpoq. (Allannguutissatut siunnersuut nr. 95)

Konto pingaarnemut 80.00.88-imut Nunaqarfinnut isorliunerusunullu sanaartornermut pilersaaruisaq

Kontomut pingaarnemut oqaasertaliussami nr. 1-imi allannguisoqassasoq tamatumalu peqatigisaa-nik nutaamik oqaasertaliussinissaq (nr.3) Naalackersuisut siunnersuutigaat.

Oqaasertaliussassatut nutaatut siunnersuutigineqartoq (3) naapertorlugu illullioortitsiner-mut pilersaarutit, nuttarnersitsiniarluni suliniuteqarnermut ilaasut akornanni aningaasanik nuussinissamut Naalackersuisut piginnaatinneqarput.

Aningaasanut inatsisissatut siunnersuutip pingajussaaneernejarnissaanut oqaasertaliussamut tas-sunga allannguutissatut siunnersuummik saqqummiusseqqullugit Naalakkersuisut Aningaasaqar-nermut Ataatsimiititaliamit **qinnuigineqarput**, taamaalilluni nuussinissat Aningaasaqarnermut Ataatsimiititaliamit akuerineqartussanngorlugit. Tamatuminnga malinninnissaq aappassaaneerini-samut akissuteqaamminni uppenarsaqqullugu Naalakkersuisut qinnuigineqarput.
(Allannguutissatut siunnersuut 117)

Konto pingaarnermut 87.72.13-imut Immikkut ittumik iluarsartuussineq

Oqaasertaliussaq nr. 2 peernejassasoq Naalakkersuisut siunnersuutigaat. Oqaasertaliussaq Nuummi *Radioffeldimi* iluarsaanermut tunngavoq. Allassimasut malillugit iluarsaaneq "...taamaativinneqavissimavoq inissiat pitsaannginnerujussuat pissutigalugu.". *Radioffeldimilli* iluarsaanerup akisuallaarnera paasineqarmat taamaatinneqarsimassasoq Aningaasaqarnermut Ataatsimiititaliamit ilimagineqarneruvoq.

Kontomut pingaarnermut 89.72.12-imut, Taartissanik inissialiortiternermut tunngasumut, oqaaserta-liussamut nr. 5-imut allannguuteqartitsinissaq Naalakkersuisut siunnersuutigisimannngimmassuk ataatsimiititaliamit eqqumiigineqarpoq. Taamaalilluni oqaasertaliussamut taaneqartumut nassuiaati-ni allassimavoq ilaatigut Nuummi *Radioffeldimi* iluarsaanissap isumagineqarnissaa siunertaralugu Illut A/S pilersinneqartoq. Taanna soorluuna eqqortuujunnaartoq. Oqaasertaliussamut nassuiaatip taaneqartup oqaasertaliorneqarnerata nutarterneqartariaqarneranik Aningaasaqarnermut Ataatsimii-titaliap isumaa matumuuna oqaatigineqartutut isigineqarpoq.
(Allannguutissatut siunnersuut nr. 118)

Konto pingaarnermut 89.72.11-imut Nammineq inissianik tapiissutitalimmik sanaartorneq

Illuut A/S aqqutigalugu realkreditimit aningaasalersorneqartunik illoqarfinni Qaqortumi, Sisimiuni Ilulissanilu illuliornissanik isumaqatigiissuteqarnissaq siunertaralugu piginnaatitsissummik ilann-gussinissaq Naalakkersuisut siunnersuutigaat.

Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaataasa allannguutissatut siunnersuut taanna akuerisinnaanngilaat.

Aningaasaqarnermut Ataatsimiititaliami amerlanerussuteqartut, Inuit Ataqatigiit Demokraatillu ilaasortaataasa allannguutissatut siunnersuut taanna akueraat.

Immikkoortoq 2.10-mi aallarniutigalugit Illuutiqatigiiffik Illuut A/S pillugu oqaaseqaatitik amer-lanerussuteqartut taamatullu ikinnerussuteqartut innersuussutigaat.
(Allannguutissatut siunnersuut nr. 121)

Konto pingaarnermut 89.72.12-imut Taartissanik inissialiortiterneq

Makku siunertaralugit konto pingaarnermi arlalinnik allannguuteqartitsinissaq Naalakkersuisut siunnersuutigaat:

Nr. 1: Tuapannguani illersorsuit ilaata ataatsip Inatsisartut Allattoqarfiannit tiguneqarsinnaaneranut periarfissap oqaasertaliussamit peernejarnissaa.

Nr. 3: Maniitsumi Salliarnap isateriarlugu nutaamik sanaffiginissaanut piginnaatitsissutip piginnaa-titsissummit peernejarnissaa. Taarsiullugu Nuummi blok P isateriarlugu nutaamik sananissamut piginnaatitsissut nutaaq ilanngunneqarpoq.

Nr. 4: Immikkut ittumik aningaasalersueriaaseqarnissaq pillugu Naalakkersuisut Kommuneqarfik Sermersuumik isumaqatigiissuteqarsinnaanerannut piginnaatitsissutip annikillisinnissaa, taamaalil-

lunilu piginnaatitsissummi "Tuujuk" Nuummiittoq kisimi pineqalerluni. Piginnaatitsissummi siusinnerusukkut aamma ilaatinneqarput Nuummi "Narsarsuaq" aamma Blok P. Tamatuma saniatigut inissassat ilaat inuusuttunut utoqqarnullu immikkut naatsorsuussanngorlugit ilusilerneqarnissaat pillugu aalajangersakkamik ilanngussisoqarpoq.

Oqaasertaliussamut nr. 3-mut nassuiaatip kalaallisoortani immikkoortup aappaa danskisuaanut sanilliulluni allaanerusoq Aningaasaqarnermut Ataatsimiititaliamit paasineqarpoq. Ilaatigut pigineqatigiilluni imaluunniit nammineq pigisatut inissiat "96"-it sanaartorneqarnissaat naatsorsuutigineqartoq kalaallisuuani allassimanngilaq. Nassuiaatip kalaallisuuata nutarterneqarnissaanut Aningaasaqarnermut Ataatsimiititaliap tapersiinera matumuuna oqaatigineqartutut isigineqarpoq, taamaalilluni taanna danskisuaanut naapertuunneruleqqullugu.

(Allannguutissatut siunnersuut nr. 122)

5. Aningaasaqarnermut Ataatsimiititaliap kaammattuutai

Kaammattuut nr. 1

Aningaasanut inatsisissatut siunnersuutip pingajussaaneernissaanut allannguutissatut siunnersuummik saqqummiusseqqullugit Naalakkersuisut Aningaasaqarnermut Ataatsimiititaliamit **kaammattorneqarpoq**, taamaaliornikkut kontomut pingaarnermut 40.92.13-imut, Ilimmarfimmut tunngasumut, missingersuutinut ilanngussami suliasamat kisitsisit aningaasaliissutit Ilimmarfimmi ilinniarfinnut agguataarneqarnerannut takutitsisut ilannguteqqinneqassallutik.

Kaammattuut nr. 2

Ukioqatigiiaat marluiit meeqqat atuarfiannik qimatsinerannut atatillugu manna tikillugu suliniutigineqartunik naliliineq ingerlanneqarsinnaaqqullugu ukioqatigiiaat marluiit suliffeqarnermut ilinniaqarnermullu ingerlaqqinneranni killiffik erseqqissoq Naalakkersuisunit saqqummiunneqassasoq Aningaasaqarnermut Ataatsimiititaliamit **kaammattuutigineqarpoq**.

Kaammattuut nr. 3

Aningaasanik tassunga immikkoortitsisoqarsinnaaleriarpat eqqagassalerinermik pilersaarutip aningaasanut inatsimmi pingaarnersiunerimut ilanngunneqarnissaa Naalakkersuisunut ataatsimiititaliap **kaammattuutigissavaa**.

Kaammattuut nr. 4

Erngup taratsulluunnit flourimik akuneqarnissaannik sulinerup annertuumik siuarsarneqarnissaa qulakkeeqqullugu Naalakkersuisut ataatsimiititaliamit **kaammattorneqarput**. Suliniutip taamaattup piviusunngortinneqarnissaanut nassuiaammik, pitsaaqutinik pitsaanngequtinillu imaqartumik tassungalugu ilanngullugu kingunipilugisinnaasaanik, piffissamullu pilersaarummik kiisalu tassunga atatillugu aningaasartuutissat pillugit paasissutissanik kingusinnerpaamik 31. december 2009-mi pissarsisinneqarnissani ataatsimiititaliap kissaatigaa.

Kaammattuut nr. 5

Aningaasat Sanaartugassanut Iluarsagassanullu Aningaasaateqarfimmi atorneqaratik uninngaannar-tussaasut ilisimagaluarlugu aningaasanik qinnuteqartoqartaqqunagu sanaartugassanut aningaasaliis-sutinik atuinissamik **piviusorsiortumik** missingersuusiortarnissamik qulakkeerinninniarnerminnik Naalakkersuisut ingerlatsiinnarnissaat Aningaasaqarnermut Ataatsimiititaliamit **kaammattuutigi-neqarpoq**.

Kaammattuut nr. 6

2011-mi aningaasanut inatsisissatut siunnersuummut atatillugu naalakkersuisoqarfiit missingersuu-tinik piareersaaneranni Aningaasaqarnermut Ataatsimiititaliap isumaliutissiisutaata tamatigut ilan-ngunneqartarnissaa ataatsimiititaliamit **kaattuutigineqassaaq**, taamaalilluni aningaasanut inatsisissatut siunnersuummi ilusiliinikkut amigaatit ersarissut ukiumit ukiumut ataatsimiititaliamit upa-ruarneqartariaarullugit.

6. Aningaasaqarnermut Ataatsimiititaliap inassuteqaatai

Taama oqaaseqarluni Aningaasaqarnermut Ataatsimiititaliap aningaasanut inatsisissatut siunnersuut Inatsisartunit aappassaaniigassanngortippaa.

Sammissaq 1-ip ataani allannguutissatut siunnersuutit nr. 1-imit 53-imut **akuerineqassasut** Ani-ngaasaqarnermut Ataatsimiititaliap isumaqatigiittup **inassutigaa**.

Sammissaq 2-ip ataani allannguutissatut siunnersuutit nr. 54-imit 63-imut **akuerineqassasut** Ani-ngaasaqarnermut Ataatsimiititaliap isumaqatigiittup **inassutigaa**.

Sammissaq 3-ip ataani allannguutissatut siunnersuutit nr. 64-imit 68-imut **akuerineqassasut** Ani-ngaasaqarnermut Ataatsimiititaliap isumaqatigiittup **inassutigaa**.

Sammissaq 4-ip ataani allannguutissatut siunnersuutit nr. 69-imit 78-imut **akuerineqassasut** Ani-ngaasaqarnermut Ataatsimiititaliap isumaqatigiittup **inassutigaa**.

Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaatitaasa **inassutigaa** sammissaq 6-ip ataani allannguutissatut siunnersuutit nr. 80, 81, 84, 86, 87 aamma 88 **itigartinneqassasut**.

Aningaasaqarnermut Ataatsimiititaliami amerlanerussuteqartut, Inuit Ataqatigiit Demokratillu i-laasortaatitaasa **inassutigaa** sammissaq 6-ip ataani allannguutissatut siunnersuutit nr. 80, 81, 84, 86, 87 aamma 88 **akuerineqassasut**.

Aningaasaqarnermut Ataatsimiititaliap isumaqatigiittup inassutigaa sammissaq nr. 6-ip ataani allan-nguutissatut siunnersuutit nr. 79, 82, 83 aamma 85 **akuerineqassasut**.

Sammissaq 7-ip ataani allannguutissatut siunnersuutit nr. 89-imit 94-imut **akuerineqassasut** Ani-ngaasaqarnermut Ataatsimiititaliamit isumaqatigiittumit **inassutigineqarpoq**.

Oqaasertaliussanut allannguutissatut siunnersuutit nr. 95-imit 109-mut aamma 111-imit 113-imut aammalu nr. 115-imit 120-imut aamma 122 **akuerineqassasut** Aningaasaqarnermut Ataatsimiitita-liamit **inassutigineqarpoq**.

Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaatitaasa allannguutissatut siunnersuut nr. 121 itigartinneqassasoq **inassutigaa**.

Aningaasaqarnermut Ataatsimiititaliami amerlanerussuteqartut, Inuit Ataqatigiit Demokraatillu ilaasortaatitaasa allannguutissatut siunnersuut nr. 121 akuerineqassasoq **inassutigaa**.

Sammissaq 8-p ataani allannguutissatut siunnersuutit nr. 123-imit 169-imut **akuerineqassasut** Aningaasaqarnermut Ataatsimiititaliamit isumaqatigiittumit **inassutigineqarpoq**.

Aningaasaqarnermut Ataatsimiititaliami ikinnerussuteqartut, Siumup Atassutillu ilaasortaatitaasa **inassutigaa** sammissaq 9-p ataani allannguutissatut siunnersuutit nr. 170-imit 206-imut **itigartinneqassasut**.

Aningaasaqarnermut Ataatsimiititaliami amerlanerussuteqartut, Inuit Ataqatigiit Demokraatillu ilaasortaatitaasa **inassutigaa** sammissaq 9-p ataani allannguutissatut siunnersuutit nr. 170-imit 206-imut **akuerineqassasut**.

Allannguutissatut siunnersuutit nr. 207 aamma 208 **akuerineqassasut** Suleriaaseq pillugu Ataatsimiititaliap **inassutigaa**.

Inatsisartut suliarinninnerat tunngavigalugu inatsisissatut siunnersuut iluserilikkamisut iluseqartoq Inatsisartut inaarutaasumik pingajussaaneerillutik suliarinninnissaat sioqqullugu Aningaasaqarnermut Ataatsimiititaliamut suliarineqaqqittussanngorlugu ingerlateqqinneqassasoq Aningaasaqarnermut Ataatsimiititaliamit **inassutigineqarpoq**.

 Niels Thomsen

 Naaja Nathanielsen,
 siulittaasoq

 Per Berthelsen

 Aqqaluaq Egede

 Finn Karlsen